

# TIIHY JO OOH

## Tiihy Jeacuu Athaahb Jo Oohre

### Rob Ke Nying Kitaab

Kitaab gihir Tiihy Jo oohr ngo thaahb lubo gihn agweed yi kitaab gihir Luka. Ngo nyoadh kaa anyaay lum Ciig Beer yi cing yaa ayiiho giin umodho ge anaa atiihyo e Wahy Juog e ne kaahn gen. Ciig Beer anyaay ke yi Jeruucalem kedea Judea maa Camaarya uwahdhe ke bang ungoom cang.

Kitaab gihn nyoadh kaa athub jo ayiihe umodho kiin yaa Judea uwahdhe kaa adoohng tiihy gene ne gihn maa ayiih upiny cang. Luka ngaa agweed kitaab gihn ngo arobe ne cohg yihr yaa ukwaan kitaab gihre kejea jo ayiih Dhaahr Juog ge padh yaa cyeja me rubo ke nying ruohdh Roama ge amag piny Judea. Arob Lukae thioh kejea dhe yoohn yiho ke nying Jeacuu athaahdh dhe yiho gihir Judea ge anaa anyoadh Juoge yihr gen.

Gihn wiiehe ne maalo yi Tiihy Jo Oohr, ngo beehda tiihj gihn ayug Wahy Juoge. Wahy Juog e anaa akahl tee rog yaa ayiiho yi Jeruucalem cahng anaa abeehn Wahy Juoge kedea ubare maalo ke cohg jo doong akuud yaa ayiiho ke jo ayiiho kedea cub tee yihr gen.

### Kaa Acaan Luube

Gwiihdo gihir cuude 1:1-26

Gug luub aceg Jeacuu kedea gihn ateede kejea utiihy ree 1:1-14

Ngaa aluuny kar Juudo 1:15-26

Cuude giin ne Jeruucalem 2:1-8:3

Cuude giin ne Judea kedea Camaarya 8:4-12:25

Wahdh Poal ne puohny 13:1-28:31

Wahdh puohny mar umodho 13:1-14:28

Amaad gihir Jeruucalem 15:1-35

Riown wahdh puohny 15:36-18:22

Dahg wahdh puohny 18:23-21:16

Poal amag yi thijin gihir Jeruucalem kedea Cejearya maa Roama 21:17-28:31

### Jo Oohr Ge Koar Muuny Juog

**1** <sup>1</sup>Yih Thiopiihluj, kitaab gihn anaa agweeda umodho yihri ni, a anaa arubo yea ke nying giin anaa atiihy Jeacuu kedea giin anaa apuohnye naa athube ke tiihy puohny nyoge. <sup>2-3</sup>Jeacuu ree anaa abeehne ne nyoadho yihr jo oohr, ge anaa akwanye batiene thone tiel me thoohdh mee kedea ubeehde keehd gen ke nihn jieharioh beere ngo ngahy gene ngahyo ne cohg kejea ngo ngaa me kuow. Luube ge anaa aceg Jeacuu piny yihr jo oohr kaa tee Wahy Juog ke ngude. Arobe yihr gen beere ge urubo yihr nyoge kejea Juog daahd nyoge unahg gene yaa Dhaahre. Batiene e ngo atihng Juoge ke Maalo. <sup>4</sup>Cahng anaa atihng Jeacuu Paar Juog, e en maa jo oohr ge anaa amahd ka maa acielo. Cahng nu e Jeacuu lubo arobe yihr jo wahdhe. Arobe yihr gen kea, "Yaage, wu keá aay yi geen Jeruucalem. <sup>5</sup>Wura, Wahy Juog, e anaa aruba ke nyinge, uohre yihru."

### Tiihy Acub Jeacuu Yihr Jo oohr

<sup>6</sup>Cahng moogo dahng e Jeacuu anaa apeehe jo wahdhe kob gene, "Ngad puohny, unahg weehne e nu ubeehno, yihn maa wan, unahgo ruohdh doonge yi dhaahr Yijarael?"

<sup>7</sup>Maa beehre ngo yihr gen, "Juog Wura e keede e ne ngahy cahng ngo maa ka uyug giin ni rog gen kii ngo. Padh tiihyu unahy gen. <sup>8</sup>Abea gihn utiihy beehda cidh ne rob giin apuohnya yihr nyoge. Tee ucub yihru nea Wahy Juog beehn wudhu, kaano arumo e giin ngahy ke nyinga ge uteedu yihr yaa beehd Jeruucalem kedea cidhu ne teed gen yihr yaa beed wudh geedh piny Judea maa piny Camaarya kedea yihr yaa wudh geedh ungoom cang."

### Jeacuu Atihng Maalo Paar Juog

<sup>9</sup>Naa athum Jeacuu ke rob yihr gen e ge awiihwe wiihwo, noono utihng Maalo Paar Juog e ngo uneehno yihr gen <sup>10</sup>uwahdhe kaa arwaahnye yi lwahd. Abea ge apoohde e nying gen atal maalo ne maahnyo, e wuohdjuog ariow maa angaab waare me tar ne yim, ge anaa ne celang ucing gen <sup>11</sup>urub gene kob gene, "Wu yaa Gaalili!<sup>a</sup> Beeh teed wane yi lum atihng Juoge Jeacuu Maalo ne do Paar Juog. Jeacuu uduu wa kwaad kaano aniidu ngo e caa Maalo nu. Abea awaahn ni nyingu keá ngahn maalo ne maahnyo, bang gihn cahng uduue ngo poohd."

### Mathiia Akwany Juoge Kar Juudo

<sup>12</sup>Kaano arumo e jo oohr ge adog geen Jeruucalem, e ge duu kaa wiih good Ulihbe.<sup>b</sup> Kaa ngo thioh, cahng keehd geew. <sup>13</sup>Ubeehn gene yi buur geew uyedh gene yi wod maalo naa abeehd gene yea. Yaa anaa yi wod anahg ge Piihter,

<sup>a</sup>1:11 Wuohnjuog jo Jeacuu cuohne e ge yaa Gaalili, muudiihrya gihir paar ge Jeacuu.

<sup>b</sup>1:12 Ulihbe beehda kwaad yaadh me room ke yow bang gihn yea ne mow thioh.

1:1 Luk 1:1-4    1:2-3 10:41; 13:31; 28:23; Luk 24:36-42, 46-51; 1Tim 3:16    1:4-5 Luk 3:16; 24:49; Jon 14:16    1:6 Luk 24:21

1:7 Mak 13:32    1:8 Luk 24:47-48; Giin ngahy ke nyinga: 1:21-22; 2:32; 3:15; 5:32; 10:39; Jon 15:27

1:9 Luk 24:51; Jon 6:62; 1Pii 3:22    1:10 Luk 24:4    1:11 Luk 21:27; Any 1:7    1:12 Luk 24:52    1:13 Luk 6:14-16

Joon, Jeamij maa Andrya kedea Pihlihb maa Thoamaj, Bartholomeao kedea Matheewo, Jeamij waahd Alpaawo, Cimoane,<sup>c</sup> kedea Juudo waahd Jeamij.

<sup>14</sup> Yaa nu cang ge ne koag ke kway Juog ke cwihny ge acielo. Maahn mooge maa Maarya miih Jeacuu kedea wuud wur Jeacuu ge na ukwahyo keehd jo oohr tiehd.

<sup>15–19</sup> Juudo Yijkaariod, naa angeye ngo kejea e tiihy gihn me raaj naa akahle nyoge maa amag Jeacuu, e ree angaabe ngaabo. Gihn nu e kuohme apahdho piny unahg ciihn yeye ne way oogo. Yaa mooge, naa ayoaad gene ngiihny anaa akaabe naa aluome Jeacuu, e puohdho kaa athowe yea ngo angeew gene ke ngiihny nu. Naa abeehn nyoge ne lihng gihn atiihy ree, e puohdho gihn angeew ngo acuohn gene ne 'Akeldaama', lum yea ke dhe paar gen: "Kaa awoj reme piny yea."

Batien nihn me noog, naa aduu jo oohre ke yoohn good Ulihbe e amaad gihr yaa ayiiho ake piih. Yaa anaa kar amaad ge anahg kar nyoge jiehabiih ke dhaano aduuno. Maa ayedh Piihtere maalo maa arube kea, "Yaage, yihra ne gihn me daahda ke robo yihru. Gihn raaj e atiihy Juudo Yijkaariod ngo beehde e ngo ngahyu. Jeacuu e naa anaa akwany ngo keehd won yi tiihj gihn tiihyo. Abea wiihe anaa abeehne ne waaro upaahre oogo rih Jeacuu kedea ubeehne ke nyoge ne nyoadh ngad puohny beere mag gene maa. Awaahn ni Juudo ngo tooro bango, ngo athow. Abea Wahy Juog, gihn beere rom tiihyo yihru ngo anaa arobe coon yihr Deabid ruohdh kedea urob Deabide ngo. Wo dhiil tiihj ke luub anaa agweed yi kitaab Juog ke nying ngaa uluuny kar Juudo.

<sup>20</sup> "Ngahda ngo ngahyu e gihn agweed yi kitaab Wahy Apoong Juog naa agweede naa,

'Beehn tiihye wiie wa kaa araanye ngo.'

Kedea gihn anaa agweed naa,

'Beehn puohdhe yiide,'

ngahda ngo ngahyu thiw!

<sup>21–22</sup> "Beer nea neehn gihn nu e kea dhiilo dhaano acielo ke kwanyo me puohny yi lum gihn acahr Jeacuue yihr nyoge. Dhaano maa anudo ke won yi waahdh Jeacuu Ruohdh naa athube ke cahng anaa abeehn Joone ucube piih luogwahy yihr Jeacuu uwahdhe cahng anaa atihng Juoge ngo Maalo."

<sup>23</sup> Batiene e nyoge ariow akwahny gene ke oogo, Jocebe Barcaabaj,<sup>d</sup> kedea Mathiia. <sup>24</sup> Maa akwaj gene Juog kob gene, "Juog yih ge Ruohdh wan ni, ge ngahy giih nii cwihny nyoge beehd, nyoadh ngaan akwany kiin yaa ni ariow yihr wan. <sup>25</sup> Beere ngaan ngo mahd yihdh jo oohr kar Juudo naa a'aay bang wan uyoade gihr wiihe." <sup>26</sup> Maa athoohr gene gaay ne kwany dhaano acielo kiin yaa ni ariow. E Mathiia e naa akwany ke gaay umade ke bang jo oohr ge anahg apaar wonge acielo, udoohng gene naa apaar wonge ariow.

### Wahy Juog Kar Rob Ke Dhow Me Thoohdh Acube Yihr Jo Oohr

**2**<sup>1</sup> Batien nihn apaar naa atihng Jeacuu Maalo, e jo waahdh Jeacuu ke kar gen cang ge anaa ka maa acielo yi wod me duohng. Cahng ngo anahg yaan Cahng Wahy Juog ge cuohn gene ne Paajkwa. <sup>2</sup> Yi cahng nu, ke nyango, e duol ake lihngo wa ngoar deeh yamo me duohng. Maa abeehn duole upaahnge yi wod ne peg. <sup>3</sup> Kaano e gihn me wa leeb maaj aniid gene niido e wudh gen akiire ne kar naa acielo acielo. <sup>4</sup> Ubeehn Wahy Juoge uyaahnge gen ke tee gihre. Noono ubeehn gene oogo yi wod ne ci bang nyoge, uthub gene ke kaano ke rob keehd dhow me thoohdh, e ngaan rob kwaad kaa acub Wahy Juoge yihre.

<sup>5–11</sup> Yi geen Jeruucalem, ge beehda geen Judea, Judea maa amag lum Juog ne cohg ge anudo. Ge anaa abeehn Jeruucalem ke bang wudh geedh ungoom ne yug giih kweehr yihr Juog. Ge abeehno kaa wudh pinye mooge. Mooge ge abeehno kaa yoohn Paarthyian maa Mede kedea Elamaad maa Mecopotaamya. Mooge ke yoohn Judea maa Kapadoacya kedea Poantuj maa Aacya. Mooge ge abeehno kaa yoohn Priigya kedea Pampiihlya. Nyoge mooge keew gen ge abeehno kaa yoohn Micihr kedea kuohn Liihbya ge cahng ke Ciriilna maa Roama. Nyoge me thoohdh thiw ge anaa abeehno naa alihng gene doohn nyoge. Abea naa awahdh gene, e wudh ge ake riihr bang gihn kwaad dhaano giih rob jo waahdh Jeacuue ge lihng yihre wa ge rob kaa dhe paar gen. Noono maa agaahy gene uteeng gene thaahdh gen teengo kob gene, "Wa yaa ni rub kan ge yaa dom Gaalili! Ge kuu akuong beehdo wudh geedhe giih abeehno ke yihdh gen! Dhe paaro ayoaad gene ke kee? Dhogo, wo yaa Judea! Kedea dhog yaa alog rog gen udoohng gene ne Judea ke yoohn ka wuor gene Juog!"

<sup>12</sup> Wa kwaad kaano ariihr wudh nyoge nu, e ge ake thubo ke piehj ke rog gen kob gene, "Juog daahd gihn ke tiihyo yihr nyoge?"

<sup>13</sup> Abea nyoge mooge ge ake rubo, e ge ngier jo waahdh kob gene, "Ge beehda nyoge maa amuohl koonge."

### Gihn Arob Piihtere Yihr Nyoge Ke Nying Jeacuu

<sup>14</sup> Kaano e Piihter anyiig buud nyoge, en maa joe ge apaar wonge acielo ni. Utihnge duone maalo uthube ke rob kobe, "Wu yaa Judea giih abeehno ke kuohn mooge maa wu yaa beed geen Jeruucalem ni, lihngu gihn. Beeh teeda yi lum gihn ni atiihy ree yihru. <sup>15</sup> Wa ge niidu kan ni, padh muohl e naa amuohl wane keehd kuong, wa kwaad ka rob nyoge mooge ngo keewu. Wa piny poohd ngej kedea cahng kuu aleehdho! <sup>16</sup> Wa kuu amuohl. Gihn ayug ree rog wan beehda Wahy Juog e naa ayaahng wan ke tee gihre. Gihn acoon ge anaa arob Juoge yihr nyoge ke duon ngad agamloohnge me nyinge Joel ngo ngahyu. Gihn nu e naa athob ree ke yugo tihn noon ni. Juog anaa koohbo yihr Joel kea,

<sup>17</sup> 'Gihn e naa gihn uyuga nea Ngad Boadh nyoge beehne acahngo.

Wahy Juog ucuba yihr nyoge cang.

<sup>c</sup>1:13 Cimoan gihn ngahj kejea yaa Roama ge be daahde umag gene paar Judea.

<sup>d</sup>1:23 Nyinge moogo anahg Jujtuj.

1:14 Luk 23:49    1:18-19 Mat 27:3-8    1:21-22 Luk 1:2; 3:21; 24:51    1:24 Jon 2:24-25    2:3-4 Luk 3:16

2:4 Ubeehn Wahy Juoge uyaahnge gen: 4:31; 6:3, 5; 7:55; 8:17; 10:44; 11:15, 24; 13:9; 15:8; 19:2, 6; Rob kwaad kaa acub Wahy Juoge yihre: 4:31; 10:45-46; 19:6; 1Kor 12:10; 14:2-12    2:7 1:11    2:12 1Kor 14:23

Nyedhoohy kedea nyetheamaahn giihu

lum Juog uteed gene wa mar yaa agamloohngjuog.

Yaa rihj maa ukiihye giihu

Juog lume unyoathe yihr gen yihdh laahg.

<sup>18</sup> Adiehr muon keehd yaa ayiih luma,

cuow kedea maahn teega ucuba yihr gen thioh yi nihn nu

beere giih aroba ge teed gene teedo yihr nyoge

wa mar yaa agamloohngjuog.

<sup>19</sup> Kwaad giih me gaahy nyoge uyuga yey maalo uniid gen.

<sup>20</sup> Wong cahng ke ngude ree uloge udoohnge ne muudho.

E wong dwaahy thioh ree uloge kwaar udoohnge wa remo.

Giuh ni rog gen uyug gene umodho nyum Cahng Duohng

e beehda Cahng Juog, cahng gug piny.

<sup>21</sup> Abea umodho e nyoge me reje ge poohd kaa kihmo,

e Wahy Juog uohra beere

yaa ukahl Wahy Juoge banga kar boadh wahy gen yoad gene yoado.'

Giuh nu ge naa ateed Jooele.

<sup>22</sup> "Wu yaa Yijarael, lihngu giuh teeda. Wa yaa rubo yihru ke dhogu wa daahd ngo udoohngu ne yaa batien Jeacuu.

Ngo ngahyu kejea Juog e naa aohr Jeacuu yihro. Ngo ngahyu thioh kejea Jeacuu abeehno kaa yoohn bang Juog

bang giuh Juog en naa ameehg Jeacuu thiehdh nyoge kedea e naa ameehg ngo tahng nyoge maa thow. Giuh doong ge

gaahy nyoge ge ayug Jeacuu kan yi geen Jeruucallem e ge uneehno yi nyingu. <sup>23</sup> Anahg Juog e naa aohr Jeacuu

bangu maa akweer jo doong Judea keehde kedea ubeehn gene udog gene ngo ke cubo yi cing aleye maa abeehne ne

gur ngahy yaadh maa ariihw ne thoo. Giuh raaj e tiihy gene ngo angahy Juoge bang giuh e naa agwiir ngo coon wa

kaa agweehge. Agweehge kejea Jeacuu uthow ke dhe yoohn nu beere giuh me beer ke yoado. <sup>24</sup> Abea Juog Jeacuu

abeehne ne tahngo naa athowe bang giuh Juog adaahd uduu wahye ree beere ngo be doohng ne maabuuj gihr thoo,

thoo e raaj.

<sup>25</sup> "Luub arob Jeacuu ke nying thone ge anaa agweed Deabide coon yi kitaab Wahy Apoong Juog. Agweed Deabide kea,

'Ngahyo kejea Juog ngad boadh won

ngo utahnge nea athow.

Bang giuh ateed Jeacuu kea

Juog be baahr ke buude.

<sup>26</sup> En naa giuh beehde e cwihnye med

kedea e lwahr tooro ree.

Abeehdo e ngo ngahy Jeacuu kejea keehd me thowe

e ngo umeehg Juoge cahro.

<sup>27</sup> Bang giuh kare tooro umeehg Juoge kuohme tobo yi liel.

Kuohm ngaa maa amag lume ne cohg be weehge kwaahl.

<sup>28</sup> Adiehr muon,

Juog gaahn Jeacuu gaahno

kejea ngo umeehg Juog cahro keehdo

kedea ukedhe ngo Paare ka ubeehd Jeacuu ke mihn cwihny me duohng.'

Ge naa giuh arob Jeacuu ge agweed Deabide yi Wahy Apoong Juog.

<sup>29</sup> "Jo paar wan, adiehr dhiila kaa teedo. Deabid kuowo naa acoon athow ukoanye piny yi ngoom. Liene poohd nud

kan keehd won uwahdhe cahng tihn. <sup>30</sup> Deabid anaa anahg agamloohngjuog naa apoohde e kuow, abeehdo e giuh anaa

arob Juoge yihre ngahye. Anaa arob Juoge kejea, ngad dhe wod paare uyuge ne ruohdh alaam kwaar neehn mar

Deabid. <sup>31</sup> Deabid anaa arubo ke nying giuh utiihy ree wong maalo ke nying cah Ngad Boadh nyoge kejea,

'Jeacuu buu uwii Juog kur nyoge maa athow,

e kuohme buu meehge tobo.'

<sup>32</sup> "Jo paar wan, kaa ya, ngaan atahng Juoge yi thoo beehda Jeacuu. Ateeda yihru kejea Jeacuu ngo acahr, bang giuh

ngo aniid wane ke nying wan batien kaa acahre. <sup>33</sup> Jeacuu bade atihng Juog Wahne maalo maa acube ngo ukwiihye

kedea ucube Wahy Juog yihre wa kaa anaa akobe ngo coon umodho. Giuh niidu ke nyingu kan awaahn ni kedea kwaad

giuh alihngu ke yihdhu thioh, beehda Wahy Juog e naa awuoj Jeacuu wudh wan, e naa meehg wan rob ke dhow

thoohdh. <sup>34</sup> Deabid kuu anaa aci Maalo, abea ngo ateede kejea yi laahg, Juog aniide e urubo yihr Jeacuu kejea,

'Piihi ukwiihya kan,

<sup>35</sup> uyuga yihn ne ruohdh lug yaa wiih ngoom.'

<sup>36</sup> "Yaage, adaahd unghayu ngo beer mee kejea Jeacuu Ruohdh e naa ngaa aohr Juoge ne boadh won kedea

adaahde unghayu ngo kejea giuh me raaj atiihy jo doonge giuh naa anahg gene ngo. Abea Juog kuu atiihyo ke tiihy jo

doonge giuh. Juog Jeacuu acube wiih koom ne ruohdh yaa ungoom." <sup>37</sup> Naa lihng nyoge giuh ni arob Piihtere, e wudh

gen anaa acohd maa apeehty gene Piihter maa jo oohr kejea, "Jo wan lumu alihng wane abea yug wane giuh?"

**2:21** 22:16; Rom 10:13 **2:22** Luk 24:19; Jon 3:2; Tiihy 2:43; 4:30; 5:12-16; 6:8; 14:3; 15:12; 19:11-12; Rom 15:19; Judea 2:4

**2:23** 3:15; 4:28; 7:52; Luk 23:33; 1Th 2:15 **2:24** 3:15; Luk 24:5 **2:27** 13:35 **2:29** Tiihy 13:36 **2:32** 1:8

**2:33** Acube ukwiihye Juog: 2:34; 3:13; 5:30-34; 7:55-56; Mak 16:19; Luk 20:42; 22:69; Rom 8:34; Epi 1:20; Klo 3:1; Judea 8:1; 1Pii 3:22; Muuny

Wahy Juog: 1:4; Jon 14:16-17; 15:26 **2:34-35** Luk 20:42-43; Judea 1:13 **2:36** 3:15 **2:37** 16:30; Luk 3:10, 12, 14

<sup>38</sup> E ngo abeehr Piihtere beehro kea, “Beehn dhaane rahny cwihtye bang anyoohne giihe naa atiihye beere piih luogwahy ke cubo yihre udoohnge ne ngad Jeacuu Ngad Boadh nyoge. Arumo e anyoohne giihe cang ge wii Juoge ke piny yihre. E thiw beere muuny Juog ge beehda Wahy Juog yoade yoado. <sup>39</sup> Juog coon umodho anaa arubo kejea Wahy Juog ucube yihr yaa acuohne bange. Juog awaahn ni, wu acuohne kejea beehnu bange, wun maa nyethenu kede a keehd yaa beed wudh geedh bahye.”

<sup>40</sup> Kaano arumo, e Piihter giih me thoohdh ge arobe yihr nyoge ke nying Jeacuu. Ateede kejea Jeacuu e naa Ngad Boadh nyoge. Batiene e ngo arubo thiw yihr gen teeg mee kejea tiihy gene kaa lum Jeacuu. Noono maa agooye wudh luube piny kea, “Konyu rogu ubahnge gihn me raaj wu be yoade neehn mar yaa tiihy giih anyoohne.” <sup>41</sup> Nyoge me thoohdh lum Piihter abeehn gene ne yiiho, noono maa acub piih luogwahy yihr gen. Cahng nu nyoge alihbe adahg wudh gen awuoj piih luogwahy.

### Yaa Ayiiho Ge Ake Nywaah Ke Rog Gen

<sup>42</sup> Ubeehd gene beehdo e ge puohny jo oohre puohnyo maa e ge ubeehdo beer mee ke rog gen ke nywaag amono wa kaa anyoadh Jeacuu ngo yihr gen maa ne cong wudh gen ka maa acielo ne kway Juog.

<sup>43</sup> Yihd nihh nu, jo oohr nyoge na thiehdh gene thiehdho kede a kwaad giih mooge maa agaahy nyoge ge na tiihy gene tiihyo. Ke nying gihn nu e Judea mooge ge adoohng e jo waahdh Jeacuu ge be dhahl gene. <sup>44</sup> Yaa ayiiho cang ge na ubeehdo tiehd maa giih ne yihr gen ge na nywaag gene nywaago. <sup>45</sup> Noono nyoge mooge kiin gen giih anaa yihr gen, ge na ngeew gene ke oogo upaahng gene ngiihny ke rog gen ubeehn dhaane ukaabe ke nye kar mare naa adaag yihre. <sup>46</sup> Noono ubeehde e ge uroohmo ke nying nihh yi diih laaro mar Wod Juog gihr Jeruucalem. Kede a ke nywaag amono tiehd ke bang yihd miehy gen ke mihn cwihtny yi koohdh gen. <sup>47</sup> Thiw e ge ubeehdo e ge muohj koohr Juog maa nyoge cwihtny gen med rog gen thiw. Wa maano e nyoge me thoohdh maa ayiiho ge mahd bang gen ke nying nihh.

### Piihter Ngaa Me Tiene Abaahl Ameehge Waahdh

**3** <sup>1</sup> Cahng man e cahng alaaahngo kar caang kwaj, Piihter kede a Joon ge anaa acaa yi laaro gihr Wod Juog gihr Jeruucalem. <sup>2</sup> Naa awahn gene buud Wod Juog e dhaano maa anyuol e tiene adwaany aniid gene niido dhe baab oaj me ne yi dwaar, e ngo apiih. Anahg kare me na kwaaye kaa cub yea beere ngo ukwahyo yihr yaa beehn yi laaro gihr Wod Juog Jeruucalem. <sup>3</sup> Naa aniide Piihter maa Joon e ge caa yi laaro gihr Wod Juog, e cinge athaange thaango yihr gen e kwaj gen. <sup>4</sup> Maa atal nying gene ne maany nyin, noono maa akoohb Piihtere yihre kejea, “Luu wongi bang wan.” <sup>5</sup> E nyin wonge aloge ke bang gen ne maany gihn ucub gene yihre.

<sup>6</sup> Maa acahg Piihtere rob yihre, “Ngiihny me cuba yihri tooro. Abea gihn nud yihra ucuba yihri. Ke teeg Jeacuu Kriihjto, ateeda yihri kejea aj maalo ucaahdhi.” <sup>7</sup> Umag Piihtere bad kwiihye ukonye ngo ke yedh maalo wudh tiene. Ke wong kaano e tiene naa anaa abaahl ge ake doohng teeg rome waahdh. <sup>8</sup> Noono ucuunge wudh tiene ne cohg kede a uthube thubo ke waahdh. Ucidhe yi laaro gihr Wod Juog keehd gen e ngo muohj koohr Juog kede a caahdh kaa waahdh ngaa me cwihtny med. <sup>9</sup> Amahr yaa anudo nyin aniid gene e ngo ucaahdho e ngo muohj koohr Juog. <sup>10</sup> Naa angey gene ngo kejea beehda nyin na piih dhe baab, e ge ake gaahy kede a uriihr wudh gene yi kwaad gihn ayug ree rih nyin.

### Kob Piihtere, “Teeg Jeacuu E Naa Athiehdh Dhaano”

<sup>11</sup> E nyin angeehr batien Piihter maa Joon ucidhe ke gen kar Aar Caloamon ka kwahy yaa yiihoe yea. <sup>12</sup> Naa aniid nyoge gen, e ge ake gaahy keraahyo maa agoohd gene kaa amahd yaa ayiihoe yea e thaahdh gen teeng gene teengo. <sup>13</sup> Naa aniid Piihtere nyoge e ake thubo ke rob yihr gen kea, “Jo wan, wa wu agaahy yi gihn atiihy ree ni! Gihn e ne tal nyingu ne maany wan! Nea maru e ngahdu kejea beehda wan cog wa naa athiehdh ngaan anaa abaahle ne! Ka moogo thiw wudhu aparu kejea tee ayoad wane ke nying gihn nahg wane nyoge maa acub rog wan yihr Juog ne! <sup>14</sup> Adiehy yi gihn atiihy ree e man: padh wan, wa naa athiehdh nyin. Ngaa athiehdh ngo beehda Jeacuu ke ngude. Ngo athiehdh bang gihn Juog, ge kuow, <sup>15</sup> bad Waahde atihnge maalo naa acube teeg tiihy giih me gaahy nyoge yihre. Abea jo doong Judea ge akweer ke Waahd Juog maa apahdh gene rih ngo uteel gene ngo nyum Paantuj Pilaato ruohdh. Naa akoohb Pilaate kea Jeacuu lonye lonyo bang gihn awuohj maa ayoad rih ngo tooro, e lum Pilaato amaan gene kob gene Jeacuu be daahd gene. <sup>16</sup> Jo doonge ge adaahd ubeehn Pilaate unahge Jeacuu! Jeacuu ge Juog ke ngude e naa aohr ngo ni! Ngaa me kihd awuohj maa atiihye tooro! Naa akoohb Pilaate kea Jeacuu lunye ke oogo, e ge ake kweer kob gene nahge ke Jeacuu e ne nahg abea ngaa me raaj maa anahg dhaano e ne lony Pilaate oogo. <sup>17</sup> Beehda jo doonge giihu ge naa anahg ngaan nyoadh dhe yoohn kuowo yihr nyoge. Abea Juog kuu atiihyo ke kwaad tiihy gen noono. Ngo ameehg Juoge cahro naa athowe. Wa naa cuude giih aniid Jeacuu ke nying wan batien kaa acahre. <sup>18</sup> Lum teed wane yihru e aman: nyin ni, beehda Jeacuu e naa athiehdh ngo.

<sup>19</sup> “Jo wan, gihn atiihyu naa anahgu Jeacuu gihn ni yea ngo kwiihyu. Abea jo doonge giihu nahg Jeacuu anaa acub gene yi cwihtny gen. <sup>20</sup> Juog coon umodho ngo anaa ateede yihr yaa agamloohngjuog kejea, ‘Ngad Boadh nyoge udhiil thoo.’ E naa kaa abeehn lum Juog upahdhe kare wa kaa adaahde. <sup>21</sup> Jo paar wan, nea neehn maano e kea maanu anyoohne giihu naa ayugu maa yiihu ngo kejea Jeacuu e naa ngaa aohr Juoge. Noono e anyoohne giihu ge uwii Juoge piny yihru. <sup>22</sup> Wa gihn nu e kaa ugwiiru rogu ne koar beehn Jeacuu Kriihjto. Ngo uduu bang gihn e naa ngaa akwany Juoge coon ne Ngad Boadh wun. <sup>23</sup> Jeacuu dhiil beehdo Maalo kun ca, uwahdhe yi cahng ubeehn nyepinye

<sup>3:11</sup> Yaa ayiiho ge ne kwahyo ke kaa nyinge Aar Caloamon.

<sup>3:13</sup> Piihter naa arube ke dhog Judea e ngo ake rubo ke nying Juog gihn wuor ge kuow gene ge cuohn naa Abraahm maa Yijaag kede a Jeakob kede a ge kuow gen mooge thiw.

**2:38** 3:19; Luk 3:3    **2:39** Epi 2:17    **2:41** 2:47; 4:4; 5:14; 6:1, 7; 8:4; 11:21, 24; 12:24; 13:49; 16:5; 19:20; 21:20; 2Th 3:1

**2:44-45** 4:32-35    **2:46** Luk 24:53    **2:47** 2:41    **3:1** 10:3, 9, 30    **3:2** 14:8    **3:8** 14:10; Jon 5:14    **3:11** 5:12; Jon 10:23

**3:13** 2:33; 7:32; Luk 23:13-23    **3:15** 2:23-24; 4:10; 5:30-31; 10:39-40; 13:30; 17:31; Judea 2:10    **3:16** Mat 9:22

**3:17** Luk 23:34; 1Tim 1:13    **3:18** 5:42; Luk 24:27, 44-46    **3:19** 2:38

cang uduog Jeacuu gen kar gen ne dug, wa kaa anaa ateede ngo coon keehd leehb yaa agamloohngjuog. <sup>22</sup> Moaje anaa arubo thiw kejea,

‘Juog ge Ruohdhu ni,

ngad paaru uohre naa agamloohngjuog wa kaa aohre an.

Dhiilu luub urobe yihru ke lihngo.

<sup>23</sup> Kwaad ngaan ukweer ke yihih lume

ukoy oogo kiin yaa Juog urwaahny wonge.’

<sup>24</sup> Ngahda yaa agamloohngjuog cang uwahdhe Camweel maa yaa abeehno ke batiene ge anaa arubo kaa nying beehn Jeacuu ge beehne ne boadh won ne? Dhiilu lum gen ke lihngo.

<sup>25</sup> “Yaage kaa ya, beehda gihru ngudu awaahn ni, uyiihu lum Juog bahng gihn gihih ateed Juoge yihru yaa agamloohngjuog ge ngahyu kedea bang gihn anahg yaa tien paaru ge naa amad lubo ke Juog. Paru wudhu yi gihn anaa arob Juoge yihru Abraahm naa akoohbe kea,

‘Nyoge cang ne dug ungoom kan

ge udooja kaa dhe yoohn kwaayi.’

<sup>26</sup> En naa kaa abeehn Juoge ukwanye ngaa na tiihyo yihre noono maa aohre ngo yihru umodho ne dooj wun nea kwaad dhaano gihih anyoohne ge wiie wiio.”

### Piihter maa Joon Ge Akedh Nyum Jo Doonge

**4** <sup>1-2</sup> Kaano arub ge Piihter maa Joone yihru nyoge, e yaa lam gihih kweehr gihih nyoge yihru Juog ge abeehn bang gen. Ge abeehno e ge caahdh kaa Caaducean<sup>9</sup> kedea kapten gihru acaakere gihih Wod Juog beer ge Piihter ge kwahng gene ke piny. Cwihny gen arahnyo rog jo oohr bang gihn ge urubo yihru nyoge kejea, “Jeacuu acahr adiehr muon.” <sup>3</sup> Maa abeehn gene umag gene Piihter maa Joon unyoal gen yi karkoohn uwahdhe kaa aniihn gene yi ngo bang gihn cahng anaa yuudho. <sup>4</sup> Abea keehd maano amag gen nu e nyoge me thoohdh luub Piihter naa arobe, ge alihng gene beer mee maa ayiih gene lum Juog. Noono udoohng akuud cuowe naa ayiiho ne kar nyoge alihbe abiihj.

<sup>5-6</sup> Ruuwow e Anaj kedea Kaappaj, ge beehda jo doong yaa lam, wihih amaad gihru Akuud Judea<sup>h</sup> ngo ayab gene.

Joon maa Alekjander ge anudo thiw. Ge anaa anahg jo doong yaa lam coon. Waahd Kaappaj maa Joon kedea Alekjander ge anudo. <sup>7</sup> Maa akahl Piihter maa Joon nyum gen maa peehny gen duug naa, “Wun! Kobu wu naa athiehdh nyin abaahl ne! Kobu dhaano nud maa acub tee me thiehdh nyoge yihru! Beehda ngaa e naa arom tee nu ke cubo yihru?”

<sup>8</sup> Gihn nu arumo e Piihter dhog gen abeehre beehro beer mee ke nying tee gihn acub Wahy Juoge yihre kea, “Wu ruohdhe kedea wu jo doong paajo <sup>9</sup> ngahda wa peehnyu kaa nying kwaad gihn beer atiihy ree rih nyin tiene abaahl ni kedea ke dhe yoohn athiehdh wane ngo kii ngo? <sup>10</sup> Nea wa peehnyu kaa nying gihih nu e kea beeh teeda ngo yihru kejea, nyin athiehdh kaa tee maa abeehno kaa bang Jeacuu Kriihjto! Cwihnya ne bange unghayu ngo wu yaa Yijarael ke karu cang kejea nyin beehda Jeacuu e naa athiehdh ngo. Wu jo doong paar wan, Jeacuu Kriihjto ngad Naajaread ngo kuu anaa anhyaaru ne weey weey, ubaru maalo ke tiihy gihn me raaj ree naa aguru ngo ngahy yaadh maa ariihw ne thoo. Abea Jeacuu kuu awii Juoge yi thoo wa kar cwihnyu. Teeda teedo yihru ke lubo maa athiir kejea Juog Jeacuu ameehge cahro ukuowe batien kaa athowe.

<sup>11</sup> E naa kaaw gihn akweer yaa geere keehde e naa adoohng ne meehn wod.

<sup>12</sup> “E thiw yaa beed bang upiny kan cang boadh wahy gen yoad gene kaa nyinge, bang gihn ngaa moogo me nud tooro maa acub Juoge piny ne Ngad Boadh nyoge.”

<sup>13</sup> Naa aboar yaa akuud Judea Piihter maa Joon beer mee e ngo aniid gene niido kejea ge rubo e lwahr tooro rog gen. Gihn nu e ge ake cwaahng. Abeehdo e ngo ngahy gene kejea Piihter maa Joon ge nyoge me kuu angiiho ke rob nyum nyoge. Abea anaa angahy gene thiw kejea Piihter maa Joon puohny lum Jeacuu ngo acub gene yi cwihny gen ne cohg. <sup>14</sup> Yaa akuud ge anaa adaahd ukim gene ge Piihter ke gihn me raaj beere ge be dog rob ke nying tee gihru Jeacuu. Abea angahy gene kejea ngaa athiehdh nud kedea uneehno yihru nyoge maa angahy nyoge thiw kejea tee gihru Jeacuu e naa athiehdh ngo. <sup>15</sup> Kaano e ngo arob gene kejea beehn yaa ni ci gene oogo udoohng gene ne gweehg ke rog gen. <sup>16-17</sup> Maa aroam gene cwihny gen kejea, “Ngo be daahdo ubeehn rob ke nying Jeacuu unyaaye ke kiin nyoge. Abea ne cohg gihn e ne rom ree ke tiihyo yihro! Gihn e nuu mahn yaa ni ubahng nyoge be puohny gene ke nying Jeacuu! Kedea beehda ngaa noono e nuu urom ngo ke yiho yihro kejea yaa ni yihru gen tooro teeg Jeacuu! Ngaa e ne kwihj ngo kejea dhaano athiehdh gene! Nea neehn maano kea ciero ngo yihru gen teeg mee kejea ge keá cahg rob keehdo ke nying Jeacuu.”

<sup>18</sup> Naa athum gene ke gweehg e Piihter ge ke Joon ge acahg gene kaa cuohno maa teed gene ngo yihru gen kejea, “Keá cahgu ke tumo keehdo kejea wu upuohnyo maa wu urubo ke nying Jeacuu.” <sup>19</sup> Maa abeehr Piihtere maa Joone ngo yihru gen, “Wu ne rob gihn athiir nyum Juog yihru wan: lihng wane lum maru ubahng lum Juog be lihng wane ne? <sup>20</sup> Kare tooro yihru wan ubahng wa be rubo ke nying kwaad gihih aniid wane ke nying wan kedea kwaad gihih alihng wane ke yihdh wan.”

<sup>9</sup>4:1-2 Yaa lam gihih kweehr gihih puohny Caaducean ge ne yihih gene yiho. Caaducean kob gene kejea kare tooro yihru ngaa maa athow udoge cahro keehdo. E naa gihn maan gene rob kejea Jeacuu ngo acahr.

<sup>h</sup>4:5-6 Akuud Judea yea anaa nyoge 70. Nyoge mooge kiin gen ge Judea me beed wudh geedhe mooge, nyoge mooge kiin gen ge Judea me ngahy kwaan yihdh loohng Moaje.

3:22-23 Tiihy 7:37 3:24 3:18 3:25 Gal 3:8, 16 3:26 13:46; 18:6; Rom 1:16 4:1-2 Caaducean: 5:17; 23:8; Luk 20:27

4:1 Luk 22:4, 52 4:2 Cahro: 2:24; 4:33; 17:18; 26:23 4:3 5:18 4:4 2:41 4:7 Luk 20:2 4:8 2:4 4:10 3:6, 15

4:11 Luk 20:17; 1Pii 2:4-7 4:12 Mat 1:21; 1Kor 3:11 4:15 5:34-35 4:16 Jon 11:47 4:17-19 5:28-29, 40

<sup>21</sup> Kob yaa akuude yihr Piihter maa Joon naa lony gen, “Awaahn, wu alony wane. Abea ne dog wane wun ke maa e wu urubo ke nying ngadu noono, e gihn nii ngo uniidu!” Yaa akuud ngo angahy gene kejea nyoge cwihny ge amihno maa ge apiih ne wuor Juog bang gihn aniid gene nyin e ngo athiehdh beer mee. <sup>22</sup> Thiw nyoge cwihny gen amihno upuoj gene Juog bang gihn nyin athiehdh anahg ngaa me duohng me rune jiehariow ubar wonge.

### Yaa Ayiiho Ge Daahd Teeg Aduulo Bang Juog

<sup>23</sup> Batien kaa alony Piihter ge ke Joon e ge adog bang yaa gen, uteed gene gihn arob yaa akuude yihr gen <sup>24</sup> Kaa alihng jo yiihoe giih arob Piihtere maa Joon, e ge apiih ne kway Juog ke cwihny gen acielo kob gene, “Juog Ruohdh, teegi e ne kaal wudh giih nyepinye cang, bang gihn yih naa acag maalo ke piny maa nahme kedea giih ne yihdh gen cang. <sup>25</sup> Wa e niidi kan ni wa ne yi gihn me teeg bang gihn yaa akuud ge daahd upuohd gene wan. Gihn teeg e yoad wan ngo uroomo ke gihn teeg ge anaa ayoad ngadi Deabid ge beehda kuow wan me duohng. Lume naa arobe ngo ngahyi naa akoohbe kea,

‘Amahr tien paajo cwihny gen arahnyo rih Juog  
kedea ge daahd umaahd gene ngo.

Ngahda ge nyoge me wudh gen tooro ne cohg!

<sup>26</sup> Ngo apar amahr ruohdhe giih tien paajo  
kejea Juog rom gene kaa taayo yi liny.  
Ge daahd unahg gene Ngad Boadh nyoge.’

<sup>27</sup> E naa gihn koohb wane kejea gihn ayoad wane wa gihn arob Deabide. Bang gihn, gihn arob Deabide ngo anaa apahdh kare yi geen Jeruucalem naa abeehn Eroade ruohdh maa Pilaato ubeehn gene keehd acaakere ne mag Jeacuu. <sup>28</sup> Yaa akuud ge adaahd unahg gene Jeacuu ne daahd dhe yooon liny ke yihn. Abea keehd maano atiihy gene gihn nu raaj nu, e ngo anahg yihn naa agwiir ngo wa gihn nu coon beere gihn daahdi yug gene yugo. <sup>29</sup> Juog beehn ne kony wan. Giih reje ge daahd yaa akuude ke tiihyo rog wan, nea wa urubo ke nying Jeacuu, ge ngahyi. Wa beehda yaa maa aohri, cub teeg aduulo yihr wan beere wa urubo e lwahr tooro rog wan. <sup>30</sup> Cub tee yihr wan uthiehdh wane nyoge kedea cub ngo yihr wan beere kwaad giih ni teeg ge gaahy nyoge rog ge yug gene yugo beere ngo ngahy nyoge ngahyo kejea yih naa akwany Jeacuu.”

<sup>31</sup> Naa athum gene ke kway Juog arumo e kaa anaa apiih gene yea ni ree ayahnge yahngo une piny med medi upahng koohm gene keehd Wahy Juog. Noono e ge ake thubo ke puohny lum Juog keehd teeg cwihny, e lwahr tooro rog gen.

### Yaa Ayiiho Ge Beehdo Kaa Nywaahg Ke Rog Gen

<sup>32</sup> Jo yiiho cang ge abeehdo e rog gen nhyaar gene nhyaro. Maa ge abeehdo e ge nyoge me lum gen acielo. Keehd maa anahg gene amahr nyoge, e ngaa maa ngad wahro me cwihnye diiw atooro. Bekiid ngaa me rubo kea, “Giih ne yihra ge beehda giiha a keeda.” Bang gihn kwaad giih gen naa anudo yihr gen ge na nywaag gene nywaago ke rog gen. <sup>33</sup> Noono e jo oohr ge adoohng ne nyoge me teed ngo kejea, “Jeacuu anaa acahr naa athowe.” Maa abeehn Juoge thiw maa adooje gen cang keter. <sup>34</sup> Gihn maa acahg daag yihr gen atooro. Bang gihn kwaad yaa yihr gen anaa giih nyepinye ni, keehd wuude ge na ngeew gene ke oogo ukahl gene ngiihny kahlo yihr jo oohr giih Jeacuu. <sup>35</sup> Noono upaahng jo oohre ngiihny paahngo yihr nyoge cang, e ngaa man kaab nye kaa adaag yihre.

### Barnaba Ngiihny Acube Yihr Jo oohr

<sup>36</sup> Dhaano acielo anudo me nyinge Jocebe<sup>1</sup> ngad dhe wod Leabi. Tiene aay ke dom Caaypruj. <sup>37</sup> E Barnaba puohdh mare ke ngude angeewe oogo maa ayoad ngiihny ayoad ucube gen yihr jo oohr.

### Dhaano Ge Ke Ciihe Giih Waal Adog Rog Gen

**5** <sup>1</sup> Nyin moogo anaa anudo me nyinge Anaanya maa ciihe Capiira. Naa aniid gene nyoge mooge e giih gen ngeew gene ke oogo ne kahl ngiihny yihr jo oohr, e puohdh gen angeew gene oogo thiw. <sup>2</sup> Goan ngiihny mooge akan Anaanya e ngo ngahy ciihe. Naa abeehne ne cub ngiihny e akobe kobo yihr jo oohr kea, “Puohdha angeewa oogo. Ngiihny ni ge naa ayoad cog naa angeewa puohdho oogo. Kaabu gen ne kony nyoge.”

<sup>3</sup> Naa alihng Piihtere rob Anaanya e ake rubo yihre kobe, “Anaanya! Yih ngad toohd! Gihn e meehgi rihi dwaahngo yihr atiihb ukeehg adhaahr urobi toohd nyum Wahy Juog? Nea yihn kii kwihj Wahy Juoge e goan ngiihny ge akani!

<sup>4</sup> E anaa apoohde puohdho kii ngeew oogo ngahda puohdho anahg gihri ne? E thiw naa angeewi ngo oogo ngahda ngiihny ayoadi ge anahg giihi? Awuoj gihn atiihyi beehda gihn apari ngo kejea Juog romi kaa waalo wa mar dhaano utaahngo me neehn wan!” <sup>5</sup> Nye kaa alihng Anaanya e gihn arob Piihtere e ngo ake pahdho ne wad uthowe. Yaa aniid gihn atiihy ree ge atud yi tiihy Juog. <sup>6</sup> Noono ubeehn yaa rihje ubahj gene kuohm Anaanya keehd waaro ukedh gene ngo ne koanyo.

<sup>7</sup> Batien caae adahg e ciih Anaanya acaa ne beehno, abea e gihn ayug ree anaa akwihye. <sup>8</sup> Maa apeechny Piihtere ngo kobe, “Capiire, teed gihn maa athiir yihra ne cohg. Beehda ngiihny ni ge naa ngiihny ayoadu naa angeewu puohdho oogo?” Maa abeehr Capiire ngo kobe, “Ayiih, ge naa kar gen noono cang.”

<sup>9</sup> Kaano e Piihter acahg rob yihre kobe, “Gihn ne cohg uyoadu Wahy Juog upelu yea wu ke cuori? Yaa rihj naa anaa aci ne koany cuori ge aman aduuo. Yih kedh gene ke ne koanyo awaahn ni thiw!”

<sup>10</sup> Ke wong kaano e ngo anaa buohb piny ke pahdho nyum Piihter, abea e naa thone noono. Ucahg yaa rihj giih atudo ngo kaa tihngo ne koanyo buud cuore. <sup>11</sup> Naa alihng gihn atiihy ree, e deeh lwahr me duohng ke nying gihn ayug Juoge ngo apahdh rog nyoge cang, yaa ayiiho kedea nyoge me padh yaa ayiiho.

<sup>4:36</sup> Jo oohr nying tuod Jocebe acag gene ne Barnaba. Lum yea kejea ngaa me ciihm cwihny nyoge.

**4:27** Ruohdh Eroade: Luk 23:7-11; Pilaato: Luk 23:1      **4:28** 2:23      **4:29** Epi 6:19      **4:30** 2:22      **4:31** 2:4

**4:32-35** 2:44-45; 6:1; Luk 14:33; 18:22      **5:2** 4:35      **5:3** Jon 13:2      **5:9** 1Kor 10:9

### Nyoge Me thoohdh Ayiiho Ke Nying Giih Teeg Naa Ayug

<sup>12-14</sup> Yihdh nihn nu e yaa ayiiho cang ge na kwaay mahdo ka maa acielo yi Aar Caloamon kar kwaj gih gen. Yihdh nihn nu thiw e jo oohr kwaad giih mooge me thoohdh me gaahy nyoge ge na tiihy gene tiihyo. Jo oohr keehd me na puoj nyoge gen, e bekihd ngaa me tahr ngo ke toohd kea e beehda ngad gen. Noono unahge ke ngaa ayiih lum Jeacuu e ne mad gene bang gen. E naa kaa abeehn cuow maa maahn me thoohdh udoohng gene ne yaa ayiiho yihdh nihn nu thiw. E jo oohr kwaad giih mooge me thoohdh me gaahy nyoge ge na tiihy gene tiihyo. <sup>15</sup> Bang gihn jo oohr giih me gaahy nyoge na yug gene yugo, e naa gihn abeehn nyoge ukahl gene yaa atwaany dhog yiehdhe ne piehl piny. Nyoge apiehl yihdh yiehdhe beere nea Piihter ukahnho ke kaa ngo e tube ucidho ke wudh yaa atwaany. <sup>16</sup> Nyoge me thoohdh me beed ka me cahng ke geen Jeruucalem ge anuno e ge bien nyoge maa atwaany kedea e ge piej yaa rog gen anaa atiihb ukeehg. Jo nu cang ge athiehdh.

### Wuohnjuog Jo Oohr Ge Alonye Oogo Yi Karkoohn

<sup>17</sup> Kaaypaj kedea yaae ge cuohn ne Caaducean cwihny gen arahnyo ke nying gihn abeehn nyoge me thoohdh uyiih gene puohny jo oohr. <sup>18</sup> Noono umag gene jo aohr ukedh gene gen yi karkoohn kar nyoge maa now. <sup>19</sup> Abea yi diehr waahr, e wuohnjuog dhog wuude giih karkoohn ayabe ukoole jo oohr naa amag oogo. Maa arube yih gen, <sup>20</sup> "Cidhu yi laaro gih Wod Juog ubaru maalo ke puohny wa kwaad kaa acoon. Rubu ke nying Jeacuu ngaa cub kuowo me guge tooro yih nyoge."

### Jo oohr Ge Apuohd Ke Nying Giih Puohny Gene

<sup>21</sup> Lum wuohnjuog ayiih jo oohre. Ke nyango coon e ge acaa yi laaro ne puohny nyoge.

Kaaypaj maa yaae, jo doong Judea yaa akuud ge acuohn gene beere ge umahdo. Batiene e lubo arob kejea kahl jo oohr nyum gen. <sup>22</sup> Abea naa awahn acaakere giih aohr yi karkoohn e jo oohr ge kuu ayoad gene. Noono udog gene ne teed gihn atiihy ree kob gene, <sup>23</sup> "Naa acidh wane, e dhog wuud karkoohn cang ge ayuud wane e ge atoag ne dihg dihg kedea yaa koar ge ayoad wane ke kuohn gen. Abea naa ayab wane dhog wuude, e gahng ke dhaano acielo kiin jo oohr maa ayoad wane." <sup>24</sup> Naa alihng jo doong yaa lame ngo e wudh ge anaa cohnd ke gihn atiihy ree. Kapten ge wiihe ne karkoohn ngo agaahy thiw ke kaa a'aay jo oohre kii ngo.

<sup>25</sup> Nye wong kaano e naa arub dhaano mooge yih gen kobe, "Yaa anaa amagu ne waahro, ge anaa akedhu yi karkoohn, ge ne cuudi puohny nyoge yi laaro ke kwaad giih gen noono." <sup>26</sup> Kaano e kapten ake cidho keehd acaakere ne kahl jo oohr nyum jo doonge. Ge akahl gene e cingo kuu ajag rog gen, bang gihn kapten ngo atud ke wahye maa wahy acaakere giihe ka moogo e ge maahd nyoge maahdo.

<sup>27</sup> Naa akahl gen ne cuungo nyum yaa akuud, e ge apeechny Kaaypaje kea, <sup>28</sup> "Ngahda anaa amahn wane yihru kejea wu keá cahg puohny ke nying Jeacuu? Awaahn ni yi geen Jeruucalem ngo amoru ke puohny gihru kedea ngo akedhu yi wudh nyoge kejea rem Jeacuu naa yi cing wan!"

<sup>29</sup> Batiene e Piihter arubo ne jaahy giih arob rog gen kobe, "Jo doonge, adiehr muon ateedu yih wan kejea wii wane puohny lum Juog. Abea ateed Juoge yih wan kea puohny wane lume. Nea maru, e lum ngaa e ne tiih! Lumu wale lum Juog? Nea mar wan e lum Juog e ne tiihy wane keehde abea padh lum dhaano utahng. <sup>30</sup> Anahg wun naa anaa amag Jeacuu uguru ngo ngahy yaadh maa ariihw. Wu naa anahg ngo. Abea Juog e naa anaa atahng ngo naa athowe. <sup>31</sup> Wiihe atihng Juoge maalo ucube ngo ukwiihye ne ruohdh me e ne boadh nyoge, beere wo yaa Yijarael dhe yooh yoado yoado me maano anyoohne giiho. Noono e Juog anyoohne giiho ge wii ke piny yihro. <sup>32</sup> Giih nu ge aniid wane ke nying wan kedea uthub wane ke teed gen yih nyoge. Juog thiw Wahy Juog awuowe wudh wan ne muoj wan ke tee me thiehdh nyoge bang lum Juog ayiih wane. Tee ngo aay ke bang Juog ke ngude. Nea neehn maano kea dhiilu lum Juog ke yiiho."

<sup>33</sup> Naa alihng yaa akuude lum arob Piihtere e cwihny gen ake rahnyo ne cohng ukoohb gene kejea nahg jo oohr.

<sup>34</sup> Abea dhaano acielo kiin gen me nyinge Gamaliel a'aj maalo. Ngo anahg ngad Paarijea kedea anahg ngad puohny loohng Moaje. Gamaliel anahg ngaa me lume ke wuro. Gamaliel a'aj maalo maa arobe ngo kejea meehg jo oohr ci oogo beere ngo urubo. Naa aci gene oogo <sup>35</sup> e ake thubo ke rob kobe, "Wu ruohdhe maa yaa Yijarael, coaru wudhu beer mee, e gihn daahdu ke tiihyo puud kuu atiihyu. <sup>36</sup> Yi run maa abar nyin me nyinge Thoada j anaa apaahr maalo kea e ngaa moogo me teeg. Nyoge kar jiehahiihje angween rog gen anaa ayug gene ne yaa batiene. Abea naa abeehne ne naah e yaa batiene ge akeedho cang utoor gihn maa acahg ke lihng ke nyinge. <sup>37</sup> Batiene Thoada j, e ngaa moogo adog tuohl me nyinge Juudo ngad dom Gaalili. Nyin anaa atuohl yi wong anaa ayug akweehn gih nyoge. Yihre anaa nyoge thiw maa yaa batiene. Abea naa anahge e yaa batiene ge akeedho. <sup>38</sup> Abea yi gihn nahgo yea awaahn ni, teeda teedo yihru kejea wiiu gen uaay gene. Bang gihn nea gih gen noon ni tahr gene beehda tiihy ngaan cuohn ne Jeacuu e gih nyinge utooro. <sup>39</sup> Abea nea beehda tiihy Juog e ngo buu urom ree ke leehwo yihru. Adhaahr e rogu e nuu uyoadu e wu keehg kaa Juog."

Kaano e lum Gamaliel alihng gene abea padh ke cwihny gen cang. <sup>40</sup> Noono e ngo amad gene kejea puohd jo oohr abea gihn maa arob ke nying naahg tooro. Kaano e jo oohr ge adog ke cuohn maa apuohd gen kedea urobe yih gen kejea ge keá cahg puohny ke nying Jeacuu keehdo. Batiene e ge ake lonyo. <sup>41</sup> Naa a'aay jo oohre kar amaad e ge a'aay e cwihny gen amihno. Cwihny gen amihno bang gihn ge aniid Juoge ne nyoge me rom giih ajohr ke guumo ke nying Jeacuu. <sup>42</sup> Noono arumo ubar gene ke maalo ke puohny nying Jeacuu ge Ngad Boadh nyoge, ke nying nihn ke bang yihdh miehr maa yi laaro gih Wod Juog.

### Nyoge Me Kony Jo oohr Ge Akwany

**6**<sup>1</sup> Yi nihn nu, e nyoge me thoohdh mee ge adoohng ne yaa yiiho. Noono e caame ge na paahng jo oohre paahngo yihre gule giijh anudo. Kaano e lubo ake thubo ne moar moar ke piny. Judea giijh rubo ke dhog Griihge kiin yaa ayiiho ge ake ngoan kejea gule giijh gen giijh agunyo ke yugo rog gen. Kob gene yi paahng caame e gule giijh gen muoj kaa giijh me noog abea gule giijh Judea ge abeed Jeruucalem muu gen ge ke cubo beer mee. <sup>2</sup> Gihn nu arumo e jo oohr, amaad abeehn gene ne yugo keehd yaa yiiho cang. Maa arub gene kejea, “Yaage yihdh nihn ni, gule me thoohdh yihre gen tooro gihn me cam gene. Tiihy wane gihn? Wii wane puohny lum Jeacuu kedea unahge caame ge ne paahng wane ne! Ree be rome yugo wa gihn nu. Ngweehn ubar wane maalo ke yug tiihj gihn acub Jeacuu yihre wan. <sup>3</sup> Nea neehn maano e wa daahd ngo ukwahnyu ke nyoge kiin nu. Nyoge me ne cohng me beey yi paajo kedea me ngahy yihdh luube beer mee maa me ngahj kejea Wahy Juog ne rog gen. Kwanyu nyoge abiihberiw beere tiihy paahng caame cub wane kii cing gen. <sup>4</sup> Kedea beere wudh wan cub wane ke ne kway Juog kedea tiihy puohny lum Juog yihre nyoge.”

<sup>5</sup> Yaa yiiho cwiiny gen amihno bang lum ni arob jo oohre. Noono ukwany gene nyoge abiihberiw. Yijtepen anaa kiin yaa abeehn ne kwanyo. Ngo anahg ngaa maa ayiih lum Juog ke cwiinye acielo kedea ree apahng ke Wahy Juog. Thiow maa akwany gene nyoge me ne cohng me wa Yijtepen. Yaa akwany nying gen anahg Pihlihb maa Prokoruj kedea Nihkanoara, Timon, Paarmenaj kedea Nikoala maa adoohng ne ngad Judea ke dhe yoohn wuor Juog. <sup>6</sup> Batiene e ge akahl nyum jo oohr ukway Juog ke nying gen, batiene e cing apiehl wudh gen ne cub gen yi tiihy akwany gen ke nyinge.

<sup>7</sup> E naa kaa abeehn lum Juoge unyaaye kii ngo naa ayiih nyoge me thoohdhe kedea e naa kaa ajwag yaa yiihoe rog gen kii ngo noono. Thiow nyoge mooge kiin yaa lam nyum nyoge yihre Juog Jeacuu abeehn gene ne yiiho.

### Yijtepen Amag Ke Nying Kaa Puohnye Kii Ngo

<sup>8</sup> Yijtepen anahg ngaa me yihre anaa muuny Juog ne cohng kedea Juog teeg tiihy giijh me gaahy nyoge ngo acube yihre. Noono e giijh me doonge me gaahy nyoge ge na tiihye tiihyo <sup>9</sup> Abea Judea maa amag lum Juog ke dhe yoohn Moaje ge akweer ke yiih giijh puohnye kejea ge giijh toohd. Noono ge na ubuohj ke peehm keehd Yijtepen e ge piem giijh puohnye. Yijtepen na koag ke puohny kuohn me thoohdh e upeehmo ke gen. <sup>10</sup> Abea Wahy Juog teeg wong kedea ngahy teed yihdh luube ge acube yihre Yijtepen. Noono e kar piem luube yaa ni ariehnye.<sup>j</sup>

<sup>11</sup> Keehd maa ataay Yijtepene gen ke luube, e kihde now, batiene Yijtepen kuu awii gene. Noono udhiil gene yihdh nyoge ke coamo beere ge caa ne rob giijh toohd rih Yijtepen kejea: “Yijtepen rob giijh me reje ke nying Moaje kedea ke nying thiow.”

<sup>12</sup> Gihn nu yihdh nyoge acoam gene uwahdhe kaa arahny cwiiny gene rih Yijtepen. Noono ucidh gene thiow ne luom ngo nyum Akuud Judea kedea yaa loohng Juog. Gihn nu naa ayoag gene Yijtepen e ngo akwahng gene piny maa akahl gene ngo nyum Akuud Judea <sup>13</sup> kedea maa akahl gene nyoge ne teed toohd. Noono maa arob yaa ni ngo kob gene, “Nyin dhe be yuohm ke rob ke nying Wod Juog maa ke nying loohng giijh acub Juoge yihre Moaje ne kahlo yihre Judea. <sup>14</sup> Ngo alihng wane e ngo urubo yihre nyoge kejea ngad gen ge cuohn ne Jeacuu arubo kea wod Juog ngo utoare piny kedea uwaare ciehng paaro ge anyoadh loohng giijh akahl Moaje yihre ge kuowo. Ngaa me rob kwaad giijh ni ngo tiihyo ke ne diih?”

<sup>15</sup> Gihn nu e lwaag ke kare naa amahdo nying gen alog gene ke bang Yijtepen. Abea yi maahny amaany gene Yijtepen e nying gen atal ree bang gihn kaan nyinge ake liel wa kaan nying wuohnjuog.

### Giijh Arob Yijtepen Nyum Akuud Judea

**7**<sup>1</sup> Batiene e Ngaa duohng yaa lam Yijtepen apeehe peehnyo kejea, “Ngo adiehr kejea yih arubo kii Wod Juog utoar Jeacuu maa loohng Moaje ge uwaare ne?”

<sup>2</sup> Maa athub Yijtepene ke duog wudh giijh arob ree kea, “Yih ngaan duohng kedea wu jo doonge maa wu ge weehw wan, giijh arob riha ge beehda toohd. Abea nyingu akwaya ne lihng giijh roba yihre ni. Giijh ngo ge beehde e ge ngahy thiow. Juog ge duohng kedea e poong ni be beehdo kii Wod Juog cog.<sup>k</sup> Bang gihn ree kea naa nyoadho yihre Abraahm kii wod kedea ree kea naa anyoadho kii piny ni beedo awaahn ni. Juog ree anyoadhe yihre Abraahm ke piny Mecopotaamy maano e Abraahm poohd kuu anaa abeehn geen Ahran. <sup>3</sup> Kob Juoge yihre Abraahm kea,

‘Wii paari maa waahdu piny uayyi.

Piny moogo unyoada yihri.’

<sup>4</sup> “Adiehr muon, Abraahm abeehn ne aay Kahlede ubeehne piny Ahran. Ahran e naa kaa athow wur Abraahme yea. Batiene kaa athow wahne e ngo abeehn Juoge ne kaabo udaage Abraahm piny gihn beehdo yea awaahn ni. Piny gihn cuohn ne Kanaan. <sup>5</sup> E naa abeehn Abraahme ne beehdo yi piny ni, e yihre atooro nyethen. Keehd maa atoor yihre nyethen, e ngo anaa arob Juoge yihre kejea piny ucube yihre Abraahm, batiene nea ngo uthoo e piny ngo udoohng yihre nyethene. Piny me buu cahng ke kaab oogo yihre gen. Thiow ge anaa abeehd Abraahme kaano e yihre atooro keehd nye piny me thiin maa acub Juoge yihre ne pinye. <sup>6</sup> Anaa arob Juoge yihre kea,

‘Kwaayi ge uci ne beehdo piny nyoge mooge

naa aleye ke kar run jiehabiihje angween.

Yaa beed piny nu ge uyedh maalo

<sup>j</sup>6:10 Judea giijh ake peehmo keehd Yijtepen, ge Judea giijh aduu Jeruucalem ke yoohn kuohn baahng. Coon gen wale ge kuowo ge ne beed muudiihryae giijh Ciihrya maa Celiichya kedea Aacya. Nyoge mooge kiin gen ge ne beed geen Alekjandrya. Yi geen Jeruucalem kar kway Juog mar gen anudo. Noono e ngo ne cuohn ne kar kwaj giijh ‘Yaa Aluny Oogo Kar Bahng.’

<sup>k</sup>7:2 Yijtepen adaahd unyoadahe ngo kejea Juog be beehdo cog kii Wod Juog giijh Jeruucalem, bang gihn ngo anaa arubo yihre Abraahm e Abraahm ne paajo me baahr keehd Jeruucalem.



uyug gene kwaayi ne baahng.

<sup>7</sup> Abea a uyedh maalo thiow rog gen

uyuga gihn me raaj keraahyo ne lwahg kwaayi.

Ge ukahla oogo paan nu ne beehn piny ni ucuba.

Unahg piny nu e nuu uwuor gene an yea.'

<sup>8</sup> Juog thoam abeehne ne yugo wa gihr nyoge maa amaadh remo ne nweehd Abraahm maa nyethene ke Juog. Noono e naa kaa abeehn Abraahme uthoame Yijaag waahde batien nihn abiihjedahg naa anyuole. Ubeehn Yijaage uthoame Jeakob waahde. Jeakob thiow waahde apaar wong ariow, ge beehda ge kuowo, ge athoame.

<sup>9</sup> "Jeakob yihre anaa waahde me nyinge Jocebe. Naa adoohnge ne nyedhoohg maa adoongo e wuud wahn ngo abeehn gene ne tiilo bang gihn kwaad giij teed Jocebe ge kuu apahdh yi cwihny gen. Cahng man, Jocebe akwahg gene piny ungeew gene ngo oogo ne baahng yihr nyoge me caa Micihr. Jocebe adog ke ngeew oogo ne baahng yihr ngad Micihr. <sup>10</sup> Abea Juog wonge keá log oogo rih Jocebe, e beehde kar bahng. Maa abeehn Juoge umeehge Jaah gihr Micihr nhyaar Jocebe ke nying teeg wonge maa ngahy luube naa acub Juoge yihre. Noono uyug Jaah Jocebe ne ngaan duohng yaa batiene me e ne cong caame me kan ne kony nyoge yi kahj gihn ubeehn ni. Anahg Jocebe e naa anaa teed ngo yihr Jaah kejea deeh kahj me duohng upahdh yi paajo. Kahj muu ubang nyoge ke run me thoohdh.

<sup>11</sup> "Naa abeehn deeh kahy ngo, e nyoge abange ke bang Micihr kedea piny Kanaan ka beedo awaahn ni. Noono ubang kahje ge kuowo naa abeed Kanaan keraahyo, utoor ka maa ayoad gene cam yea. Abea caame giij acong Jocebe ge anudo Micihr keehd maa atoor gihn maa acieg ke run me thoohdh. <sup>12</sup> Naa abeehn Jeakobe ngo ne lihngo kejea caame ge nud Micihr e waahde, ge beehda ge kuowo naa acoon, ge aohre Micihr. Naa awahnh wuud mene Micihr, e Jocebe giij waal ayuge ubahng ree keá teedo yihr gen. Naa ayoad wuud mene caam adaahd gene, e ge ake doog. Caam akahl gene ge e caa ne thumo, e ge adog kahj ke naah. <sup>13</sup> Noono udog Jeakobe waahde ke oohr Micihr keehdo. Yi riown waahdh gen, e naa abeehn Jocebe upahe gen oogo, naa ateede ree. Kaano arumo, e naa beehn Jaah ne ngahy ngo kejea Jocebe yihre ne wuud men Kanaan. <sup>14</sup> Maa aohr Jocebe dhog bang wahn kejea, 'Robu ngo yihr wura kejea beehne en maa yaa paare cang.' Noono uay Jeakobe ke nyoge jiehadahg wonge apaar wonge abiihj ne ci Micihr. <sup>15</sup> E naa kaa anaa abeehn Jeakobe maa waahde ne beehdo piny Micihr noono. Ge abeehdo Micihr ke run me thoohdh uwahdhe kaa agwag gene uthow gene. <sup>16</sup> Batiene e Jeakob abeehn ne thoo naa agwage maa akoany waahde ngo yi piny maa naa angeew Abraahme bang waahd Ahmor. Naa abeehn waahd Jeakobe ne thoo thiow, e ge anaa akoany piny moogo me nyinge Ceacehm.'

<sup>17</sup> "Ge kuowo ge abeehdo Micihr ke run me thoohdh mee maa akoad gene keraahyo. <sup>18</sup> Anahg kaano akoad gene keraahyo, e naa aluuny Jaah mooge wiij koom. Giij beeye ge anaa atiihy Jocebe ge keá lihngo naa athere bang gihn cwihnye atooro ne yug gihn me beer yihr ge kuowo ge beehda kwaay Jocebe maa kwaay ge wuud men. <sup>19</sup> Jaah gihn aluuny wiij koom, giij me reje ne cohg ge atiihye rog ge kuowo. Ge ayuge ne baahng me tiihyo yihre. Thiow cwihnye kuu amedo ke nying gihn athoohnh ge kuowo. Noono maa ateede lubo kejea nea nyethiin cuow me nyuol, e kea thoohre yi naam duohng. Giij rog gen ayug gene wa kaa anaa agweehg Juoge. Anaa agweehg Juoge kedea urobe ngo yihr Abraahm kejea e ubeehn ne lwahg kwaay Abraahm ukahle gen oogo kar bahng.

<sup>20</sup> "Kaano anaa athoohr nyedhoohy yi naam nu, e naa kaa anaa anyuol kuowo gihn duohng, e nyinge Moaje. Ngo anaa abeehn Juoge ne kwanyo ne gome. Moaje anahg nyedhoohg maa awuob ne cohg, e naa gihn akan ge wahne ngo paajo ke dwahde adahg e ngo be nyoadh gene beere e be thoohr yi naam.

"Batien dwahde adahg e ngo agweehg gene maa akedh gene ngo ne kano yaa apaaj dhe naam. <sup>21</sup> Kaano e naa abeehn nyaar Jaah ne yoad Moaje maa akaabe ngo bang gihn ngo anhyaare maa apiidhe ngo ne nyethiine. <sup>22</sup> E naa kaa abeehn Moaje ucuohne ne kwaar Jaah kii ngo kedea upuohnye wa ka puohny nyethiin ngaa me duohng yi paajo. Noono udoohnge ne dhaano me lume ke wuoro ke nying teeg wonge kedea ke nying ngahy rob.

<sup>23</sup> "Naa anahg run Moaje jiehariow, e wiie apare ne liew jo paar gen yaa Yijarael. <sup>24</sup> Naa awahnh Moaje e dhaano acielo ayuude e ngo bang ngad Micihre bango maa abeehn Moaje ne coal kar ngad paar gen uwahdhe kaa anahge Umicihr. <sup>25</sup> Ngahda ngo dhiilu kaa ngahyo kejea ngo abeehn Moaje ne ngeyo kejea Juog daahd dhe yooh ke gwiiro unahge en nuu uluny yaa Yijarael oogo kar bahng. <sup>26</sup> Ruuwow e Moaje yaa Yijarael kar ge ariow ge ayuude e ge ukag. Noono utume gen ke joago e urubo yihr gen kea, 'Gihn e ne bangu rogu abea wu beehda nyethea yej.'

<sup>27</sup> "E nyin anaa ne bang wad gen ake kweer ke lum Moaje maa ajwange ngo kobe, 'Ngaa ne cohg e naa acub yihn nyum wan ne ngaa duohng yaa lam?' <sup>28</sup> Yih daahd unahgi an wa kwaad gihn awaahro naa anahgi Umicihr ne?' <sup>29</sup> Naa angey Moaje ngo kejea gihn anahge Umicihr piny amore, e ngo agoohd piny Midyan ne beehdo keew aleye. Moaje abeehdo kun nu ke kar run me thoohdh uwahdhe kaa anyoohme unyuol ciie ke waahd ariow.

<sup>30</sup> "Cahng man, maano e Moaje rune ge jiehariow Midyan e ngo anaa buud good Ciihna yi ukang. Cahng nu e Juog ake beehno umeenye yi bungo me ne buud good wa maaj e ne waang ngo. <sup>31</sup> Moaje wiie amuum naa aniide kwaad gihn nu. Abea gihn kea e daahd nyiigo beere kwaad gihn ngo beehne ke ne niido ke ka me cahng ni, e duon Juog alihnge lihngo e urubo yihre kea,

<sup>32</sup> 'Moaje, a naa Juog gihn wuor Abraahme maa Yijaag kedea Jeakob kedea ge kuow mooge.'

Maa amag lwahre Moaje ubahng wonge keá cahg tihng maalo ne maahnyo keehdo.

<sup>17:16</sup> Kuohn ariow ge ne na koany yaa acoone weehg gen yihdh gen. Abraahm piny angeewe buud Eabron. Kaa ngo ka me koany nyoge yea anaa akaj oogo (Kwaan Ngol 23 kitaab 'Giij Umodho'). Batiene e Jeakob piny me duohng angeewe ka cuohn ne Ceacehm bang yaa Ahmor. Yi piny nu thiow, kar koany nyoge anaa koj oogo (Kwaan kitaab 'Giij Umodho' Ngol 33: 18-20) tiehd keehd (kitaab 'Jocwa' Ngol 23:32).

<sup>33</sup> "Maa abar Juoge maalo ke rob yihr Moaje kea, 'Kahl wuor gihi noono oogo yi tieni bang gihn ka cuungi yea, beehda Piny Juog.'<sup>m</sup> <sup>34</sup> Ubare ke maalo ke rob kobe, 'Lihng gihn roba yihri ni beer mee. Giih ajohro naa ayoaod jo'a, yaa Yijarael, piny Micihre ge aniida ke wonga. Kaa akaahn yaa Micihre gen ke cing nyooro aniida thiw. Lan gen e naa alihnga e naa gihn abeehna wihi piny beere ge lunya ke oogo kar bahng. Awaahn ni, yih oohra ne kahl jo'a oogo Micihre.'

<sup>35</sup> "Moaje e naa akweer yaa Yijaraele keehde ni, ge anaa arub gene kejea, 'Ngaa e naa acub yihn nyum wan ne ngaa duohng yaa lam,' e naa ngaa akwany Juoge ne ngaa duohng yaa lam yihr gen: ngaa me lwahg gen oogo kar bahng piny Micihre. Ge arom Moaje ke lwahg oogo ke kuny mar wuohnjuog gihn abeehn ne meeny yi bungo wa maaj e ne waang ngo.<sup>n</sup> <sup>36</sup> Anahg Moaje e naa akahl gen oogo Micihre, e tiihy gihi me thoohdh me teeg me gaahy nyoge ke bang koohr Naam Kwaar kedea ke kar run jiehariow e ge cor yea ukang.

<sup>37</sup> "Anahg Moaje e naa arubo yihre ge kuowo ke nying Jeacuu kea, 'Juog arubo kejea agamloohngjuog uohre yihru cahng moogo. Agamloohngjuog maa ngad tien paaru muu uroomo ke an.'<sup>38</sup> Anahg Moaje e naa ngaa anaa arob Juoge loohnge yihre wihi good Ciihna. Loohnge gihi dhiilo tiihj ke gen. Ngahyu thiw kejea ge kuowo ge anaa thar good Ciihna ne koar Moaje.

<sup>39</sup> "Anahg Moaje gihn ni e naa adhaahr ge kuowo ke koar ngo kedea ukweer gene keehde kaano apoohe e ne wihi good. Ge akweer kejea Moaje padh ruohdh gen kedea ge daahd udo gene Micihre. <sup>40</sup> Gihn nu e ge arubo yihre Aaron kob gene, 'Moaje umiihu, gihn ayug ree yihre maalo wihi good ngo kwihy wane. Nea neehn maano kea doohngi ne ruohdh wan kedea thaahdh gihn me wa muor unahge e naa juog wuor wane.'<sup>41</sup> Kaano e naa ayoaod gene gihn me room ke muor uthaahdh gene ngo. Maa anahg gene gihre remo piny ne kweehr muor gihn athaahdh gene ne juog gihre gen. Maa uyoaod gene deeh yaay me duohng keter maa ayug gene ngo ke nying gihn athaahdh gene ke cing gen naa amihn cwihihny gene rih ngo. <sup>42</sup> Naa aniid Juoge ngo kejea ge kuowo ge daahd wuor yiehdhe gihi wuor aleye e cwihihny arahnyo. Cwihihny arahnyo uloge wonge oogo rog gen uwiie gen ne wuor kwaad gihi gen noono wa ciehr kedea kwaad gihi mooge me nii maalo. Juog coon anaa arubo ke nying gihn atiihy ge kuowo ree yi kitaab gihn agweed agamloohngjuog me nyinge Amoje. Gihn akweer gene ke wuor Juog unahge yiehdhe gihi aleye ge ne wuor gene. Anaa akob Juoge kea,

'Wu yaa Yijarael,

wu yug gihi waal wa mar ge kuowu.

Ge kuowu ge ayug gihi waal riha

kejea ge wuor an.

<sup>43</sup> Abea ka beehda toohd.

Ge akweer ke luma noono unahg gene

gihre remo ke yihre yiehdhe<sup>o</sup> gihi wuor aleye.

Yiehdhe gihi nu ge naa adoohng ne joohy wuor gene.

Wun thiw, wu tiihy kwaad gihi na tiihy ge kuowu.

Kobu wu nyoge me wuor an

abea wu kaahn coohre

bang gihn wu poohd wuor yiehdhe me gihre nying gen tooro.

Bang gihn adoohngu ne nyoge me be wuor an

kedea wu urubo ke toohd kejea a wuoru wuoro,

e naa gihn uriema wun ka me baahr, piny aleye,<sup>p</sup>

wa mar nyoge maa ataaj yi liny.'

<sup>44</sup> "Ngahyu cang kejea ge kuowu gihi wuor Juog ge na yug gene ke ka na cub abug yea. Ngo anahg abug me duohng me nyoadh ngo kejea Juog nud keehd yaa Yijarael. Juog e naa anyoadh kaa ageer abug gihn nu kii ngo yihre Moaje.

<sup>45</sup> Ngahyu thiw kejea keehd ge kuowo, e ngaa duohng gen anahg Jocwa, Juog puud ne wuor gene ke kar abug.

<sup>46</sup> Deabid kuowo anaa adaahd ugeere wod me wuor Juog yea. <sup>47</sup> Abea anahg Caloamon e naa abeehn ne geer wod me wuor Juog yea: wod anaa daahd Deabide ke geero.

<sup>48</sup> "Gihre nu cang ge beehda athere me ngahyu. Abea a adaahd uteeda ngo yihre ne cohng kejea Juog gihn wuoro, e beehd yi Maalo Paare, be beehd yiehdh wuude me geer ke cing dhaano utaahngo wa kwaad wuud ageer ge kuowo.

Anaa arob agamloohngjuoge kejea Juog arubo kobe,

<sup>49</sup> 'Maalo e naa koom me piiha wihe

maa piny e naa gihn cuba tiena wihe.

Beehda kwaad wod me duohng wa gihn

e nuu geeru uroma yuohmo yea?

<sup>50</sup> Ngahda an naa ayug kwaad gihi nud upiny kan cang!

Wod me ngihde e ne romu ke geero yihra!'

<sup>51</sup> Maa abar Yijtepen maalo ke rob, "Gihre nye yaage e teeg wudhu ubahngge wu be lihngo ke luube? Loohng Juog ge be cubu yi cwihihny. Wu uroomo keehd ge kuowo naa akweer ke yihre lum Juog. Wu akweer thiw ke lihng luub Wahy Juog wa kwaad kaa anaa akweer ge kuowu naa coon. <sup>52</sup> Wu gweehg tiihy gihi me reje wa kwaad gihi na gweehg ge

<sup>m</sup>7:33 Yijtepen adaahd ngo ke nyoadh kejea Juog be beehdo cog kii Wod Juog yi geen Jeruucalem. Juog ree anyoadhe yihre Abraahm kedea yihre Moaje yiehdh miehr me baahr keehd Jeruucalem.

<sup>n</sup>7:35 Yijtepen Juog acuohe ne wuohnjuog gihn abeehno ne meeny yi bungo. Kuu anahg wuohnjuog e naa abeehno ne meeny yi bungo abea beehda Juog ke ngude.

<sup>o</sup>7:43 Yiehdhe ne wuor yaa Yijarael nying gen Molog maa Repan. Yaa Yijarael ge ne kaahn gihi maa atieng wa yiehdhe gihi nu. Abea keehd me ne wuor gene yiehdh nu e gihi wuor Juog ge puud ne yug gene yugo yiehdh nihni yaaye gihi yug ke nying Juog Aciehg.

<sup>p</sup>7:43 Kob agamloohngjuoge kejea piny uriem Juoge yaa ni yi ngo ne beehdo unaa loog geen Damajko. Lum yea gihn arob beehda kejea ge ubeehdo naa aleye yi piny me baahr me cuohn ne Baabihloanya.

kuowu. Riem batien yaa gamloohngjuog kedeaa kaahn gen ke cing nyooro e naa tiihj anaa acub ge kuowu yi wudh gen. Yaa gamloohngjuog me thoohdh maa arubo ke nying beehn Ngad Boadh nyoge, ge anahg gene. Wun thiw, naa ayoadu Ngad Boadh nyoge e ngo amagu unahgu ngo. <sup>53</sup> Keehd maa angahyu ngo kejea Juog e naa acub loohng yihr Moaje, e wu akweer ne ped ke tiihj ke gen.”

<sup>54</sup> E yaa anaa yi lug ge lihng gene giijh arob Yijtepen robo ni, e cwihny gen anaa ngwedh piny kedeaa ukaany gene lag gen kaanyo rih Yijtepen. <sup>55</sup> Kaano e Yijtepen amaahny maalo maa anyoadh dhaahr Juog yihre. Noono uniide kaa amiihr paar Juoge kii ngo maa e Jeacuu ucuungo ukwiihy Juog. <sup>56</sup> Urub Yijtepen kobe, “Maahnyu do yey Maalo uneehno yihra e ayab ree maa Jeacuu Waahd Juog apiih ukwiihy wahn.”

<sup>57</sup> Kaano e yaa anaa yi lug ge anaa juuj ke kwaago maa e yihdh gen aciehg gene ke cing gen. Noono ugoohd gene rih Yijtepen. <sup>58</sup> Maa akwahg gene ngo piny kedeaa uywaay gene ngo ke oogo yi buur geew kaa aci gene ne bahn ngo ke leele.

<sup>59</sup> Kaano abahn gene Yijtepen bahno, e ngo ake kwahyo e urubo kobe, “Wahya ge acuba yi cing Jeacuu Ruohdha.”

<sup>60</sup> Noono upahdhe ke wudh conge urube kobe, “Wii lubo piny yihr gen Juog.” Kaano e ake thoo. Yaa anaa aci ne bahn Yijtepen ge anaa akony ngaa me nyinge Coale.<sup>9</sup>

### Coal Riem Batien Yaa Ayiiho

**8**<sup>1–2</sup> Yaaj me wuor Juog ne cohg kuohm Yijtepen akan gene kedeaa uyuog gene bang ngo keter. Ke wong cahng nu anahge nu, e naa kaa anaa thub nyoge ke yug giijh ajohr me reje ne cohg rog yaa ayiiho giijh anaa Jeruucalem. Noono ugoohd thoohdh gene oogo Jeruucalem ukeedh gene ke bang wudh geedh Camaarya. Anahg jo oohr ge naa anaa adoohng Jeruucalem. <sup>3</sup> Abea Coal, ngaa anaa adoohng waay nyoge bange nye kaa anahg Yijtepen, adhal ke yug giijh me reje rog yaa ayiiho. Yug giijh reje anaa adeehje yi cwihnye ne cohg adhaahr ucaahdhe caahdho e ngo wen miehr giijh yaa ayiiho e daahd gen. Noono e kwaad ngaa ayiih lum Juog maa ayoade now, dhe cuow kedeaa dhaago e ngo kedhe kii karkoohn.

### Puohny Pihlihb Camaarya

<sup>4</sup> Yaa anaa akeedho ke bang Camaarya ge ake caahdho e ge puohny lum Juog ke yihdh geedhe. <sup>5</sup> Pihlihb ge anaa kwany ke nyoge abiihberiw ne kony jo oohr, ngo anaa acidho geen Camaarya. Yi geen nu ngo arubo ke nying Ngad Boadh nyoge gihn akwany Juoge. <sup>6</sup> Nyoge me thoohdh ge abeehn bang Pihlihb ne lihng giijh puohnye. Wudh gen acub gene ne lihng giijh arobe ne cohg bang gihn, bang Pihlihb aliinggo yihr gen ke coon kejea giijh me gaahy nyoge ge yuge yugo. Kedeaa awaahn ni giijh nu na yuge ge aniid gene ke nying gen. <sup>7</sup> Pihlihb nyoge maa adwaany kedeaa maa ngoohde ge athiedhe. Atiihb ukeehg ge arieme oogo yi koohm nyoge. Noono ugoohd gene oogo e ge ungoan bang gihn ariem Pihlihb ge oogo. <sup>8</sup> Ubeehn yaa yi geew umihn cwihny gene keter.

<sup>9</sup> Yi geen ni thiw ngad yiehdhe moogo anudo me nyinge Cimoane. Atahre kea e ngaa me teeg. Yi nihn nu e Cimoane anaa ke theehdho ke nyoge kedeaa ugaahy gene yi giijh tiihye. <sup>10</sup> Yaa anaa yi geen ni cang cuow kedeaa maahn ge anaa abeehn ne cub wudh gen rog giijh yug Cimoane. Noono urub gene kob gene, “Juog gihn duohng ke ngude e ne meehg Cimoane yug kwaad giijh nu.” <sup>11</sup> Adiehr muon nyoge ge anaa acwaahng kedeaa wudh gen anaa acub gene rog giijhe noon ni bang gihn ge atiihye ke ka me bange baahr. <sup>12</sup> Abea naa abeehn nyoge ne lihng puohny mar Pihlihb, naa apuohnye nyoge ke dhe yoohn mag Juoge nyoge ne yaae kedeaa naa arube ke nying Jeacuu Kriihito, e lum Pihlihb ayiih gene yiiho. Maa abeehn Pihlihb umuoje gen ke luogwahy, cuow kedeaa maahn cang. <sup>13</sup> Cimoane thiw, e anahg ngad yiehdhe, amuoj ke luogwahy naa adoohng ne ngaa maa ayiiho. Noono ucaahdhe caahdho ke batien Pihlihb bang gihn en thiw agaahy yi kwaad giijh teeg naa ayug Pihlihb.

<sup>14</sup> Batien gihn nu e dhog awahn Jeruucalem bang jo oohr kejea yaa Camaarya thiw lum Juog ayiih gene. E Piihter keehd Joon ge ake oohro bang gen. <sup>15–17</sup> Naa awahn Piihtere maa Joon yi geen ngo e aliing gene lihng kejea Wahy Juog poohd kuu abeehn wudh yaa ayiiho keehd maa anaa amuoj Pihlihb gen ke luogwahy ke teeg Jeacuu Ruohdh. Naa angahy gene ngo e Wahy Juog kuu abeehn wudh yaa ni e cing gen acub gene ke wudh gen cang maa akwaj gene Juog beere Wahy Juog cube cubo. Noono maa abeehn Wahy Juoge wudh gen.

<sup>18</sup> Naa aniid Cimoane ngo e Wahy Juog abeehn wudh yaa ayiiho naa apiehl jo oohre cing gen wudh gen, e ngiihny ge atume ke cubo yihr Piihter maa Joon kobe, <sup>19</sup> “Cubu kwaad tee gihru noono yihra beere kwaad ngaa cuba cinga wiihe, e Wahy Juog yoade yoado thiw.”

<sup>20–21</sup> Maa abeehr Piihtere ngo yihre kea, “Kadhi ke ngiihnyi noono, Juog yih be wiie! Yih dhiile kaa kihmo. Ngaa e naa akob ngo yihri kejea Wahy Juog ke ngeewo ke ngiihny. Yih abeehdo e yih kuu anahg ngad wan kuu umodho. Gihn me beer me cahgi ke yoado tooro, bang gihn Juog cwihnye angol rih bang gihn apari ngo kejea tee gihre ngeewi ngeewo ke ngiihny. Gihn me cahgi ke yoado bange tooro. <sup>22–23</sup> Yih aniida arumo ne ngad anyoohne me thoohdh! Kea noono maan anyoohne giijhi! Kway Juog beere lubo wiie ke piny yihri.”

<sup>24</sup> E Cimoane ake rubo yihr Piihter kea, “Cedhree! Kwahyi ke nyinga yihr Juog beere giijh nu arobi ge be tiihy Juog riha.”

<sup>25</sup> Yaa ayiiho ge na puohny Piihtere maa Joone puohnyo batien gihn nu ayug ree nu. Ge apuohny gene kejea caahdh gene kaa dhe yoohn anyoadh Jeacuu. Naa athum waahdh gene ne do Jeruucalem, e ge acaahdho e ge puohny Ciig Beer yihr nyoge ke bang yihdh miehy akaahn gene.

<sup>9</sup>7:60 Judea giijh aci ne bahn Yijtepen waay gen akahl gene oogo ucub gene gen yihr rihj me nyinge Coal. Judea waaro me duohng ne ke ngaabo wudh waare. Beehda kwaad waay nu ge naa akahl oogo ne meehg gen abahdo beer mee.

7:53 7:38; Judea 2:2 7:55-56 Mat 26:64; Tiihy 2:33 7:56 10:11; Luk 3:21; Jon 1:51 7:58 22:20 7:59 Luk 23:46

7:60 Luk 23:34 8:1 8:4; 11:19 8:3 9:1, 13, 21; 22:4-5; 26:9-11; 1Kor 15:9; Gal 1:13 8:4 2:41 8:7 Mak 16:17; Luk 9:1

8:12 28:23 8:16-17 19:1-6 8:18 6:6 8:21 Epi 5:5

### Pihlihb Lum Jeacuu Apuohnye Yihr Wajiihr Gihr Cuudaahn

<sup>26</sup> Cahng ni e wuohnjuog ake rubo yihr Pihlihb kea, “Gwiir rihi ucidhi e yih kaahn yoohn aay Jeruucalem ne ci te bur Gaja.”<sup>r</sup> <sup>27</sup> Noono ugwiir Pihlihbe ree upahdhe yooh. Wajiihr me duohng gihr dhaahr Cuudaahn anaa yi yoohn nu ne do Cuudaahn naa athume ke yug giih kweehr yihr Juog Jeruucalem. Anahg wajiihr ngad mag ngiihny yi dhaahr me dhaago e naa anahg ruohdh yi paajo. Anaa abeehn Jeruucalem ne yug giih kweehr yihr Juog. <sup>28</sup> Kaa anaa acaahdh arbieng cieny gihre caahdho, e ngo anaa ke kwaahno yi kitaab gihn agweed Yicaaya agamloohngjuog. <sup>29</sup> E Wahy Juog ake rubo yihr Pihlihb kejea, “Lay tieni! Cidhi ucaahdhi ke buud arbieng ca.” <sup>30</sup> Gihn nu e Pihlihb tiene alaye layo udoohde arabya, ulihnge wajiihr e ngo ukwaahno yi kitaab gihn agweed Yicaaya agamloohngjuog ni. Maa apeechny Pihlihbe ngo kobe, “Giih nu kwaani awaahn ni yi lum yihdh gen romi kaa ngeyo beer mee ne?”

<sup>31</sup> Maa abeehre ngo yihr Pihlihb kobe, “Yihdh gen roma ke ngeyo ke naa diih nea padh ngaa moogo e ne rob giih yihdh gen yihra.” Maa arob Pihlihbe ngo yihr wajiihr kejea yihdh gen rome kaa kwaano yihre. Noono e Pihlihb acuohne cuohno bange yaa arabya beere ge ucaahdho tiehd.

<sup>32</sup> Anahg ngol gihn e naa anaa akwaan wajiihre kwaano,

“Ngaa me wa kwaad roomo me piey ne naah.

Wa kwaad roomo me be yuog ka giidhd yiehy ree oogo.

Dhee kuu akuong ne kweg ke lalo.

<sup>33</sup> Kwaad deeh ajohr me duohng atiihj ree

kedea ngo aroj wiidh adiehje.

Ne nyoge me reje wiidh piny

me kaal wiidh raahy yaa anahg ngo?

Be ngaa me kaal wiidh raahy gen!

Ngo anahg gene ke naah ajohr.”

<sup>34</sup> E wajiihr Pihlihbe apeechny peechny kobe, “Teed ngo yihra, giih ni agweed agamloohngjuoge ge rubo kaa nying ngaa? Beehda ke nying ngud mare ne wale ke nying ngaa moogo?” <sup>35</sup> Pihlihb arubo yihr wajiihr ke nying Ciig Beer ge rubo ke nying Jeacuu Ngad Boadh nyoge. Athubo ke rob e thobe kaa ngol gihn anaa akwaan wajiihre kwaano. Arobe kea ngol gihn nu rubo kaa nying Jeacuu ge ulog beehno cahng moogo ke batién agamloohngjuog.

<sup>36–37</sup> Naa awahdh gene buud kar piih e wajiihr ake rubo yihr Pihlihb kobe, “Giih ateedi ke nying Jeacuu ge ayiia. Cwihnya acuba ne wuor ngo. Muoj wiidh ke piih luogwahy.” Maa abeehr Pihlihbe ngo yihre kea, “Piidh luogwahy ge uwoja wiidh nea yih ayiio ke cwihnyi cang.” Maa aduoge ngo kea, “Ngo ayiia ke cwihnya cang kejea Jeacuu Ngad Boadh nyoge beehda Waahd Juog ke ngude.”

<sup>38</sup> Ubeehn wajiihre maa arobe ngo yihr ngaa doang arabya gihr ciehnye doango kejea mage yaa arabya ucuunge. Noono ucidh Pihlihbe maa wajiihre yihdh piidh uwoje piidh wiidh ne cub luogwahy yihre. <sup>39</sup> Naa abeehn gene oogo yihdh piidh, e Wahy Juog Pihlihb akaabe kaabo ukedhe ngo ka me kuu acahg wajiihre ke niido keehdo. Ubeehn wajiihre ubare maalo keehd waahdhe e cwihnye med kwaade tooro. <sup>40</sup> Batién gihn nu e Pihlihb ree ayoade ke ka me cuohn naa Ajotoj. Uaay Pihlihbe ne ci Cejearya, e caahdhe e ngo puohny Ciig Beer yihr nyoge ke bang yihdh geedhe giih toohng yihdh gen.

### Coal Adoohng Ne Ngad Jeacuu

(Tiihy 22:6-16; 26:12-18)

**9** <sup>1</sup> Kaa anahg Pihlihbe Cejearya e Coal anaa beed Jeruucalem. Coal cwihnye apoochde e ngo raaj rog yaa ayiio kedea ree akuohngge ke maalo maa piny ne nahg yaa ayiio lum Jeacuu. <sup>2</sup> Naa alihngge ngo kejea yaa ayiio mooge ge agoohdo uwahdh gene geen Damajko, e wiidh apare ne buodh batién gen beere caa ne mag gen kun ca. Noono maa arobe ngo yihr ngaa duohng yaa lam kejea muoje ke warga me cube yihr Judea beed Damajko, warga me kony gene en ke daahd yaa ayiio beere kihd ngaa ayoade mage maa ukahle ngo Jeruucalem. <sup>3</sup> Naa awahn ge Coale ka me cahng keehd Damajko, e gihn me wa maahny kodh piny ameenye meenyo ne beehd udoohng buude ne weehny. <sup>4</sup> Maa apahdh Coale piny ne riehb. Kaano anea piny nu, e lihng ngaa me rubo yihre kea, “Coal, gihn ke ree e tiehngi a ater?”

<sup>5</sup> E ngo abeehr Coale kobe, “Ruohdh, yih beehda ngaa?” Maa aduoge ngo yihre kea, “Beehda a Jeacuu gihn atiehngi ater. Keehd maa atiihyi giih me reje riha, e awaahn ni yih aloga ne ngaa me tiihyo yihra. <sup>6</sup> Aj maalo uci yi buur geew, gihn daahd utiihyi ngo, urob yihri Damajko.”

<sup>7</sup> Yaa anaa ke caahdho keehd Coal, ge anaa acuungo ne diih e dhog ge atal naa acwaahng gene, bang gihn yedh duol alihng gene abea kihd ngaan arubo kuu aniid gene. <sup>8</sup> Batién e Coal a'aj maalo, abea gihn kea e tum wonge ke yabo e piny keá rom ke niido ne weey weey. Noono e cinge amag yaae maa upiey gene ngo Damajko. <sup>9</sup> Maa abeehd Coale keehd kar niidh adahg e piny be niide ne weey weey. Thiow kihd piidh maa cam maa akedhe dheer tooro bang gihn giih nu ge akweehre kweehro ke nying kway Juog.

<sup>10</sup> Yi Damajko, ngad yiiho anudo me nyinge Anaanya. Nyin nu Jeacuu abeehn wiidh yi laahg ucuohne ngo kobe, “Anaanya.”

Maa ayiio Anaanya kea, “A aman kan Ruohdh.”

<sup>11</sup> Batién e Jeacuu ake rubo yihre kea, “Anaanya, a daahd uohra yih. Aj maalo ukwanyi yoohn nyinge Yooh Ne Kew ucii paar nyin me nyinge Juudo. Nea yih awahdh paar Juudo, e kea koohbi kii yih daahd ngaa me nyinge Coal, ngad geen Tarcuj. Coal gihn nii kway Juog awaahn ni <sup>12</sup> kedea yih uneehno yihre awaahn ni wa yi laahg e yih beehn bange ne cub cingi wiidh beere nyinge ge uyahbo keehdo.”

<sup>r</sup>8:26 Yoohn ngo e naa yoohn beehn ke te bur Gaja. Anahg yooh me cahng, me cuog piny.

<sup>13</sup> Maa abeehr Anaanaye ngo yih Jeacuu kea, “Ruohdh ngaan nu robi kaano bange beehde e ngo alihnga coon bang nyoge me thoothd. Bange alihnga kejea ngo ngaa me raaj. Giih reje naa atiihye rog yaai ge beed Jeruucalem ge alihnga. <sup>14</sup> Ngo alihnga thiw kejea ngo abeehn Damajko kan e ngo kaahn warga maa agweed ngaa duohng yaa lame beere wa mage maa.”

<sup>15</sup> Kaano e ngo acahg Jeacuu kea robo yih Anaanya kea, “Cidhi bange bang gihn ngo akwanya ne ngaa me tiihy yihra. E nuu meehg nyinga wiih ke bang upiny cang maa ke bang ruohdhe giih upiny cang kedea ke bang yaa Judea cang. <sup>16</sup> Giih ujoohre yihd gen ke nyinga ge unyoadha yihre. Tihng rih ucidhi.”

<sup>17</sup> Kaano arumo e Anaanya ake aay ne cej paar Juudo. Naa ayoade ngo e amon wod ucube cinge wiih Coal e ngo urubo yih Coal kea, “Coal umiiha, Jeacuu Ruohdh, ge anyoadh ree yihri yi yooch ni, e naa aooch an bangi. A aoochre beere nyingi ge uyahbo ucahgi piny ke niido keehdo e thiw beere Wahy Juog beehni rih.” <sup>18</sup> Ke wong kaano e Coal kwaad giih me wa kwaaje ge aniide e ge naa pag oogo yihd nyinge. Noono uyahb nyinge yahbo ucahge piny kaa aniido. Maa abeehn Coale uyedhe maalo noono maa amuoj Anaanya wiihe ke piih luogwahy. <sup>19</sup> Naa acahm Coale, e kuohme anaa war, uyoade tee.

### Coal Upuohnyo Ke Nyoge Damajko

Batien gihn nu, e Coal aceng bang yaa ayiiho.

<sup>20-21</sup> Noono uthub Coale ke puohny nyoge ke bang kuohn amaade giih Damajko kejea Jeacuu beehda Waahd Juog ke ngude. Apuohnyo ne cohg e rob luube me meehg nyoge yiih ngo kejea Ngad Boadh nyoge gihn akoar gene koaro e naa Jeacuu. Yaa alihng kaa arube kii ngo ge adog cwaahng ke nying teeg lume. Ge acwaahng bang gihn angahy gene kejea yaa na rob kwaad giih puohnye ge na maane maano. Maa apeehy nyoge ke rog gen. “Padh nyin na nahg yaa ayiiho e gihn ne? Ngahda anaa abeehn kan beere ge mage maa ukedhe gen Jeruucalem bang ngaa duohng yaa lam ne?” <sup>22</sup> Abea e naa kaa abeehn Coale ubare maalo ke puohny ne cohg uwahdhe kaa adaare yaa Judea kedea maa abeehn Judea mooge uyiih gene puohnye. Ge ayiiho bang gihn dhe yooch kaa anyoadhe ngo kejea Jeacuu e naa ngaan anaa aooch Juoge upiny ne Ngad Boadh nyoge, ngo apahdh yi cwihny gen naa adiehr.

<sup>23</sup> Batien nihn e yaa Judea giih cwihny gen reje rih Coal, amaad ayug gene beere dhe yooch me nahg gene Coal daahd gene daahdo. <sup>24</sup> Abea nyoge Coal atoohn gene kejea yaa Judea ge daahd ngo ke naah. Yaa Judea thiw nyoge acub gene dhog oaye giih atieg geew piny keehd gen ne koar Coal ke bang decahngo maa dewaahr beere ngo mag gene maa unahg gene ngo nea daahd ree ke kwala. <sup>25</sup> Abea yaa ayiiho dhe yooch moogo abeehn gene ne yoado maa arom gene Coal ke kwal oogo. Noono maa acea Jeruucalem.

### Yi Jeruucalem Coal Ree Ayoade E Be Daahd

<sup>26</sup> Naa abeehn Coale Jeruucalem, e dhe yooch maa ayoade tooro naa atume ree ke mad bang yaa ayiiho. Dhe yooch keá yoado bang gihn yaa ayiiho giih Jeruucalem ge apoohdo e cwihny gen udiwo ke nying Coal kejea ngo poohd e ngaa me riem batien yaa ayiiho. <sup>27</sup> Noono maa anahge Barnaba e naa abeehn ngo ne konyo ukedhe ngo bang jo oohr. Gihn nu maa akwaan Barnabe dhe yooch kaa abeehn Coale uniide Jeacuu yi yooch e ngo caa geen Damajko kedea kaa arub Jeacuu yih Coal. Uteed Barnabe kaa apuohny Coale nyoge Damajko thiw ke nying Jeacuu Ruohdh e lwahr me ne ree tooro. <sup>28</sup> E naa kaa abeehn Coale upiie bang yaa ayiiho kedea ubeehde e ngo puohny Ciig Beer ke nying Jeacuu ke bang yi geew e urubo yih Judea e kihd lwahr me ne ree tooro. <sup>29</sup> Thiw Coal na urubo keehd Judea giih ne beehd miehy bahye. Yaaj mooge kiin gen cwihny gen arahnyo rih Coal maa adaahd gene dhe yooch me nahg gene Coal. <sup>30</sup> Kaa amodh yaa ge Coale gihn daahd yaa Judea ke yugo, e Coal arwaay gene ke Cejearya uoohr gene ngo geen Tarcuj.

### Nyoge Aooch

<sup>31</sup> Anahg yihd nihn nu thiw e naa abeehn yaa ayiiho giih Gaalili kedea Camaarya uyoade gene laahw wiih kedea ukoade gene. Thiw ge na ubeehdo ke med cwihny e ge tiihy giih daahd Juoge, bang gihn Wahy Juog anaa anudo ke gen. Anahg yihd nihn alaahw wiih e naa atiihy giih ni rog gen.

### Piihter Adwaany Moogo Athiehdhe Kedea Utahnge Dhaago Maa Athow

<sup>32</sup> Kaano thiw Piihter na ucaahdho ke bang wudh geedhe. E nahg cahng ni, e acaa paajo me cuohn ne Lida ne liew yaa ayiiho, <sup>33</sup> e Piihter atoohng wiih nyin me cuohn ne Aniih maa abeehdo e ngo abab piny ke run abiihbedahg e kar waahd tooro yihre. <sup>34</sup> Maa acuohn Piihtere ngo ke nyinge kea, “Aniih, Jeacuu yih athiehdhe. Aj maalo maa dol gih budo gihri.” Ke wong kaano e Aniih a'aj maalo. <sup>35</sup> Yaa beed geen Lida kedea yaa piny Caaron lum Juog abeehn gene ne yiiho bang gihn, gihn ayug ree alihng gene kedea ngaa athiehdh anaa beehni gene ne niido. <sup>36</sup> Thiw, dhaago moogo anaa anudo yi geen Jopa. Dhaar ni nyinge Taabidha.<sup>s</sup> Ngo anahg ngaa maa ayiih lum Jeacuu. Thiw anahg ngaa maa acub wiihe yi tiihy giih me beeye kedea kony nyoge maa angoohng. <sup>37</sup> Yi nihn nu e Taabidha abeehn ne twaany uthowe. Noono e kuohme ake luogo upiehle yi wod maalo. <sup>38</sup> Jopa beehda geew me ngo be baahr keehd Lida. Naa alihng yaa ayiiho giih Jopa ngo kejea Piihter ne Lida, e nyoge ariow aooch gene ke bange ne robe yihre kejea laare beehni Jopa.

<sup>39</sup> Noono ubeehn Piihtere utihng ree tihngo ulaare ke cidho keehd gen Jopa. Naa awahn gene paajo e ngo akedh wod maalo kaa apiehl kuohm Taabidha yea. Maa abeehn gihn anaa anahg alwaa gule umahd gene buud Piihter e ge uyuog maa e ge nyoadh waay anaa ayug Taabidhae yihr gen.

<sup>9:36</sup> Taabidha ke dhog Judea abea Dorkaj ke dhog Griihge lum yea Nyethiihl.

**9:15** 13:2; 22:21; 23:11; 26:1; 27:24; Rom 1:5      **9:16** 20:23; Luk 21:12; 2Kor 11:23-28      **9:17** 19:6      **9:20** 17:2; Luk 22:70

**9:21** 8:1; 9:13-14      **9:22** 5:42      **9:23** 23:12      **9:23-25** 2Kor 11:32-33      **9:26-27** 9:3-6, 20; Gal 1:18

**9:27** Barnaba: 4:36-37; 11:22-30; 12:25; 13:1-4, 7, 43-50; 14:12, 20; 15:2-12, 22, 35-39; 1Kor 9:6; Gal 2:1, 9, 13      **9:30** 11:25; Gal 1:21

<sup>40</sup> Maa abeehn Piihtere maa arieme nyoge oogo udoohnge yi wod. Gihn nu e cunge arunge piny ukwahye kwahyo. Batiene maa aloge wonge bang Taabidha goan kun anaa apiehle yea kedea ucuohne ngo ke nyinge kea, “Taabidha! Aj maalo.” Maa abeehn Taabidhae uyabe wonge. Abea naa aniide Piihter, e ngo ayedho maalo upiie uthare kaa anaa apiehle yea. <sup>41</sup> Maa anyiig Piihtere buude umage ngo keehd bade utihnge ngo maalo wudh tiene ucuunge. Maa acuohn Piihtere nyoge wod, gule maa yaa ayiiho naa mahdo, unyoadhe Taabidha yihr gen e ngo kuow. <sup>42</sup> Maa abeehn gihn ayug ree ulihnge ke bang yi geen Jopa ke kare cang. Noono ubeehn nyoge me thoohdh maa ayiih gene lum Juog. <sup>43</sup> Maa aceng Piihtere keehd kar nihn me thoohdh keehd yaa Jopa, paar nyin me nyinge Cimoane.<sup>†</sup>

### Juog Piihter Aohre Ne Nyoadh Lum Jeacuu Yihr Ngaa Me Padh Ujudea

**10**<sup>1-2</sup> Yi geen Cejearya ka me cahng keehd Jopa nyin moogo anudo me nyinge Kornealio. Kornealio kuu anahg Ujudea abea anahg ngaa maa amag lum Juog ne cohng, en maa jo paare cang. Kornealio anahg ngaa me koag ke kwaj yihr Juog kedea ke kony nyoge maa angoohng. Ngo anahg jaabidh yi ketiiba gihr deaj Roama ge cuohn ne ‘Kaahy Liny Itaalya.’ <sup>3</sup> Cahng man e Kornealio ukwahyo, yi laahng cahng, e wuohnjuog aniide niido wa yi laahng e ngo beehn bange kedea e ngo cuohn nyinge kea, “Maahdh yaa Kornealio.”

<sup>4</sup> Maa amaahny Kornealio bang wuohnjuog e ngo amag lwahre ukoohbe kea, “Gihn ngaa me duohng!”

E ngo abeehr wuohnjuoge beehro yihre kea, “Juog cwihnye amihno rihi ke nying kwaj gihri maa ke nying gihn konyi nyoge maa angoohng konyo. Awaahn ni Juog cwihnye ne bang uyuge gihn me beer yihri. <sup>5</sup> Juog daahd ngo unyoadhe dhe yooth gihn nyaahn e wuore kii ngo. Ke nying gihn nu kea oohr nyoge kiin yaai awaahn kan geen Jopa bang ngaa me nyinge Piihter.” <sup>6</sup> Piihter beehda weehno paar nyin me nyinge Cimoane. Paare ne dieng naam duohng.”

<sup>7</sup> Naa a'aay wuohnjuoge e Kornealio yaa tiihj giie ge acuohne bange: yaa tiihj kar ge ariow kedea wa acaaker acielo maa anahg ngaa me wuor lum Juog. <sup>8</sup> Batiene naa akwaan Kornealio gihn ayug ree yihr yaa ni, e ge aohre ke Jopa bang Piihter.

<sup>9</sup> Ruuwow, e jo aohr Kornealio ge adoohng cahng keehd Jopa e Piihter kaa anaa ayedh maalo wiih wod decahngo ne kway Juog <sup>10</sup> Maa athub kahje ke raahm rih Piihter maa ayuohd cwihnye bang cam keraahyo. Abea nye kaa apoohde e cam ke gwiir, e gihn moogo anaa niim yi wonge <sup>11</sup> maa aniide yi maalo e ree ayabe ne wahng kedea e gihn me wa deeh athoohr alwaay piny ke baahde angween. <sup>12</sup> Yi athoohr ngo anaa apahng keehd kwaad laahy kedea kwaad giie me muun ke piny maa kwaad winy me kweehr Judea. <sup>13</sup> Maa alihnge Juog e urubo yihre kea, “Yedh maalo Piihter. Nahg giie ne yi athoohr ucwihdi. A naa acub gen yihri ne camo bang gihn ge caame me beeye.”

<sup>14</sup> Maa abeehr Piihtere ngo kobe, “Kare tooro Juog Ruohdha! Kare tooro ucama caame me kweehr Judea! Wa a ngahyi! A kuu akuong cam keehd kwaad giie me koohb jo paar wane kejea ge reje, ge be cam.”

<sup>15</sup> Maa adog duole rob yihre kea, “Ateeda yihri, yih keá kweer ke cam me beer maa acuba yihri ne camo. Ngo keá them piny udogi ngo ke cuohno ne cam me raaj me kweehr Judea.”

<sup>16</sup> Gihn nu ree abere tiel adahg uyoay athoohr maalo.

<sup>17</sup> Nye kaano anaa apoohde e Piihter daahd yi lum gihn aniide ni, e naa nye kaa anaa awahn jo aohr Kornealioe dhe kala paar Cimoane. <sup>18</sup> Maa apeehy gene, “Ne weehno me ne kan me nyinge Piihter ne?”

<sup>19</sup> E Piihter anaa apoohdo e ngo daahd yi lum gihn aniide ke ngeyo e Wahy Juog aguo beehno urube yihre kobe, “Cuow adahg ge ne dhe kala me daahd yihn. <sup>20</sup> Gwiir rihi, ucii piny bang gen. Yih keá tudo ne aay keehd gen bang gihn a naa akoohbo kejea beehn gene bangi.”

<sup>21</sup> Noono ubeehn Piihtere piny bang gen urube ke gen kobe, “A naa ngaan daahdu. Wu wag waahdh ne?”

<sup>22</sup> Maa abeehr gene ngo yihre kejea, “Kornealio, jaabidh gihn duohng e naa aohr wan bangi. Ngo beehda ngaa me beer keter me wuor lum Juog maa ngaa me lume wuor Judea wuoro. Ateed wuohnjuoge yihre kejea cuohne yihn paare beere gihn daahd Juoge, teedi teedo yihre.” <sup>23</sup> Maa akoohb Piihtere yihr gen kea, “Wu daahd ucaahdha ke wun tiehde? Nea wa gihn nu, e wo uaay keroo. Awaahn ni kar budo ucub yihru.”

Ruwow e Piihter ree agwiire gwiir uaye ke gen ne ci paar Kornealio. Yaa ayiiho mooge maa anaa Jopa ge acidho thioh ke Piihter. <sup>24-27</sup> Ge abud yooth ne cielo ne ci Cejearya. Naa awahn gene paar Kornealio e ngo ayuud gene ke dhe kala ne lor gen. Maa arihng Kornealioe ne rung cunge piny nyum Piihter ne maahdh ngo. Maa amag Piihtere cinge ne yedh maalo wudh tiene e ngo urubo yihr Kornealio kobe, “Yedh maalo a padh Juog. A beehda dhaano now muu uroomo wa yihn.”

Piihter ake caahdho e ngo urubo yihr Kornealio uwahdhe kaa awahn gene wod kaa anaa amahd amahr nyoge yea. Yaa anudo ge anahg jo paare maa gome naa acuohne. <sup>28</sup> Maa arub Piihtere yihr gen kobe, “Keehd wun e ngo ngahyu thioh kejea ngad Judea wa an kare tooro yihre upiie ka maa acielo keehd ngaa me padh Ujudea. Bang gihn beehn yihdh miehyu amahn loohnge giie Judea. Abea anyoadh Juoge yihra kejea rog be poj bang gihn nyoge ge uroomo yi wong Juog. A thioh ka me poja kiin nyoge tooro. <sup>29</sup> E naa gihn abahng e a kuu akweer ke beehno naa aohri nyoge banga. Awaahn ni a adaahd ulihnga ngo yi dhii, gihn ateed Juoge yihri yih Kornealio.”

<sup>30</sup> E Kornealio ake thubo ke rob kobe, “Nihn adahg abar awaahn ni e piny neehn gihn ni, maano e a kway Juog paara yi laahng cahng. Kaano e ngaa maa angaab waare muu uliel ake cuungo nyuma <sup>31</sup> Maa arube yihra kea, ‘Kornealio Juog kwaj gihri alihng kedea giie beey naa atiihyi ge aniide thioh. <sup>32</sup> Awaahn kan oohr dhaano Jopa ne cuohn nyin me nyinge Piihter. Ngo beehda weehno paar nyin me nyinge Cimoane. Paare ne dieng naam duohng.’ <sup>33</sup> E naa gihn aohra nyoge bangi piow piow e a kuu agaalo. Abea beeye noono abeehni nu. Awaahn ni wo nud kan cang maa Juog nud ke won tiehd. Rob gihn akob Juoge kejea teedi ngo yihr wan beere ngo lihng wane lihngo.” <sup>34</sup> Uthub Piihter ke rob yihr gen

<sup>†</sup>9:43 Cimoan tiihye anahg nyong dehne.

<sup>u</sup>10:5 Kiin Cejearya keehd geen Jopa beehda meale 28.

9:40 Mak 5:40-41 9:43 10:6, 32 10:1-8 10:30-33 10:1-2 27:1, 3; Luk 7:2, 5 10:11 7:56 10:15 Mak 7:15, 19

10:19 11:12; 13:2, 4; 15:28; 16:6; 20:22-23; 21:4, 11 10:23 10:45; 11:12 10:25-26 14:13-15; Any 19:10 10:28 10:15; Gal 2:12

10:30-33 10:1-8 10:30 1:10; Luk 24:4 10:32 9:43 10:34 Rom 2:11; Jeam 2:1

kobe, “Aniida awaahn ni kejea Juog daahd uboadhe nyoge cang bekihd tien paajo me kweere ke ngo. <sup>35</sup> Kwaad ngaa tud yih Juog maa utiihye gihn me beer thiw, e ngaan nu yih Juoge yiho bang gihn Juog nyoge ge be kwanye kaa tien paajo. <sup>36</sup> Ngo dhiilu kaa ngahyo kejea Juog Jeacuu aohre bang Judea ne nyoadh dhe yoohn nyaahn kedea ne nyoadh ka doohr nyoge ke Juog kii ngo. <sup>37</sup> Gihn duohng e naa ayug ree ngo ngahyu. Kaa anaa athub Jeacuu ke puohny Gaalili batien kaa anaa awoj Joone piih luogwahy wihe. <sup>38</sup> Giih arob ke nying Jeacuu<sup>v</sup> ge ngahyu cang. Kaa akwany Juoge Jeacuu kedea ucube Wahy Juog maa tee gihre yih ngo ne tiihy giih beey yih nyoge. Noono uwene bang upiny e ngo tiihy giih beey maa e ngo thiehdh yaa rog ge anaa atiihb ukeehg. Giih nu ge arom Jeacuu ke tiihyo bang gihn Juog anaa kure kedea teeg Juog anaa yihre.

<sup>39</sup> “Wa jo oohr, wa anaa anudo naa atiihy giih nu rog gen ke bang wihi piny Judea. Jeacuu abeehn ne naah naa agure ngahy yaadh maa ariihw. <sup>40</sup> Abea keehd maano anaa anahg gene Jeacuu nu, e wahye anaa beehn Juoge ne duu ree noono ucahre batien nihn adahg kedea umeehg Juoge ngo niido. <sup>41</sup> Abea kuu anaa anahg nyoge cang ge naa aniid ngo batien kaa acahre. Anahg wan cog wa yaa anaa akwany Juoge wa naa aniid ngo kedea ucahm wane keehde tiehd. <sup>42</sup> Arob Jeacuu yih wan kejea puohny wane Ciig Beer yih nyoge cang ke bang upiny. E thiw, ateede yih wan kejea nyoadh wane ngo yih nyoge kejea e naa ngaan acub Juoge piny ne ngaa maany luue giih nyoge cang, nyoge me kuow maa nyoge maa athow. <sup>43</sup> Amahr yaa agamloohngjuog ge arubo ke nying Ngad Boadh nyoge naa akob Juoge kea ngo uohre. Awaahn ni a teed ngo yihru kejea Ngad Boadh nyoge ngo abeehno kedea teeda teedo yihru thiw kejea Juog anyoohne giih dhaano ge wiie ke piny nea ngaan nu lum Juog ayiihe.”

<sup>44</sup> Kaano anaa apoohe e urubo nu, e Wahy Juog abeehn rog yaa anaa alihng lum Juog naa arub Piihtere rubo.

<sup>45</sup> Yaa anaa abeehno keehd Piihter tiehd ge acahg cwaahng ke nying gihn acub Wahy Juog thiw yih nyoge me padh Judea, <sup>46</sup> bang gihn ge ake rubo ke dhoy me padh me be lihng e ge poong tee Juog.

Maa arub Piihtere yih yaa abeehno keehde kobe, <sup>47</sup> “Yaa ni niidu kan, Wahy Juog ayoad gene neehn kaa anaa ayoado ngo. Nea neehn maano e gihn me mahn ngo tooro umuoj gen ke piih luogwahy.”

<sup>48</sup> Noono urobe ngo kejea muoj wudh gen keehd piih luogwahy ke nying Jeacuu Ngad Boadh nyoge. Batiene e Piihter amahn gene kejea keá guo aay abea beehde keehd gen tudi ke kar nihn me noog. Gihn nu e abeehdo ke gen neehn kaa arob gene.

### Akuud Yaa Ayiiho Yaa Padh Judea Ayiih Gene Bang Gen

**11** <sup>1</sup> Jo oohr kedea yaa ayiiho naa anudo ke bang yi Jeruucalem alihng gene kejea yaa padh Judea lum Juog awahdh yih gen thiw. <sup>2</sup> Naa adog Piihtere Jeruucalem e yuud ngo kejea gihn awuoje piih luogwahy wudh nyoge Cejearya ngo amaan Judea me mag lum Juog ke dhe yoohn lohng Moaje. Kob gene nea yaa padh Judea ge daahd udoohng gene ne yaa batien Jeacuu e ge dhiil kaa thoamo. Noono ucay gene Piihter kob gene <sup>3</sup> “Yih beehdo Ujudea, gihn e naa acidhi ne weel paar ngaa ma padh Ujudea maa ngo kuu athoam adhaahr ucahmi keehde thiw?”

<sup>4</sup> Maa athub Piihtere ke kwaan kaa athob giih ni rog gen kii ngo kobe, <sup>5</sup> “Beeh roba gihn ameehg an woy piih luogwahy wudh yaa nu. A anaa yi geen Jopa ne liew yaa ayiiho. Cahng man e a ukwahyo e gihn moogo anaa niim yi wonga uniida gihn me wa athoohr me yea laaj e ngo alwaay piny ke yoohn maalo ke baahde angween. Naa awahnhe buuda e ake cuungo. <sup>6</sup> Naa amaanya yi gihn wa athoohr ni, e a niid kwaad laahy maa kwaad giih muun ke piny kedea winy.

<sup>7</sup> Batiene e duon Juog alihnga lihngo e ngo urubo yihra kobe, ‘Yedh maalo Piihter, nahg giih ni yi athoohr ucwihdi.’

<sup>8</sup> “Maa abeehra ngo kejea kare tooro Ruohdh. A kuu akuong cam keehd kwaad giih nu, bang gihn ge giih me kweehr yaa paar wane kweehro!

<sup>9</sup> “Keehdo e Juog acahg rob kobe, ‘Gihn maa aroba kejea ngo ke camo yih keá kweer ke cam ngo kejea ngo kweehru kweehro!’ <sup>10</sup> Gihn nu ree abere tiel adahg uyoay athoohr gihn ni ke maalo.

<sup>11</sup> “Abea e naa nye kaa anaa awahnny nyoge adahg maa aohr banga paan beeda. Ngaa me nyinge Kornealio e naa aohr gen. Kornealio beehda jaabidh yi deaj gihr Itaalya kedea beehda ngaa me beer ke nyoge. <sup>12</sup> E thiw e naa nye kaa arob Wahy Juoge ngo yihra kejea a keá tud ne aay ke yaa ni aohr banga. Yaa ayiiho abiihbeciel giih Jopa ge acaahdho keehd an ne ci Cejearya kedea umon wane cang yi wod Kornealio. <sup>13</sup> Arob Kornealioe yih wan wa yaa anudo kaa aniide wuohnjuog paare ukoohbe yihre kea, ‘Oohr nyoge geen Jopa ne cuohn ngaa me nyinge Piihter. <sup>14</sup> Lubo muu urobe yihru nud beere yih maa jo paari wu uboadh Juoge.’

<sup>15</sup> “Naa aruba yih gen, e Wahy Juog abeehn rog gen wa kwaad kaa anaa abeehne rogo. <sup>16</sup> Maa apara gihn anaa arob Jeacuu naa akoohbe kea, ‘Joon wudh nyoge anaa amuoje kaa piih now naa acube luogwahy, abea Juog wudhu umuoje kaa Wahy Juog.’ <sup>17</sup> Ngo adiehr kejea Juog Wahy Juog acube yih nyoge me padh Judea wa kaa anaa acube ngo yihro naa anaa ayiiho lum Jeacuu Ngad Boadh Nyoge. A beehda ngaa ne mahn piih luogwahy ke woy wudh gen!”

<sup>18</sup> Kaa alihng yaa anaa acay Piihter luub ni, e ngo kuu acahg gene ke cayo keehdo. Abea ge apiih ne leej Juog kob gene, “Juog kar boadh nyoge me padh Judea ngo acube nea anyoohne giih gen maan gene maano.”

### Yaa Wudh Geedhe Mooge Lum Juog Ayiih Gene

<sup>19–20</sup> E Piihter poohd kuu anaa aay ne ci Jopa, yaa ayiiho ge anudo maa anaa agoohd oogo geen Jeruucalem ke nying giih ajohr naa anaa ayug rog gen batien kaa anahg Yijtepen. Goan gen ge awahdh wudh geedhe me bahye.<sup>w</sup> Yihdh kuohn mooge lum Juog na puohny gene cog ke yih Judea giih anaa adag kuohn nu ne beehdo. Abea goan

<sup>v</sup>10:38 Jeacuu muudiihrya gih gen anahg Naajaread.

<sup>w</sup>11:19-20 Geedh nu ge anaa piny me cuohn ne Peaniihcy, Caaypruj kedea Ciriinha.

10:35 Jon 9:31    10:36 Rom 3:25-26; 5:1; 2Kor 5:18; Klo 1:20; Any 19:16    10:38 Luk 4:18; 13:16; Jon 3:2    10:39-40 3:15  
 10:41 1:4; Luk 24:30-31, 41-43; Jon 21:12-13    10:42 17:31; Rom 14:9; 2Tim 4:1; 1Pii 4:5    10:43 13:38    10:44-46 2:4    10:47 8:36  
 10:48 19:5    11:3 10:28; Gal 2:12    11:5-12 10:11-20    11:14 16:31    11:15 2:4    11:16 1:5  
 11:18 13:48; 14:15, 27; 15:4, 12, 22-29; 17:12; 18:5-11; 19:8-10; 20:21    11:19 8:1-4    11:20 Jon 7:35

mooge<sup>x</sup> naa awahn gene yi geen duohng cuohn naa Antiog e ge athubo ke puohny yaa beed geen nu ke lum Juog. Wudh gen kuu acub gene ne cej Judea beere ge ne puohny gene cog.<sup>21</sup> E Juog thiw tee mare acube yih gen ubeehn yaa piny nu me thoohdh maa ayiih gene lum Juog.

<sup>22</sup> Ngo abeehn ne lihngo Jeruucalem kejea yaa padh Judea me thoohdh lum Juog ayiih gene. Noono uohr yaa Jeruucalame Barnaba ne ci geen Antiog.<sup>23</sup> Naa awahn Barnabe Antiog e cwihnye ake mihno bang naa aniide kaa abeehn yaa ayiiho umag gene lum Juog teeg kii ngo. Noono urob Barnabe giith tee aduulo yih gen ne mag lum Juog ke cwihny gen acielo.<sup>24</sup> Barnaba anahg ngaa maa ayiih lum Juog ke cwihnye acielo kedea Wahy Juog anaa yi kuohme maa ngo anahg ngaa me beer keter. Ke nying gihn nu e nyoge mooge me thoohdh ge adoohng ne yaa yiho.

<sup>25</sup> Kaano e Barnaba adaahd dhaano me kony ngo ke puohny nyoge. Gihn nu e kaa apuohny Coale kii ngo apare paro. Noono uaaye Antiog ne ci bang Coal Tarcuj ka me baahr.<sup>26</sup> Naa ayode Coal e ngo akwaye ne beehn ne kony ngo ke puohny Antiog. Naa ayiih Coale e ge abeehn Antiog tiehd maa abeehd gene yea ke wong acielo e ge umahdo keehd yaa ayiiho kedea e ge upuohnyo ke nyoge me thoohdh. Anahg yi geen Antiog e naa kaa acag nying yaa ayiiho ne 'Kriihjtyaane' lum yea, yaa aboadh ke nying Jeacuu Ngad Boadh nyoge.

<sup>27</sup> Anahg nye kaano thiw e naa a'aay nyoge mooge maa yaa agamloohng Jeacuu ke yoohn Jeruucalem ubeehn gene Antiog.<sup>28</sup> E dhaano acielo kiin gen me nyinge Agabo maa arub Wahy Juoge yihre, ngo a'aj maalo maa ateede gihn muu uyug ree cahng moogo. Arobe kejea deeh kahj me duohng upahdh wudh nyoge ka me cahng. (Kahy ngo anaa apahdho maano e Klaawdio e naa jaah ne mag paajo)<sup>29</sup> Kaano e yaa ayiiho lubo agwiir gene gwiir ujaar gene ngiihny me oohr bang yaa ayiiho giith beed Judea ne kony gen yi kahj.<sup>30</sup> Naa ajwaar gene ngiihny e Barnaba kedea Coal ge ake oohro Jeruucalem ne kahl ngiihny acong.

### Dhog Wuud Karkoohn Ge Ayab Juoge Yihr Piihter

**12**<sup>1</sup> Ge anaa puohny Barnabae maa Coale Antiog e naa kaa abeehn Eroade<sup>y</sup> ruohdh uyuge giith ajohr me reje mee rog yaa ayiiho mooge.<sup>2</sup> Maa ateede ngo yihr acaakere kejea nahg Jeamij umiih Joon Jebeade. Noono ungol wiihe oogo ke pala uthowe.<sup>3</sup> Naa aniid Eroade ngo e gihn atiihye apahdh yi cwihny jo doong Judea, e bar maalo umage Piihter thiw.<sup>4</sup> Naa amag Piihtere e ngo akedh yi karkoohn maa awiie yi cing akuude angween giith acaaker karkoohn ne koaro. Akuud acielo yea anaa acaakere angween. Bang gihn anaa agweehg Eroade beere Piihter kahle ke nyum nyoge ne kihmo ke thoo batien Yaan Amono.<sup>a</sup>

<sup>5</sup> Abea e ane Piihtere yi karkoohn nu e yaa ayiiho ge anaa yi kway Juog keraahyo ke nyinge.

<sup>6</sup> Piihter anaa abudo kiin acaakere ariow giith atuohye rog gen ke gele yi diih waahy cahng akoohb Eroade kejea ngo kahle ke nyum nyoge ne kihmo. Thiw acaakere mooge ge anaa ke kuro dhe baab duohng gih karkoohn.<sup>7</sup> Yi diih waahy nu e wuohnjuog abeehn ne cuungo buud Piihter maa amage utog ngo ne tahng ngo. Naa atahng Piihter, e niid wuohnjuog kedea e piny ree ameenye. Maa adog Piihtere cwaahng. Maa arub wuohnjuoge yihre kobe, "Aj maalo piow piow." Nye kaano e gele ge anaa lwang piny.

<sup>8</sup> Batiene e wuohnjuog acahg rob kea, "Ngaab waaro gihri maa ngaab wuor yi tieni ubuodhi batiena." Ungaab Piihtere waaro gihre kedea ungaabe wuor yi tiene ubuodhe batien wuohnjuog.<sup>9</sup> Noono e Piihter ake caahdho ke batien wuohnjuog ne ci oogo yi karkoohn uwahdhe kaa awii gene karkoohn piny. Mar Piihter cuohne kea ngo beehda laahg.

<sup>10</sup> Ge akahnho ke wudh akuud acaakere giith umodho kedea ucahg gene kahnho ke wudh riown akuude giith acaakere uwahdhe kaa atoohng gene dhe baab gih ngiihnyo naa aciehg dhe oaj keehde. Baab ngo beehda baab me yahb yi geew. Noono uyab baabe ree e keede yih gen. Uci gene oogo ne loony loony kedea ukwany gene bang acaar kwanyo uwahdhe kaa a'aay wuohnjuoge udoohng Piihtere e keede.

<sup>11</sup> Kaano e ngo angey Piihtere ngeyo naa adiehr kejea ngo abeehn oogo yi karkoohn. Maa akoohbe kea, "Wa gihn padh laahg! A kaa abeehn oogo yi karkoohn ne! Juog a akahle oogo yi cing Eroade maa jo doonge giith wan naa adaahd unahg gene an."

<sup>12</sup> Naa angey Piihtere ngo arumo kejea e tooro yi karkoohn, e ngo acaa paar miih Joon Maarko. Paan ngo nyoge me thoohdh ge anaa amahdo yea ne kway Juog ke nying Piihter.<sup>13</sup> Naa atuong Piihtere dhe baab oaj e nyaakow me nyinge Rooda maa ngad tiih paajo ake rihngo dhe baab.<sup>14</sup> Maa apeehe ke ngaa ne dhe baab. Abea naa angeye duon Piihter e cwihnye ake mihno keraahyo udooge doog ke ngweej ne rob ngo yih nyoge kejea Piihter ne dhe baab yi kala.

<sup>15</sup> Maa abeehr gene ngo yihre kob gene, "Yih ake muohle nyal!" E ngo poohd e ngo niing Rooda niingo kea, "Nye yaage! Beehda Piihter adiehr muon e ne cuung yi kala." E ngo acahg gene ke beehro, "Ka moogo e beehda atiihbe giithe."

<sup>16</sup> E Piihter adhal ke tuohng baab oaj. Noono ubeehn nyoge ne yab dhe baab. Naa aniid gene Piihter e ge ake cwaahng ne cohg unahg gene ne juuj ke rob.<sup>17</sup> Maa abeehn Piihtere utihnge cinge maalo kejea leng gene. Noono uteede gihn ayug ree naa abeehn Juoge uohre wuohnjuog ne luny ngo oogo yi karkoohn. Maa arobe ngo yih gen kejea rob gene gihn ayug ree yih Jeamij maa yih yaa ayiiho cang. Ubeehn Piihtere uaaye ucea ka moogo.

<sup>x</sup>11:19-20 Yaa ayiiho giith ni ge yaa piny cuohn ne Caaypruj maa Ciriinha. Abea naa a'aay gene Jeruucalem e ge kuu adog piny gen, ge acaa Antiog.

<sup>y</sup>12:1 Eroade Ariijtoobuuluj Eroade

<sup>z</sup>12:3 Piihter anaa amag ke dhe kodh yi Luuro. Dwaahn nu e naa dwaahn yug Judea giith yaay yih Juog. Yaay yug gene bang gihn miehy gen Juog anaa bar ke wudh gen naa anahg Juoge nyethea cuow yaa Micih. Yaay beehde nihn abiihberiw.

<sup>a</sup>12:4 Yaa Judea yih gen ne yaay me yug gene ke nying wong ne par kaa akahl Juoge gen oogo piny Micih. Yaay beehda nihn abiihberiw kedea yiidh nihn nu e ge cam amono me bahdh. Ke nying gihn nu e ne cuohne ne Yaan Amono.

11:21 2:41    11:23 13:43; 14:22; 15:32; 16:40; 18:23; 20:1, 28-31    11:25 9:30    11:27 13:1; 15:32    11:28 21:10

11:29-30 12:12, 25; Rom 15:26; 1Kor 16:1; 2Kor 8:4; 9:2, 12; Gal 2:10    12:4 4:3    12:5 Jeam 5:16    12:7-10 5:19

12:12 Joon Maarko 12:25; 13:13; 15:37; Klo 4:10



<sup>18</sup> E anahge ke nyango arumo e acaakere giih koar wudh gen anaa cohd ke gihn ayug ree rih Piihter. Maa atud gene ke gihn uyug rog gen. <sup>19</sup> Ubeehn Eroade urobe ngo kejea daahd gene Piihter. Ngo acej abea kuu ayoad. Naa abahnge Piihter kuu ayoad e Eroade arubo kejea yoad acaakere giih anaa ke kuro cahng nu nahg gen.

Batien gihn nu, e Eroade ake aay ubeehne Cejearya ne beehdo yea tudi.

<sup>20</sup> Eroade yihre anaa mahn keehd yaa geen Taayr kedea yaa geen Ciihdoan. Maa abeehn yaa wudh geedhe giih ni arumo umad gene lubo beere ge beehn bang Eroade tiehd. Ge akuong ci bang Blaajtuj<sup>b</sup> umodho beere ge konye konyo ke rob yih ruohdh. Noono ucidh gene bang Eroade ne rob ke nying doohr bang gihn caame ge ngeew gene kii dhaahr Eroade.

<sup>21</sup> Yi cahng akob naa Eroade urubo ke nying doohr, e ngo ake ngahbo keehd waay ruohdhe. Noono upiie wiik koom gihre urube yih yaa anaa abeehn bange. <sup>22</sup> Naa athume ke rob arumo, e nyoge cang naa anudo wiik ngo aweng gene oogo ke giih toohd e ge teeng koohdh gen kob gene, “Yaahy! Wa gihn padh duon dhaano! Wa ngo beehda Juog ke ngude e naa arubo!” <sup>23</sup> Nye kaano e Eroade angol wuohnjuoge ke maalo kaa atwaany bang gihn abahnge ngo kea jaahyo yih nyoge kejea e be rom ke Juog. Maa athub tuohnge ke cam yeye batiene e thow.

### Nyoge Mooge Me Thoohdh Lum Juog Ayiih Gene

<sup>24</sup> Maa abeehn nyoge me thoohdhe ulihng gene lum Juog kedea uyiih gene ngo.

<sup>25</sup> Naa abeehn Barnabe ge ke Coal uthum tiihy gene naa abeehn gene ke nyinge Jeruucalem, e ge ake aaye tiehd keehd Joon Maarko, ne ngaa me kony gen ke tiih.

### Barnaba Maa Coal Ge Akwany Juoge Ne Puohny Kuohn Bahye

**13** <sup>1</sup> Kiin yaa ayiiho giih anaa Antiog, nyoge maa yaa agamloohngjuog kedea yaa puohny lum Juog ge anaa anudo. Yaa nu ge anahg ge Barnaba kedea Cimon Macaahr, Lucio ngad Ciriinha maa Manem gom Eroade e nahg muudiihr kedea Coal arumo. <sup>2</sup> Yi nihn maa anaa abahnge yaa ayiiho ge be cahmo ke nying cub wudh gen ne kway Juog cog, e Wahy Juog ake rubo yih gen kea, “Barnaba maa Coal ge daahda daahdo ne waahdh ke wudh miehr beere lum Juog puohny gene puohnyo yih nyoge. Gwiiru gen yih Juog ke nying tiihy nu.” <sup>3</sup> Naa ateed Wahy Juoge gihn nu yih gen, e ge abar maalo ke kwaj ke nying Barnaba maa Coal. Batiene e cing gen acub gene ke wiik Barnaba kedea wiik Coal ne cub gen yi tiihy Juog kedea ne wiikw gen.

### Barnaba Maa Coal Lum Juog Apuohny Gene Caaypruj

<sup>4</sup> Barnaba ge keehd Coal maa Joon Maarko ge aci Celuucya neehn kaa aohr Wahy Juoge gen. Noono uay gene keehd baabuur Celuucya ne beehn wiik thuur Caaypruj. <sup>5</sup> Naa abeehn gene paajo me nyinge Calamij, e ge acaa yi wuud amaad giih yaa Judea ge nii geen nu ne puohny lum Juog.

<sup>6</sup> Maa acaahdh gene ke bang yi thuur uwahdhe kaa awahn gene geen Papoj. Yi geen ni e naa anaa aroohm gene keehd Ujudea me nyinge Elimaj Waahd Jocwa. Ngo anahg ngad yaadh me teed toohd kea e agamloohngjuog. <sup>7</sup> Elimaj anahg gom maamuur gih thuur gihn abeehn gene yea ni. Maamuur me nyinge Cerjo Paaulo. Ngo anahg ngaa me wonge teeg keter. E nahg cahng ni arumo e maamuur Barnaba ge ke Coal ge acuohne cuohno paare beere lum Juog lihng lihng. <sup>8</sup> Abea Elimaj acuungo yi yoohn Barnaba maa Coal beere Cerjo lum Juog be yiie. <sup>9</sup> Noono maa amaahny Coale bang ngad tiehd gihn teeg mee bang gihn rob me teeg daahd Wahy Juoge kaa cubo yihre. <sup>10</sup> Maa arube kea, “Ngad toohde! Yih ngaa maa gihn e yeyi apahng ke giih waane! Adhaahr yih daahd umedi Juog! Yih ka daahd ngo beere luub arob Jeacuue ge uwulo ne! Adoohng e yih urubo yih ngaa daahd ulihng lum Juog kejea giih toohd kea lihng! <sup>11</sup> Beehda gihn e nuu ukony yih yi cing Juog tih! Me neehn awaahn kan e wongi uoor uwahdhe ka ubeehn Juoge uyabe ngo.” E Elimaj deeh gihn me col aguo ne niim yi wonge. Uthube thubo kaano keehd waahdh e ngo man piny e daahd ngaa me piej en. <sup>12</sup> Maamuur naa aniide giih ayug rog gen e lum Juog abeehne ke ne yiie ke cwiinye cang ke nying kaa arub Poale ke nying Jeacuu kii ngo. (Nying Coal moogo anahg Poal).

### Ge Poal Ge Awahn Gene Antiog Gih Piciihdya Ne Puohny Nyoge

<sup>13</sup> Poal keehd jo waahdhe ge aay ke baabuur Papoj ubeehn gene geen Pearga yi muudiihrya gih Pampiihlya. Kaano e naa abeehn Joon Maarko udoge Jeruucalem. <sup>14</sup> Maa a'ay Poale keehd Barnaba ubar gene geen Antiog gih Piciihdya. Naa anahge Cahng Juog, e ge acaa yi wod amaad maa apiih gene. <sup>15</sup> Batiene kaa athum ngaa kwaahno yi kitaab loohng Moaje kedea giih agweed yaa agamloohngjuoge, e yaa doonge giih wod amaad lubo aohr gene oohro yih Poal maa Barnaba kob gene, “Jo paar wan, cwiiny wan ne bange urubu yih nyoge ke luub tee aduulo.”

<sup>16</sup> Maa abeehn Poale uaje maalo kare kedea utihng cinge maalo kejea leng gene. Maa arube kobe, “Wu jo paar wan, wu yaa Yijarael maa wu yaa padh Judea ni, wu cang ge abeehn kan ne wuor Juog tih, lihngu gihn roba. Juog gihn wuor wane, wa yaa Yijarael ngo ngahyu. <sup>17</sup> Ngo ngahyu thiw kejea e naa akwany ge kuow wan naa acoon. Noono ubeehn Juoge umeehge ge thoohnho kaa anahg gene aleye yi piny Micih. Abea ge akahl Juoge oogo Micih ke teeg mare. <sup>18</sup> Ubuohje ke gen ke run jiehariow yi ukang, keehd maano abahnge Juog kuu anaa cub gene yi cwiiny gen nu. <sup>19</sup> Thiw thaahy abiihberiw ge ameehg Juoge taayo ukeedh gene kedea uluuny yaa Yijaraele piny gen ge cuohn ne Kanaan. <sup>20</sup> Na nahg Juog e ne kwany ngaa duohng nyum Judea ke run me thoohdh naa athube kii cahng ataaye thaahy nu abiihberiw. Naa akwany Camweel agamloohngjuog ne ngaa duohng, e anahg run jiehahiije angween ke jiehariow wonge apaar batien kaa athub Juoge ke kwany ngad nyum Judea.

<sup>21</sup> “Kwaad ngaan na kwany Juoge e naa ngaan na lug giih paar Judea. Kaano e yaa Yijarael wong Camweel akway gene beere ngo ukwahnyo kiin gen ke ngaa duohng yaa lam. Gihn nu e Coal ge waahd Kij, e ngad dhe wod Benjamin, e

<sup>b</sup>12:20 Blaajtuj anahg ngaa me duohng yi dhaahr Eroade.

naa ameehg Juoge kwanyo yihr Camweel ne ngaa duohng yaa lam mar umodho gihr yaa Yijarael. Coal abeehdo yi ruohdh ke run jiehario. <sup>22</sup> Coal akahle oogo yi ruohdh naa abeehn Coale udahle lum Juog. Noono ucube Deabid kuowo wiih koom bang gihn ngo anahg ngaa maa anhyaar Juoge. Gihn anaa arob Juoge ke nying Deabid ngo ngahyu naa akoohbe kea, 'Deabid, waahd Jeci e naa ngaa me nhyaara, e naa ngaa tiihy kwaad gihn daahda.'

<sup>23</sup> "Yaage, cwihnya ne rob ke nying kwaad Deabid ge nyinge awiihj. Ngaan nyinge Jeacuu. Jeacuu Juog e naa aohr ngo ne boadh wan wa Judea wa kaa arobe ngo kuu umodho. <sup>24</sup> E poohde e Jeacuu kuu athubo ke tiihye, e Joon yaa Yijarael me thoohdh ge abeehne ne puohnyo kejea maan gene anyoohne giih ayug gene kede a wii gene ge piny beere wudh gen ke muojo ke piih luogwahy. <sup>25</sup> Naa acahng kaa athum tiihy Joone, e Joon anaa arubo kea, 'A padh ngaan anaa arob kejea ngo ubeehn ke nying boadh nyoge. Ngaan ngo ubeehn kaa batiena. Ngo ngaa me duohng nyuma me kwaad gihre me kooohbe kea tiihya ngo e ngo tiihya tiihyo yihre. Keehd wuoy tiene ge be roma cod yi tiene ke nying gihn duohng nyuma.'

<sup>26</sup> "Wu jo paar wan, yaa Yijarael ge kwaay Abraahm kede a wu yaa padh yaa Yijarael, wu ge wuor Juog, Juog dhaano anaa aohre yihro ne nyoadh ka uboadhe won kii ngo. <sup>27-29</sup> Yaage, modhu ubahng giih apar jo doonge maa yaa beed Jeruucalem ge be paru. Ke nying cahng kway Juog, cahng becien nihn, e ge umahdo ne kwaan giih agweed yaa agamloohngjuoge coon. Abea poohd dahng e gihn me yoad gene yihdh giih nu agweed tooro, e naa gihn bahng ngo be yiih gene kejea Jeacuu e naa Ngad Boadh nyoge. Noono uteed gene ngo yihr Pilaato kejea gure Jeacuu ngahy yaadh maa ariihw abea kihd awuohj me thiin maa atiihye tooro me nahge ke nyinge. Pilaato anaa akweer abea naa ateel gene yea lubo e gihn adaahd gene ayiih Pilaate yihr gen. Naa athum Judea ke tiihy giih daahd gene ke tiihyo rih Jeacuu, e ngo akahl yaae ge na caahdhe keehd gen oogo wiih yaadh ukoany gene ngo. E naa kaa abeehn giih anaa agweed yaa gamloohngjuoge kejea ge utiihy rog gen yi thon Ngad Boadh Nyoge utiing gene rog gen kar gen. <sup>30</sup> Abea wahye anaa abeehn Juoge ne duog ree ucahre. <sup>31</sup> Batién cahro e ree na nyoadhe nyoadho ke kar nihn me thoohdh yihr yaa na caahdhe keehd gen ke bang Gaalili maa ke bang Jeruucalem. Yaa nu ge naa yaa arob adiehj cahr Jeacuu yi thone kede a gen naa arob leebe yihr yaa Yijarael.

<sup>32-33</sup> "Wa abeehn ne rob Ciig Beer yihru. Ciig Beer ge anaa arob Juoge kejea ngo uyuge yihr ge kuowo wo yaa Yijarael. Giih nu ayug Juoge wa kaa ateede ngo yihro wo nyethen Yijarael kede a ngo ayuge thioh yihr nyethen nyoge me padh yaa Yijarael. Ngo ayug Juoge naa abeehne umeehge Jeacuu cahro yi thone neehn kaa anaa agweede yi kitaab mar Wahy Apoong Juog kejea,

'Ke tihng unghy nyoge cang,

e yihng naa ngaa acuba ne rob leebe neehn nyethiin yeya.'

<sup>34</sup> Kede a gihn e naa gihn arob Juoge ke nyinge ne nyoadh ngo kejea Jeacuu ngo buu ucahg thoo keehdo,

'Wu umuoja keehd ruohdh me beer ne cohng

unahge e naa ruohdhu cog, ruohdh moogo tooro.

Wu uneehn en e be thow bang gihn ngo ubeehdo tiehd keehd wun.

Gihn utiihya bang gihn beehda leeb

maa ateeda yihr Deabid ree be rome waaro.'

<sup>35</sup> Thioh coon Ngad Boadh nyoge anaa arubo ke nyinge yi Wahy Apoong Juog naa akoohbe kea,

'Ngo ngahya kejea Juog kuohma buu umeehge tobo

bang gihn a beehda Waahde maa anhyaare!'

<sup>36</sup> "Adiehr muon Deabid yaa dhaahre ge akaahne beer mee. Naa athum tiihye yihr Juog e ngo athow, ukoanye kede a kuohme atob yi buur. <sup>37</sup> Abea naa anahge mar Jeacuu e ngo atahng Juoge naa athowe ubahng kuohme be tob yi buur.

<sup>38-39</sup> "Wu yaa nud kan cang, ngo ateed wane yihru kejea anyoohne giihu naa ayugu nyum Juog ge wii piny yihru nea lum Jeacuu ayiihu. Keá paru ke wudhu kejea loohng Moaje anyoohne giihu ge wuunye ke oogo. Gihn wuunye gen oogo beehda yiiho gihru ne yiihu Jeacuu ne Ngad Boadh Nyoge. <sup>40</sup> Cubu nyingu piny beer mee ubahng kwaad giih arob yaa agamloohngjuoge wu be yoad gene. Anaa arob Juoge yihr gen kea,

<sup>41</sup> 'Lihngu gihn wu yaa adhaahr gihn arob Juoge,

liihdhu ne naang uwahdhe kaa thow!

Bang gihn kwaad gihn utiihya

e wu poohd kuow padh gihn muu uyiihu

keehd me rob ngaa mooge lum yea yihru.'

<sup>42-43</sup> Naa athum nyoge ke kwaj, e nyoge me thoohdh ge adaahd udog gene puohny ge Poal ke lihngo maa ateed gene ngo yihr ge Poal kejea dog gene duuo Cahng Juog gihn beehn ni. Kaano a'aay ge Poale maa Barnaba, e batién gen abuodh nyoge mooge. Maa apuohny gene gen ke yihdh nihn nu kejea nhyaahro gihr Juog yoad kaa dhe yoohn yiih lum Jeacuu. Goan yaa apuohny yihdh nihn nu ge anahg Judea kede a goan mooge ge anahg yaa beed geen nu abea rog gen alog gene ne Judea ke dhe yoohn ka wuor gene Juog kii ngo.

<sup>44</sup> Naa anahge Cahng Juog arumo, e nyoge me thoohdh ge ake waahdo ke bang yi buur geew ne lihng lum Juog bang ge Poal. <sup>45</sup> Naa aniid jo doong Judea ngo e nyoge me thoohdh amahdo, e cwihny gen arahnyo urob gene giih me reje rog ge Poal kede a ukob gene ngo kejea Poal rob giih toohd. <sup>46</sup> Abea naa abeehn Poale maa Barnabe unghy gene ngo kejea yaa ni ge akweer ke yiih lum gen e ge arub oogo e kihd lwahr tooro rog gen kob gene, "Wu Judea giih dhahl lum wan, nea ne nahg kare ne cohng, e ne nahg wun ne ne kuong lum Juog ke lihngo umodho bang wan. Abea naa akweeru kweer ke yiih lum Juog, e wu keedu wu naa ayug rogu ne kwaad nyoge me boadh wahy be yoadu. Wu uwii wane ucidh wane ne puohny yaa beed geen ni. <sup>47</sup> Lum arob Juoge yihr wan teeg mee yea be woj wane piih. Ateede kea,

'Lubo aroba yihru ne cidho ke bang wudh geedhe me bahye.

Teedu ngo yihr yaa yihdh geedh nu

kejea kihd ngaa uyihih luma ngo uboadha.’ ”

<sup>48</sup> Naa alihng yaa padh Judea gihr arob ge Poale, e cwihny gen ake mihno maa arub gene kejea, “Lum ni beer ne cohg.” Noono udoohng yaa akwany Juoge bang uboadhe wahy gen ne nyoge maa ayiiho.

<sup>49</sup> Gihn nu e nyoge me thoohdh lum Juog abeehn gene ne lihngo. <sup>50</sup> Abea yaa Judea gihr alyaaahb ayug gene naa acoam gene yihdh jo doong paajo maa yihdh maahn yaa padh Judea, maahn me doonge me ngahy paaje kedea maa yaa wuor Juog. Yihdh yaa ni acoam gene noono ubeehn nyoge utaaahny gene rog ge Poal maa Barnaba uwahdhe kaa adhiil gene aay. <sup>51</sup> Maano e ge Poal maa Barnaba ge a'aay e dhab tien gen adhoohng gene ne nyoadh ngo yihr Judea akweer ke lihng lum Juog, kejea ge wag kaa cuohno ne Judea. Kaano e ge a'aay ucidh gene Yikoohnya. <sup>52</sup> Keehd maa anaa a'aay ge Poale, e yaa ayiih lum Jeacuu ge abeehdo e cwihny gen med bang gihn ge amuoj Wahy Juoge ke med cwihny kedea kar beehd beer ke rog anyoadhe yihr gen.

### Ge Poal Lum Jeacuu Apuohny Gene Yikoohnya

**14** <sup>1</sup> Naa awahnh Poale maa Barnaba yi geen Yikoohnya, e ge acaa yi wod amaad gihr Judea ne puohny nyoge. Ge apuohnyo e ge rubo kaa nying Jeacuu kedea maa abeehn nyoge me thoohdh uyihih gene lum ge Poal. <sup>2</sup> Abea Judea maa akweer ke lum Jeacuu neehn yaa anaa akweer Antiog gihr Piciihdya ge anudo. Noono uthub gene ke maahd ge Poal maa yaa ayiih lum gen. Thiw yihdh yaa yi geew mooge ge acoam gene udhiil cwihny gene rahnyo rog ge Poal maa yaa ayiih lum gen. Gihn nu e yaa ni thiw ge Poal amaad gene maahdo. <sup>3</sup> Abea keehd maano acoam yihdh nyoge nu, e ge Poal anaa aceng yi geen nu keree e ge rob lum Jeacuu yihr nyoge e lwahr tooro rog gen. E Juog thiw tee acube yihr gen ne tiihy gihih me gaahy nyoge ne nyoadh ngo kejea gihih rub gene ke nying gen ge beehda adiehr. <sup>4</sup> Gihn nu e geew ree apaahng paahngo ne dahg, yaa ne kur Judea naa akweer ke puohny ge Poal kedea yaa ayiih puohny ge Poal. <sup>5</sup> Abea kihde now, yaa Judea maa yaa padh Judea, e kuu ayiih lum ge Poal, lubo amad gene ke piny. Lubo amad gene maa jo doong gen beere Poal maa Barnaba ge ke bahno ukedh ngwiilo rog gen. <sup>6-7</sup> Kaa angey ge Poale gihn adaahd ke yugo rog gen, e ge agoohd yi muudiihrya gihr Liikoanya e nahg geedh Lijtera maa Derba yea. Noono maa apuohny gene Ciig Beer ge rubo ke nying Jeacuu ni yihdh geedh Lijtera maa Derba kedea ke bang yihdh miehy cahng ke gen.

### Gihih Ayug Rog Gen Derba Kedea Lijtera

<sup>8</sup> Yi geen Lijtera, nyin moogo maa abab piny anaa anudo me kuu akuong waahdh ke kaa anyuole nyuolo. <sup>9</sup> Ngo anaa apiih ne lihng luub Poal. Maa aniid Poale ngo ne ngaa maa ayiiho ke cwihnye beehd kedea rom kaa thiehdho. E Poal nyin amaanye duugi <sup>10</sup> maa arube yihr ngo e duone atihng maalo kea, “Aj maalo ucuungi wudh tieni ne cohg.” E nyin ni apaahr maalo ucuunge wudh tiene uthube ke wen piny.

<sup>11</sup> Naa aniid gihn ayug Poale ni, e nyoge anaa juuj ke rob ke dhe Liikoanya kob gene, “Niidu gihn ayug yaa ni! Wa ge tiihy gihih yug Juoge! Nye yaage pahdh joohy gihih beed maalo ge naa alog rog gen ne nyoge ubeehn gene piny ne!”

<sup>12</sup> Noono arumo maa acag gene nying Barnaba ke nying yaanh gihr gen e cuohn ne Jaayo, e nying Poal ke nying yaanh gen e cuohn ne Ehrmej, bang gihn anahg Poal e ne rubo. <sup>13</sup> Kaano e ngaa wiihe ne yaanh cuohn ne Jaayo maa yaa batiene ge adaahd nahg miehre ke nying jo oohr neehn ka na yug gene ngo ke nying Jaayo. Gihn nu e miehre kedea thiiw ge akedh gene dhe wod wuor yaanh Jaayo yea. Wod ngo anaa ageer dhe geew.

<sup>14</sup> Kaano e nyoge aohr bang ge Barnaba ne cuohn gen kar yaay. Naa alihng ge Poale gihn daahd nyoge ke tiihyo ke nying gen, e ngo amaan gene. Noono ugoohd gene kaa amahd nyoge yea e ge ukwaago kob gene, “Cuungu do! Gihn nu keá themu piny!” Kaa awahdh gene e ge arubo yihr nyoge kob gene, <sup>15</sup> “Yaage, gihn daahdu ke yugo keá themu piny. Ngaa maa Juog tooro kiin wan. Wa nyoge now me neehn wun. Wa abeehn kan ne puohny wun ke lum Juog Aciehg. Juog gihn acag maalo ke piny maa laahy kedea nahme maa gihih beed yihdh gen. Wa daahd unyoadh wane kaa anhyaar Juog Aciehg wun kii ngo. Noono unahge ke en ne wuoru kedea beere yiehdhe gihih gihr nying gen tooro ge be cahgu ke wuoro. Thiw beere gihih remo be cahgu ke naah yihr yiehdhe gihih gihr nying gen tooro ni. <sup>16</sup> Umodho coon Juog wu anaa wiie uyugu kwaad gihih daahdu ke cwihnyu. <sup>17</sup> Abea keehd maano e Juog beeye na nyoadhe nyoadho ke yoohn kwaad gihih beey naa atiihye. Kodh cube cubo yihru maa alwaa gihih nyepinye ucieg yihdh puohdhu. Juog e ne cub cam yihru uyahngu kedea e ne cub med cwihny yihru. Juog gihn yug kwaad gihih nu e ne dhiilu ke wuoro.” <sup>18</sup> Abea keehd maano arub ge Poale yihr gen wa maano nu, e nyoge poohd dahng e ge adaahd ngo unahg gene gihr remo piny rog jo oohr ne wuor gen wa yiehdhe. Abea naa abuhj ge Poale ke rob yihr gen duugi e wudh gen adhiil gene ke waaro.

<sup>19</sup> Kaano e Judea maa abeehno ke yoohn Yikoohnya maa Antiog gihr Piciihdya wudh nyoge alog gene ne maan Poal maa Barnaba. Maa ataahny gene ke rih Poal arumo ubahn gene ngo keehd leele, uywaay gene ngo oogo loo geew cuohn gene e ngo athow. <sup>20</sup> Abea naa abeehn yaa ayiiho bang Poal ne maanye, e Poal a'aj maalo piny kaa aywaaye yea. Noono udo Poale kii buur geew keehd gen. Naa aruu pinye, e Poal maa Barnaba ge a'aay uci gene Derba.

### Ge Poal Ge Aduuo Antiog Gihr Ciihrya

<sup>21</sup> Yaa geen Derba ge apuohny Poale maa Barnaba ke Ciig Beer maa ayiih nyoge me thoohdhe lum Juog. Thiw ge ake rubo ke luub tee aduulo yihr yaa ayiiho. Batiene e ge ake doog kuu wudh tien gen udog gene Lijtera kedea Yikoohnya maa Antiog gihr Piciihdya. <sup>22</sup> Noono e ge acaahdho e ge urubo yihr yaa ayiiho kejea mag gene lum Juog ke cwihny gen me teeg mee bang gihn ngaa ayiih lum Juog gihih ajohr me teeg ge dhiile kaa guumo beere Dhaahr Juog yoade yoado. <sup>23</sup> Ke bang wudh geedh acaadh gene e ge Poal nyoge na kwany gene kwanyo me wiie gene akuud yaa

ayiiho yi cing gen. Batiene ka akwany gen, e ge akwahyo kedea ukweehr gene cam ne cub gene yi cing Juog. Juog gihn nhyaar gene beere ge dooje dooje.

<sup>24–26</sup> Batiene e ge ake thubu ke do Antiog<sup>c</sup> geen anaa acub jo oohre gen yi cing Juog. Yi waahdh doog gihr gen noono, e ge caahdh e ge puohny nyoge. <sup>27</sup> Naa abeehn gene Antiog, e yaa ayiiho acong gene ne dug. Noono uyoad gene kwaad giid doong naa atiihy Juoge ke nying gen yihr yaa wudh geedh akaahn gene ukwaan gene gen yihr gom gen. Ge arubo thiw ke nying kaa abeehn Juoge uyabe dhe yooh yihr yaa padh Judea ubeehn gene uyiih gene Ciig Beer. <sup>28</sup> Poal maa Barnaba ge anaa aceng keree keehd yaa ayiiho giid Antiog gihr Ciihrya.

### Amaad Gihr Jeruucalem Ke Nying Yaa Ayiiho Me Kuu Athoam

**15** <sup>1</sup> Nyoge mooge ge anaa abeehn Antiog ke yoohn Jeruucalem. Noono uthub gene thubu ke puohny akuud yaa ayiiho ke kwaad puohny me ne keede kob gene, “Wu yaa kuu athoam nea wu be ke thoamo wa kaa arob loohng Moaje ngo e ka me boadh Juoge wahyu tooro.” <sup>2</sup> Puohny ni deeh peehm akahle kiin yaa ni keehd ge Poal maa Barnaba. Naa adoohng peehme duohng kiin gen, e Poal maa Barnaba kedea yaa Antiog mooge ge akwany ne ci Jeruucalem bang jo oohr maa jo doonge ne rob ke nying lum ni kob naa thoam yaa padh Judea beere ge boadh Juoge boadh. <sup>3</sup> Gihn nu e akuud yaa ayiiho gihr Antiog Poal maa Barnaba ge awiihw gene naa a'aay gene. Abea naa acaahdh gene caahdho e ge cor yihdh geedh Peaniihcya maa Camaarya nu, e ge caahdh e ge teed dhe yoohn kaa abeehn nyoge me padh Judea uyiih gene lum Juog. Naa aliing akuud yaa ayiihoe luub ni, e cwihny gen ake mihno ne cohg. <sup>4</sup> Naa awahn gene Jeruucalem, e ge alor akuud yaa ayiihoe maa jo doonge beer me. Noono ukwaan gene giid ayug gene yihr yaa anaa Jeruucalem. Giid ayug gene ke tee gihn acub Juoge yihr gen.

<sup>5</sup> Abea e yaa Paarijea maa adoohng ne yaa ayiiho ge a'aj maalo ungewel gene ngo piny kob gene, “Nyoge me padh Judea ge dhiil ka thoamo kedea ke robo yihr gen kejea yug gene kwaad giid arob loohng Moaje cang.”

<sup>6</sup> Kaano arumo, e jo oohr keehd jo doonge cang, wudh gen amad gene mado beere yi lum ni maany gene maanyo ne cohg. <sup>7</sup> Batiene kaa arub nyoge ke deeh ka me laaj, e Piihter a'aj maalo urube kobe, “Jo paar wan, ngahyu thiw kejea coon umodho Juog a naa akwanye kiin wun ne ci ne puohny Ciig Beer yihr nyoge me padh Judea beere lum Juog beehn gene ke ne lihng maa uyiih gene ngo thiw. <sup>8</sup> E Juog ngaa ngahy giid yihdh aduun nyoge cang Wahy Juog acube yihr yaa padh Judea neehn kaa acube ngo yihro ne nyoadh ngo kejea ge thiw, ge adoohng ne nyoge maa ayiih lum Juog neehn won. <sup>9</sup> Juog kiino keá pojo keehd gen, bang gihn anyoohne giid gen ge awiie piny thiw ke nying gihn ayiih gene lum Juog. <sup>10</sup> Juog atumu ne cohg kedea dhee akalu naa acubu adoohdo wudh yaa padh Judea. Adoohdo me kuu anaa arom ree ke tiehdo yihr ge kuowo naa acoon kedea keehd won e nud awaahn ni. <sup>11</sup> Abea yiiho gihro e naa aboadh won ke nying Muuny Juog naa ayoad gene bang Jeacuu Ruohdh. Wa gihn nu thiw e yaa padh Judea ge aboadh Juoge ke nying Muuny Juog naa ayoad gene bang Jeacuu Ruohdh.”

<sup>12</sup> Nyoge anaa aleng ne caaj ne lihng rob Poal maa Barnaba naa akwaan gene kaa ayiih yaa padh Judea lum Jeacuu kedea ge arubo thiw ke nying thoohn giid me gaahy nyoge naa ayug gene kiin yaa padh Judea ke teeg mar Juog.

<sup>13</sup> Kaa athum gene ke rob arumo, e Jeamij a'aj maalo urube kea, “Jo wan lihngu gihn roba. <sup>14</sup> Dhe yoohn kaa abeehn Juoge ukoale nyoge me padh Judea ne yaae, dhe yoohn nu ateed Piihtere beer mee yihro awaahn kan. <sup>15</sup> Luub yaa agamloohngjuog<sup>d</sup> ge uroomo keehd gihn arob Piihtere naa akoohb Juog yihr gen kea,

<sup>16</sup> ‘Keehd maa apahdh wod ka ne wuor an yea,  
e yihdh run muu ubeehn dhe yooh me nyaahn me wuor nyoge an kii ngo,  
ngo unyoada.

Ngo unahg dhe yooh me nyaahn me ne keede  
neehn kwaad gihn geer wod tuub kar wod lahbo,  
wale maa ageer ke dehne wa kwaad wod na kway Deabide Juog yea.

<sup>17</sup> Yihdh niin nu,  
e nyoge me thoohdh me padh Judea a urom gene ke wuoro  
ke dhe yooh me yoohd  
bang gihn ge unahg yaa'a ke nying gihn acuohna gen ne wuor an.’

<sup>18</sup> Giid ge naa luub ateed Juoge kedea urob yaa agamloohngjuoge gen coon yihr nyoge.”

<sup>19</sup> Ubar Jeamije ke maalo ke rob kea, “Lihngu lum mara gen. Nea mara e yaa padh Judea ge ayiih lum Juog wudh gen keá cahgo ke dhiehdho keehdo kejea thoam gen. <sup>20</sup> Abea yoado warga e ne gweedo uteede yihr gen kejea caame giid kweehr ni ge keá cam gene bang gihn ge beehda caame maa alam yihr yiehdhe. Thiw robe yihr gen kejea rihng laahy maa athow e remo kuu akuong woj piny umodho keá cam gene maa remo keede keá cam gene kedea wii gene giid bal. <sup>21</sup> Loohng Juog ge beehde e ge ke kwaano ke deeh ka me laaj ke bang yihdh wuud kwaj ke nying Cahng Juog. E luub Moaje ge beehde e ge ke puohnyo ke bang wudh geedhe cang.”

<sup>22</sup> Kaano arumo e jo aohr maa jo doonge kedea yaa akuud lubo agwiir gene ne oohr nyoge kiin gen ne ci Antiog tiehd keehd Poal maa Barnaba, beere ngahy Judea giid ne kun ca kejea warga aay ke bang yaa Jeruucalem. Maa akwany gene Cihla maa Juudo me nyinge moogo Barcaabaj. Ge anahg nyoge maa anhyaar ne cohg. <sup>23</sup> Maa aohr warga gihn keehd gen,

“Wan, wa jo aohr kedea jo doonge wu amaahdh wane ke karu beehde wu yaa padh Judea ni ge beed geen Antiog maa dom Ciihrya kedea dom Celiihcya.

<sup>c</sup>14:24-26 Ge Poal ge adog Antiog, e ge kaahn bang piny Piciihdya maa piny Pampiihlya kedea ucidh gene ke geen Ataalya.

<sup>d</sup>15:15 Lum ni ateed Juoge anahg Amoj agamloohngjuog e naa agweed ngo piny. Amoj 9:12.

<sup>24</sup> “Lubo abeehn wane ne lihngo kan kejea nyoge mooge kiin yaa akuud wan ge abeehn bangu udhiehdh gene wudhu maa uraany gene cwihnyu ke kwaad luube maa arob gene yihru. Abea ngaa maa aohr gen kiin wan tooro ne cidho ne rob ke wun. <sup>25</sup> Awaahn ni wudh wan amad wane maa amad wane ngo tiehd kejea dhiil wane kwany keehd nyoge me oohr bangu. Jo ni akwany ge ucaahdho tiehd keehd Barnaba maa Poal. Poal maa Barnaba ge nyoge maa anhyaar wane keraahyo. <sup>26</sup> Nyoge maa abodh yi thoo ke nying tiihy gen yih Jeacuu Ngad Boadh nyoge. <sup>27</sup> E thiw Juudo ge keehd Cihla ge noono aohr wane bangu nu. Kwaad giih agweed wane yihru yihdh gen ubeehn gene ne teedo yihru beer mee keehd leehb gen. <sup>28</sup> Ngo aniid wane maa Wahy Juog thiw kejea keá ngaa cahg wudhu ke raamo keehdo keehd giih maa toohd. Abea tiihyu kaa loohnge giih nyoadh beehdo me beer. <sup>29</sup> Kwaad cam maa alam piny yih giih kweehr ngo keá camu maa remo e keede keá camu, kwaad laahy maa athow e remo kuu awoj oogo keá camu kedea giih bal ge keá yugu. Unahg gihn me beer nea giih amahn wane yihru ge be yugu. Beer wu awiihw wane.”

<sup>30</sup> Naa awiihw jo oohr e ge apahdh yooh keehd warga gihn agweed. Naa awahn gene Antiog, e wudh yaa ayiiho acong gene maa acub gene warga gihn akahl gene yih gen ne kwaano. <sup>31</sup> Naa akwaan gene warga, e cwihny gen ake mihno ne cohng bang gihn cwihny gen aciihme. <sup>32</sup> Ubeehn Juudo maa Cihla urub gene duug keehd yaa akuud maa aciihm gene cwihny gen keter kedea ucub gene tee aduulo yih gen bang gihn Juudo kedea Cihla ge anahg yaa agamloohng Jeacuu. <sup>33</sup> Maa aceng gene keehd yaa ayiiho giih Antiog. Naa athum waahdh gene, e ge ake wiihw kejea ge ucaahdh ke yoohm rog gen ne do Jeruucalem bang yaa anaa aohr gen. <sup>34</sup> Cihla abeehn ne kweer ke do Jeruucalem udoohng piny Antiog. <sup>35</sup> Abea Poal maa Barnaba ge anaa adoohng Antiog ke dwahde me nud, e gen maa yaaj mooge ge puohny Ciig Beer yih nyoge.

<sup>36</sup> Batién nihn mooge e Poal ake rubo yih Barnaba kea, “Beeh doogo ke bang wudh geedhe ne maany akuud yaa ayiiho naa anyoadho lum Juog yih gen beere kaa abar gene wong maalo ke yiho coa ke ne niido.” <sup>37</sup> Barnaba lum nu ayiihe. Abea anaa adaahd ngo beere Joon Maarko ucaahdho keehd gen tiehd. <sup>38</sup> Abea Poal lum Barnaba ngo kuu apahdh yi cwihnye maa akoohbe kea, “Joon Maarko won anaa awiie Pampiihlya ne cahng, maano e tiihy acaahdho ke nyinge kuu anaa athum. Nea maano, e kare tooro me cahge waahdh keehd won.” <sup>39</sup> Gihn nu e Barnaba ge ke Poal dhog gen agar gene ke nying Joon uwahdhe kaa beehn gene ne paah. Barnaba a'aay keehd Joon ubeehn gene Caaypruj. <sup>40</sup> Poal, Cihla e naa akwanye ne ngad waahdhe. Batiene naa awiihw akuud yaa ayiihoe gen kejea ge ukaahn Juoge beer mee, e ge apahdh yoohn gen. <sup>41</sup> Maa a'aay gene e ge caahdh e ge cor yihdh miehy Ciihrya maa Celiicya e Poal caahdhe e ngo ciihm cwihny akuud yaa ayiiho beere lum Juog mag gene maa teeg mee.

**16** <sup>1</sup> Ubar Poale ke waahdhe ucea Derba, batiene e ci Lijtera. Yi geen Lijtera e naa ayoadé Timodhy. Timodhy wahn anahg Ugriihg, e men beehda nyaar yaa Judea. Miih Timodhy anahg ngaa maa ayiih lum Jeacuu. <sup>2</sup> Akuud yaa ayiiho naa anaa Lijtera maa Yikoohnya, Timodhy aleeg gene. <sup>3</sup> Poal adaahd ngo ucaahdhe keehd Timodhy. Noono maa athoame ngo. Ngo athoame bang gihn ngo anghy Judea giih beehdo ke bang kuohn adaahd Poale ci yihdh gen kejea Timodhy wahn beehda Ugriihg. <sup>4</sup> Ge ake caahdho e ge teed loohng anaa yi warga gihn agweed jo aohre maa jo doonge giih Jeruucalem. Ateed gene kejea mag gene loohng nu beer mee kedea utiihy gene keehd gen. <sup>5</sup> E naa kaa abeehn akuud yaa ayiihoe umag gene lum Juog teeg kedea nyoge me thoohdh ge mahd bang gen ke nying nihn.

### Jeacuu Poal Aohre Macedoanya

<sup>6–8</sup> Poal cwihnye anaa cidho ke wudh geedhe me ne yihdh muudiihryae giih Aacya maa Bihdiihrya maa amahn Wahy Juoge ngo. Noono unahge ke geen Troaj e naa abeehn gene yi ngo. <sup>9</sup> Yi diih waahy anahg gene Troaj e Poal ngad Macedoanya aniide niido, wa yi laahg e kway wonge kea, “Beehn bang wan Macedoanya ne kony wan.” <sup>10</sup> Yi kaano anaa aniid Poale gihn ni e waahdh ke baabuur agwiir wane gwiir ne ci Macedoanya bang gihn Juog ke ngude e naa aohr wan ne puohny Ciig Beer kun ca.

### Yi Geen Pihlihbí Nyoge Mooge Ge Adoohng Ne Yaa Jeacuu

<sup>11</sup> Noono arumo uaay wane keehd baabuur Troaj ubeehn wane uthuur me nyinge Camoathraj. Ruuwow keehdo e wa angud Neapoalij <sup>12</sup> maa a'aay wane ke tien wan Neapoalij ubeehn wane geen Pihlihbí. Geen ni e ne kuong nyoge toohng yea nea caa muudiihrya gih Macedoanya. E naa geen beed yaa adaah ke yoohn Roama. Wa abeehdo kaano ke nihn me thoohdh. <sup>13</sup> Naa anahge Cahng Juog, e wa abeehn oogo yi buur geew ucidh wane dieng naam kar kwaj gih Judea. Maa apiih wane urub wane ke maahn maa amahdo dieng naam. <sup>14</sup> Dhaar Theatiira me nyinge Liidya anaa keew maahn ni lihng lum wan ni. Tiihye anahg ngweehw oogo ke waay ariir me ngien ge teeg. Anahg dhaago me wuor Juog keter. Noono uyab Juoge wiie ne ngey giih rob Poale beere ge yiie yiho. <sup>15</sup> Gihn nu e wiie ake muojo keehd piih luogwahy keehd jo paare cang. Maa acuohne wan paare kea, “Jo wan nea ngo ayiihu kejea a beehda ngaa maa ayiih lum Juog ne cohng kea beehnu paara.” Maa adhiile wan ke tero ne ci paare.

<sup>16</sup> Cahng man, e wa caa kar kway Juog, e wa ake roohmo yi yooh keehd nyaakow me beehda baahng abea wiie anaa atiihb ukeehg. Atiihb ukeehg me meehg nyaan caar giih uyug rog gen wong maalo. Ke nying gihn caare nyepinye caaro, e ngiihny me thoohdh ge na yoad yaa anahge baahng yih gene yoado. <sup>17</sup> Naa aniide wan e batién wan abuodhe e ngo ukwaago kea, “Cuow ni ge beehda yaa Juog Duohng. Ge rubo kaa nying ka uboadh Juoge wun kii ngo.” Gihn nu abere tiel me thoohdh <sup>18</sup> kedea ke kar nihn me thoohdh mee. Poal kwaad gihn ne rih nyaan ngo amaane. Maa amaahny Poale bang ngo urube yih atiihb ukeehg e wiih nyaan ni kea, “Roba robo yihri ke teeg mar Jeacuu, aay oogo yi wiih nyaan!” E atiihb ukeehg ake aay wiih nyaan ke nye wong kaano.

<sup>19</sup> Naa anghy yaa anahg nyaakon ni baahng paar gen kejea ngiihny be dog nyaane ke yoado yih gen, e cwihny gen arahnyo. Cwihny gen arahnyo bang gihn atiihb ukeehg e ne meehg nyaan teed giih uyug rog gen wong maalo, ngo ariem Poale oogo. Noono umag gene Poal maa Cihla upiey gen yi laaro kar lug bang apahn Roama. <sup>20</sup> Naa akahl

gen nyum apahn Roama e rob naa, “Yaa ni ge Judea maa abeehn ne lyaahb yi geeno. <sup>21</sup> Ge puohny giijh maa amahn loohnge giijho kejea ge keá tiihyo. Wo beehda yaa dhaahr Roama kare tooro yihro uyiiho giijh puohny gene kedea utiihyo ke gen.”

<sup>22</sup> Nyoge maa now thioh ge ataahny rog ge Poal maa Cihla. Gihn nu e arob apahn Roama kejea yiej waay ge Poal maa Cihla oogo rog gen kedea puohd gen ke keedo. <sup>23</sup> Naa apuohd acaakere Poal maa Cihla keehd kwaad apoohdo me raaj, e ge anyoal yi karkoohn. Arob yihr akihm dhaahr gihr karkoohne kejea toage dhog wuud karkoohn teeg mee ubahnge yaa ni rog gen be kwal gene. <sup>24</sup> Ke nying lum nu e akihm dhaahr ge Poal ge acod yi wod me naa alongthihh utuohy tien gen rog thoohn yen.

<sup>25</sup> Yaa adiehr waahr e Poal maa Cihla ge anaa ne kway Juog kedea ge uwahr ke wahy Juog. Wahy gen anaa ke lihngo thioh yihr maabuuye mooge. <sup>26</sup> Ke wong kaano e piny ree ayahnge ne mihd mihti, umede karkoohn cang. Noono ubeehn dhog wuude uyab gene rog gen cang kedea ubeehn yene unahg gene ne lwang oogo rog maabuuye. <sup>27</sup> Akihm dhaahr gihr karkoohn e caa ne tahngo e niid dhog wuud karkoohn ke kar gen cang e ge apuogo. Noono e palo akahle ke oogo e daahd unahge ree mare cuohne kejea maabuuye rog gen akwal gene. <sup>28</sup> Abea nye kaano e acuow Poale cuowo ke kwaago kea, “Rihi keá nahgi! Wa amuu nud kan cang.”

<sup>29</sup> E akihm dhaahr dhaano acuohne ke lama noono ucea wod bang gen maa amihh cwiinye naa aniide maabuuye ge nud cang. Noono upahdhe wudh conge nyum ge poal maa Cihla, maano e ree ulaadh ke lwahr. <sup>30</sup> Maa akahle Poal maa Cihla oogo kedea upeehnye gen kea, “Gihn e nuu utiihya beere Juog a boadhe boadho?”

<sup>31</sup> Kob gene yihr akihm dhaahr, “Yiijh lum Jeacuu Ruohdh beere boadh wahy yoadi yoado, yihh maa jo paari!” <sup>32</sup> Noono uthub gene thubo ke puohny nyin maa jo paare keehd lum Juog. <sup>33–34</sup> Poal maa Cihla ge anaa akedh akihm dhaahre paare uluoge ka me ledhe giijh gen kedea ucube cam yihh gen. Batiene arumo, e piijh luogwahy awoj yi wiijhe maa wudh jo paare. Maa amihh cwiinye gene keter bang gihn adoohng gene ne nyoge maa ayiijh lum Juog.

<sup>35</sup> Ruuwow, ke nyango e apahn Roama, lubo aohr gene keehd jaabidhe giijh buuliihe kejea lony ge Poal oogo yi karkoohn.

<sup>36</sup> Noono urob akihm dhaahre ngo yihh gen kea, “Lubo arob kejea lony wun oogo. Kare nud uaayu maahdh mee ke yoohm rogu.”

<sup>37</sup> E Poal ake rubo yihh jaabidh buuliihe kea, “Ke ne diih! Wa keá lony oogo wa gihn nu! Kwiihyu e wa yaa dhaahr Roama! Wa loohnge giijho wo yaa dhaahr Roama apahne ge mahn gene mahno ubahng ngad Roama be puohd kedea utoage yi karkoohn nea padh awuohj e naa yuge! Naa awuohj maa atiihy wane? Apahn Roama deeh awuohj me duohng atiihy gene. Nea neehn maano kea nahge gen ge ne dhiil beehn ne rob ngo yihh wan kejea ge awuohj kedea uteed gene ngo tiehd yihh nyoge kejea wa nyoge me padh yaa alyaahb.”

<sup>38</sup> E jaabidh buuliihe gihn arob ge Poale yihh gen aci gene ne teedo yihh apahn Roama. Naa alihng gene ngo kejea Poal maa Cihla ge yaa Roama e ge ake tudo. <sup>39</sup> Naa abeehn apahn Roamae bang ge Poal paar akihm dhaahr, e ge arubo yihh gen kob gene, “Awuohj ayug wane rogu. Wiiu lubo piny yihh wan. Nyingu akway wane beere wu uaay.” <sup>40</sup> Poal maa Cihla lubo awii gene piny naa abeehn apahne uyug gene giijh adaahd gene. Noono ubeehn ge Poale uci gene paar Liihdya maa arub gene yihh jo ayiiho ke lubo me ciijh cwiinye gen. Kaano maa a'aay gene ne ci geen Thecaaloanika.

### Judea Mooge Puohny Poal Ke Yihdh Geedhe Amahn Gene

**17** <sup>1</sup> Yi waahdh a'aay ge Poale Pihlihb, e ge abeehn geen Thecaaloanika e ge bar wudh geedh Ampihboaliij maa Apoloanya. Thecaaloanika yea anaa wod amaad gihh Judea <sup>2</sup> Wa kwaad gihre ne na kwaaye kaa yugo, naa awahnhe Thecaaloanika, e Poal acaa yi wod amaad. Noono ke nying niijh Cahng Juog kar ge adahg, e Poal ngo anyoadhe yihh nyoge neehn kaa agweede yi kitaab Juog kejea Juog Ngad Boadh nyoge ngo aohre. E naa ngaa arub Juoge ke nyinge yi kitaab kejea ngo ukwanye. <sup>3</sup> Ubeehn Poale unyoadhe yihdh luub anaa agweed yi kitaab kedea ucohg ngo yi cwiinye gen thioh kejea luub nu agweed nu ge rob ngo kejea Ngad Boadh nyoge kuohme urahmo kedea uthowe, batiene e ngo ucahr. Kob Poale, “Ngaan ruba ke nyinge beehda Jeacuu. Jeacuu e naa Ngad Boadh nyoge.” <sup>4</sup> Nyoge mooge kiin yaa alihng giijhe, naa angahy gene adiehj yihdh luub apuohnye, e ge ake yiijho kedea umad gene rog gen kur Poal maa Cihla. Thioh Griihge me thoohdh me wuor Juog maa maahn yaa doonge yi paajo lum ge Poal ayiijh gene.

<sup>5</sup> Keehd maa anud Judea maa ayiijh giijh apuohny ge Poale, e mooge anudo thioh maa akweer ke yiijh giijh apuohny gene. Noono maa amag tiele gen ke nying gihn abeehn nyoge me thoohdh uyiih gene giijh apuohny ge Poale maa Cihla. Gihn nu e yaa loor ke bang yi geew ge acong gene ne waahdh e ge ukwaago kedea e ge yug giijh alyaahb. Kaano e Judea maa yaa acong gene ge acaa ne teehng paar Jeacon ka beed Poale maa Cihla. Ge ateehng paar ngo beere ge Poal ke maa ukahl gen nyum ruohdh geew <sup>6–7</sup> Naa abahnge ge kuu ayoad gene, e Jeacon maa yaa yiijho mooge amag gene maa ukahl gene gen nyum ruohdh geew kob gene, “Nyoge maa abeehn geen ni ge nyoge me reje me yug giijh alyaahb. Ngaa me nyinge Poal maa Cihla. Bekiidh ka maa acidh gene yea ubahnge giijh alyaahb kuu ayug gene. Awaahn ni ge nud kan yi geeno kedea nyoge puohny gene puohnyo kejea Jaah gihro e beed Roama lume keá lihng abea lihng ke lum ruohdh moogo me nyaahn me nyinge Jeacuu. Lum nu angweel gene piny yihh nyoge teeg mee. Jeacon thioh tiene ni yi gihn, bang gihn e naa acub kar budo yihh gen kedea adoohng ne ngad gen.” <sup>8</sup> Naa alihng akuud nyoge giijh arob ni, e ge apaah oogo noono urahny cwiinye gene unahg gene juuj ke kwaago. <sup>9</sup> Kaano e ruohdh geew lubo angol gene kejea beehn Jeacon maa yaa ayiiho mooge cub gene ngiihny piny beere ge ke lonyo.<sup>e</sup>

<sup>e</sup>17:9 Ngiihny acub piny nyum ruohdhe ne nyoadh ngo kejea urob ge Jeacone yihh Poal maa Cihla uaay gene beere e alyaahb ree be doge ke yugo yi geew ke nying gen.

16:22-23 2Kor 11:25; 1Th 2:2    16:27 12:18-19    16:30-31 2:37; 11:14; Jon 6:28-29    16:33 16:15    16:37 22:25-29; 23:27

16:40 11:23    17:1-9 1Th 2:1-2    17:2 9:20; 13:5, 14, 44; 14:1; 16:13; 17:10, 17; 18:5, 26; 19:8-9; 28:17    17:3 3:18

17:4 13:50; 16:14; 17:17    17:5 Jeacon: Rom 16:21    17:6 16:20    17:7 Luk 23:2; Jon 19:12

<sup>10</sup> Ge anahg pinye ne bihb arumo e yaa ayiiho, Poal maa Cihla ge arwaaj gene naa a'aay gene. Ge acaa Bearya. Cahng man, e ge ne Bearya, e ge acaa yi wod amaad mar Judea. <sup>11</sup> Judea giij Bearya ge kuu aneehn Judea giij Thecaaloanika bang gihn ge kuu akweer ke lihng luub Poal. Abea ge anhyaar lihng giij puohny ge Poale. Noono arumo, e ke nying nihn e giij yi kitaab Juog na kwaay gene kaa kwaano tiehd wale ge uroomo ke giij puohny Poale. Gihn nu ayoad gene kejea Poal puohny giij maa athere. <sup>12</sup> E naa kaa abeehn amahr nyoge me thoohdh keew gen uyiij gene lum Juog: Judea maa Griihge. Thiow maahn yaa doonge yi paajo lum Juog ayiih gene.

<sup>13</sup> Abea kaa alihng Judea giij Thecaaloanika ngo kejea Poal lum Juog puohnye puohnyo yihr Judea giij Bearya e cwihny gen arahnyo noono ubeehn gene Bearya. Kaano uthub gene ke raany wudh yaa geen nu kedea ucung gene gen ne yug giij alyaahb. <sup>14</sup> Gihn nu e naa abeehn jo ayiiho uoohr gene Poal keehd nyoge mooge me rwaay ngo koohr naam duohng ne aay ke baabuur ne ci Athen. Cihla maa Timodhy ge anaa adoohng Bearya. <sup>15</sup> Naa aduu yaa arwaaj Poal ke yoohn Athen, e ngo arob gene yihr Cihla maa Timodhy kejea ge daahd Poale daahdo Athen piow piow.

### Nyoge Me Thoohdh Apuohny Poale Athen

<sup>16</sup> Cwihny Poal kuu amedo kaano apoohe e koar Cihla maa Timodhy. Cwihnye kuu amedo bang gihn geen Athen ngo aniide e yea apahng keehd amahr kuohn kwaj yihr yiehdhe giij kweehr. <sup>17</sup> Gihn nu e Poal athubo ke nyoadh yihdh luub agweed yi kitaab Juog yihr Judea maa yihr yaa wuor Juog. Yihdh luub kitaab Juog ge anyoadhe thiow yihr kwaad ngaa ayoad ke bang yi geew, ngaa me daahd ulihng puohny nyaahn ni. <sup>18</sup> Kiin yaa na laahw luube ke Poal, anudo ke nyoge <sup>f</sup>me nhyaar ded yihdh luube. E naa gihn arub nyoge mooge kob gene, “Adoor ni kwihj rob teed gihn?” Abea bang gihn Poal arubo ke nying Jeacuu kedea cahr ngaa maa athow, e nyoge mooge ge arubo kob gene, “Wa nyin adoohng wa rubo kaa nying giij kweehr yaaj mooge, kwaad joohy me kwihyo me nahg gene athere.” <sup>19</sup> Kaano e Poal acuohn gene ne cidho keehd gen kar amaad wiih Good Ariopaaguuj. Naa awahn gene kar amaad, e ngo arob yihr Poal naa, “Cwihny wan ne bange ulihng wane puohny gihri e nyaahn ni e rubi ke nyinge. <sup>20</sup> Kwaad luube mooge me robi ge kuu akuong wane ke lihngo coon, e cwihny wan ne bange ungahy wane giij ni yihdh gen beer mee.” <sup>21</sup> (Yaa anyuol Athen kedea yaa adaah ne beehdo yea ge beehdo e ge nhyaar lihng giij me nyaahn kedea teed giij me nyaahn).

<sup>22</sup> Kaano arumo e Poal a'aj maalo nyum yaa amaahdo maa arube kobe, “Yaage, wu yaa Athen, aniida ke wonga kejea wu nyoge maa acub cwihnyu ne wuor joohy me thoohdh keraahyo. <sup>23</sup> Bang gihn kaa anaa acaahdha caahdho ke bang yi geen nu kan, e a many kuohn lam yihr joohy giiju, e kar lam acielo ayoad maa agweede dhe kejea, ‘Kar lam yihr Juog me kwihj.’ Cwihny wan ne rob yihru ke nying Juog gihn kwihyu e wuoru ni. Juog gihn nu e naa Juog maa adiehr en naa Juog Aciehg.

<sup>24</sup> “Juog Aciehg gihn acag maalo kedea piny maa kwaad giij ne yihdh gen cang ne dug. E naa Ruohdh mag maalo kedea wiih piny. Nea maano e kare tooro ubeehde yihdh wuude maa ageer ke cing. <sup>25</sup> E thiow kwaad giij tiihy nyoge ke cing gen ge be daahde ucub gen yihre bang gihn e naa ngaan cub wahy maa kwaad nyepiny cang yihr dhaano utaahng. <sup>26</sup> Juog e naa acag dhaano acielo noono ukaare ne thaahy giij nud awaahn ni ge akeedho ke wiih ungoom cang. Cahng unud nyoge wiih ngoom kedea kuohn ubeehd gene yihdh gen ge agwiir Juoge kuu umodho maano e dhaano poohd kea caa. <sup>27</sup> Juog nyoge acage beere ngo daahd gene daahdo ka moogo, e ngo uyoade gene. Abea Juog be baahr keehd won. <sup>28</sup> Beehda Juog e ne miihdh won ke nying nihn. Beehda e keede e ne cub tee yihro.

<sup>29</sup> “Neehn kwaad kaa arob ngad wahy aleloare giiju ngo kejea, ‘Wo cang wo beehda nyethen Juog ke ngude.’ Neehn kwaad kaano nahgo nyethen Juog, e ngo kea cahgo ke paro keehdo kejea dhaahb maa demaro ge ke thaahdho ne joohy kedea leele ke tiengo ne juog ke cing ngad ateehd. <sup>30</sup> Keehd maa anaa awul wudh nyoge me thoohdhe rih Juog ke run me thoohdh e kihde now Juog wiihe kuu awul rog gen. Juog ge kea kihmo ke gihn me raaj ke nying gihn kwihy gene ngo. Keehd wun thiow Juog wu kea kihmo ke nying gihn kwihyu en. Abea awaahn ni Juog daahd ubeehn yaa beed wudh geedh upiny cang umaan gene anyoohne giij gen. Ngo beehda gihn maa acege piny teeg mee kejea ngaa kweer ke maan anyoohne giije ngo kihme kihmo ke gihn me raaj. <sup>31</sup> Juog e keede e ne ngahy cahng uthub ngaan Akwanye ke kihm nyoge. Ngaa Akwany Juoge akuong thoo batiene e ameehg Juoge cahro. Ngo ameehge cahro ne nyoadh ngo yihr nyoge kejea e naa ngaan Akwahnye ne kihm nyoge.”

<sup>32</sup> Naa alihng gene Poal e ngo urubo ke nying ka cahr nyoge e ge ake ngiero. Abea e nyoge mooge kiin gen ge ake rubo yihr Poal kob gene, “Cwihny wan ne bange ucahgi rob keehdo yihr wan ke nying giij arobi nu.” <sup>33</sup> Batiene luub nu, e Poal ake aay kar amaad. <sup>34</sup> Nyoge mooge lum Poal ayiih gene udoohng gene ne yaa batiene. Kiin gen ngaa me nyinge Dioniiuj ge apahno gihr Athen maa dhaago me nyinge Damaari ge adoohng ne yaa yiho.

### Keehd Maa Amaan Judea Poal E Ngo Anaa Aceng Korindh

**18** <sup>1</sup> Batiene kaa arub Poale wiih Good Ariopaaguuj, e ngo kuu anaa ceng Athen. Noono uaaye ne ci Korindh <sup>2</sup> kaa aroohme yi ngo keehd Ujudea ngad tien paar gen, me nyinge Akwiila. Akwiila anaa anyuol kii muudiihrya gihr Poantuj. En maa ciiehe, Priikiila, ge abeehno ke nying nihn nu kaa yoohn Itaalya bang gihn Klaawdio Jaah gihr Roama yaa padh yaa Roama ge arieme oogo. Poal anaa aci ne lieu gen <sup>3</sup> naa ayoad ngo e ge nyoge me tiihy kwaad tiihye e ngo abeehdo keehd gen. Noono ubeehd gene e ge wiih yiehy diehg me geer naa abuwe. Giij wiih ge na ngeew gene ke

<sup>f</sup>**17:18** Poal arubo yihr kwaad nyoge me thoohdh. Kiin gen, nyoge anudo me nhyaar giij puohny nyin me nyinge Epikuuruj. Ngo anahg ngaa maa ngad cam kedea ngo nhyaar giij wuobo maa maahn. Ngo adaahd ubeehde e cwihnye med kedea e giij raahm tooro ree. Puohny mare teed ngo kejea Juog wiihe awul rog nyoge. Abea nyoge mooge anudo thiow kiin yaa arub Poale yihr gen. Ge nyoge me daahd ukoar gene rog gen beer mee. Noono ubahng cwihny gen be rahny ne cud kedea ubahng cam be deehj gene yi cwihny gen kedea thiow ubahng ge be muohl ke kuong kedea ge kweer cej maahn. Ge kwaad nyoge maa yaa amaahg kejea ngaa me room keehd gen tooro. Poal adaahd urube yihr gen kejea ngo beehda gihn me beer ne yiih ngo kejea Jeacuu e naa Ngad Boadh nyoge kedea beehda gihn me beer ne yiih giij apuohny Jeacuu.

**17:10** 17:2    **17:11** Jon 5:39    **17:12** 11:18    **17:13** 14:5, 19; 1Th 2:14-16    **17:17** 17:2, 4    **17:18** 4:2; 1Kor 1:22    **17:24** 7:48

**17:29** 19:26    **17:30** 14:16; Rom 2:4    **17:31** 3:15; 10:42    **18:2** Akwiila: Rom 16:3; 1Kor 16:19; 2Tim 4:19

**18:3** 20:33-34; 1Kor 4:12; 9:12-18; 1Th 2:9; 2Th 3:7-9

oogo ne ngeew cam. <sup>4</sup> Ke nying cahng Juog e Poal caa yi wod amaad gihr Judea ne rob yihr Judea maa Griihge kejea waar gene wudh gen uyiih gene lum puohnye.

<sup>5</sup> Naa awahn Cihla maa Timodhy arumo ke yoohn Macedoanya, e Poal wihe acube ke puohny Ciig Beer. Maa ateede ngo ne cohng yihr Judea giuh abeed geen nu kejea Ngad Boadh nyoge beehda Jeacuu. Abea kihde now, <sup>6</sup> Judea mooge wudh gen aciehg gene ukweer gene ke yiih lum Poal kedea umad gene lubo ne cuungo dhe yoohn puohnye. Gihn nu e luube me reje maa luub ayaany ge arob gene rih Poal ubeehn Poale urahny cwiuhnye rog gen. Maa arube yihr gen ke luube me teeg kea, “Nea wu ukweer ke yiih lum Juog e ngo gihr wudhu wu keedu. Awaahn ni a a'ay ne ci ne puohny lum Juog yihr yaa padh Judea.” Naa arobe luub nu e dhab tiene adhoohnge dhoohngo ne kuohng ree kejea e buu cahng rob ke gen keehdo.

<sup>7</sup> Noono uaaye uwiie gen kaano. Ngaa me nyinge Tiihtioj Jujtuj, Poal abeehne ne cuohn paare beere nyoge puohnye puohnyo. Tiihtioj kuu anahg Ujudea abea lum Juog abeehde e ngo ngahye. Paare anaa cahng mee keehd wod amaad gihr Judea. <sup>8</sup> E thiow Krijpuj ruohdh wod amaad lum Juog ayiihe, en maa jo paare cang. Yaa Korindh me thoohdh mee lum Juog alihng gene bang Poal maa adoohng gene ne yaa ayiiho noono uwoj piih luogwahy wudh gen.

<sup>9</sup> Cahng man, ke waahr, e Juog abeehn wiih Poal yi niine urube kea, “Poal, yih keá tud yihr yaa paan ni. Bar maalo ke puohny nyoge maa ke tiihyi bang gihn a nud ke yihn. <sup>10</sup> Ngaa muu umaahd yihn tooro ukedhe ngwiilo rihi. Bar maalo ke puohny gen bang gihn nyoge muu uyiih luma uthoohdh yi geen ni.” <sup>11</sup> Noono maa abeehd Poale keehd kar wong acielo ke nuuj Korindh e ngo puohny lum Juog. (Yi run nu e nyoge me thoohdh lum Jeacuu ayiih gene.)

<sup>12</sup> Cahng man, e Judea mooge rog gen acong gene umaahd gene Poal. Naa akwahng gene ngo piny, e ngo akedh gene ke nyum lug. Gaalio<sup>9</sup> e naa anahg muudiihr gihr Aacya yihdh nihn nu. <sup>13</sup> Kob gene, “Nyin raany paajo e gihn, e ne rubo yihr nyoge kejea wuor Juog kaa dhe yooh moogo me padh dhe yoohn teed loohng paaje.”

<sup>14</sup> Poal anaa adaahd ubeehre lum nu abea muudiihr Gaalio aguo rob kobe, “Jo Judea, nea Poal anaa ayug awuohj maa adhahle loohng akuuma e lug gihru naa amaanyo. <sup>15</sup> Abea naa anahge giuh peehm kiin nu ke nying luub paaru maa loohng giuhu e wu nuu ulug gihru wu keedu, kar lug gihn nu tooro yihra.” <sup>16</sup> Noono maa arieme gen oogo yi lug.

<sup>17</sup> Batiene e wudh gen alog gene ke bang nyin moogo me cuohn ne Cojtheanej, ruohdh wod amaad. Noono uthub gene ke puohd nyin nyum lug abea Gaalio gihn nu ayug gene keá cub yi wiiehe.

### Poal Aduu Antiog

<sup>18</sup> Batiene gihn nu ayug ree, e Poal abar maalo ke puohny yaa ayiiho ke nihn mooge. Poal anaa adaahd udoe Antiog gihr Ciihrya. Akwiila maa Priikiila ge adaahd ucaahdh gene keehd Poal ne wahdh Epicoj. Noono maa abeehn gene Cengrea kaa anaa abeehn Poale uliele wiiehe yea. Wiiehe aliele ke nying kwaad gihn maa akuohng ree nyum Juog kejea ngo dhiile kaa tiihyo. Kaano maa a'ay gene cang ke baabuur ne ci ne liew geen Epicoj. <sup>19</sup> Yi geen Epicoj Poal na caa yi wod amaad ne rob yihr Judea ke nying Jeacuu Ngad Boadh nyoge. Naa abeehn Poale uaaye e ge Akwiila maa Priikiila ge anaa adoohng Epicoj. <sup>20</sup> Judea me thoohdh ge adaahd ubeehd Poale ke gen beere ge puohnye puohnyo. Abea Poal akweer kea kar beehdo yihre tooro. <sup>21</sup> Abea ngo arobe yihr gen kea, “Nea cwiuhny Juog ne bang ngo e a uduue bangu cahng moogo!” Noono uaaye ke baabuur me caa Cejearya. <sup>22</sup> Naa awahnhe Cejearya e ngo aci Jeruucalem ne maahdh yaa ayiiho batiene e ngo abar Antiog.

<sup>23</sup> Naa abeehd Poale keehd kar nihn Antiog, e ngo adoog kuu utiene e caahdhe e cor yihdh miehr giuh Galaadya kedea miehy Priigya maano e ciihm cwiuhny yaa ayiiho beere lum Juog mag gene maa ke cwiuhny ge ne cohng.

### Ngaa Moogo Yaa Ayiiho Ge Apuohnye Epicoj Maa Korindh

<sup>24</sup> Kaano acaahdh Poale e ngo cor yihdh miehy nu, e Ujudea me nyinge Apolo anaa abeehn Epicoj ke yoohn geen Alekjandrya. Ngo anahg ngaa maa apuohny ne cohng. Loohng Juog kedea giuh agweed yaa gamloohngjuoge maa Wahy Apoong Juog ge angahye beer mee. <sup>25</sup> Thiow ka na apuohny Joone kii ngo angahye. Joon, ngaa na woy piih luogwahy wudh nyoge e na koohbo kejea beehn Judea maan gene anyoohne giuh ayug gene rih Juog. Abeehe e ngo ngahy Apolo beer mee kejea Judea anyoohne giuh gen dhiil gene kaa maano beere wudh gen woy piih luogwahy. Apolo na upuohnyo ke puohny acielo e gihn me wiie oogo tooro. Abeehe e ngo ngahye thiow kejea ngaa muu uboadh nyoge ngo ubeehn. Abea ngo akwihy Apolo kejea Jeacuu ngo abeehno kedea ngo athow beere nyoge rog gen rom gene kaa boadh. Akwihye kejea Jeacuu acahr kedea ngo atihng maalo Paar Juog. <sup>26</sup> Apolo na upuohnyo e lwahr tooro ree yihr yaa beehn kar amaad gihr Judea. Naa aniid Akwiila maa Priikiila kaa apuohny Apoloe kii ngo, e ngo acuohn gene paar gen. Noono upuohny gene lum Jeacuu yihre kedea maa adoohng ne ngad akuud yaa yiiho. Ge adoohng ne ngaa maa ayiiho, e yaa ayiiho ge akonye konyo ne cohng.

<sup>27</sup> Kaano e cwiuhnye anaa bang ci Korindh. Gihn nu maa agweed yaa yiiho warga yihre ne cubo yihr akuud gen ge beed Korindh. Agweed naa Apolo beehda ngaa me beer maa ayiih lum Juog. Naa awahdh Apole e yaa ayiih lum Jeacuu bang gihn Juog ngo abeero keehd gen ge akonye konyo ne cohng. <sup>28</sup> Ge akony Apole kaa dhe yoohn ataaye Judea me thoohdh naa akwaan gene yihdh luub Juog nyum nyoge. Maa anyoadhe ngo yihr gen wa kaa agweede yi kitaab Juog kejea Jeacuu e naa ngaan acub Juoge piny ne Ngad Boadh nyoge cang.

### Yaa Epicoj Me Thoohdh Lum Juog Ayiih Gene Ke Cwiuhny Gen Cang

**19** <sup>1</sup> Kaano anaa apoohe e Apolo puohny yaa yiiho Korindh, e naa kaa anaa apuohny Poale puohnyo e kwany bang wudh geedhe giuh Galaadya maa Priigya uwahdhe kaa awahnhe Epicoj kaa ayoadhe yaa ayiiho yea. Naa arub

<sup>9</sup>18:12 Gaalio anahg muudiihr gihr Aacya. Korindh beehde geen Aacya.



Poale keehd gen, e nyoge mooge maa ayiih lum Joon, ngaan na woj piih luogwahy wudh nyoge, ge ayoade kiin gen.

<sup>2</sup> Maa apeeध्ये gen kea, "Moogo e Wahy Juog anaa abeehn rogu ge anaa ayiihu lum Juog ne?"

Maa abeehr gene ngo kob gene, "Gihn me nyinge Wahy Juog kuu alihng gene, e ge apeeध्ये kea, "Naa anaa awoj piih

<sup>3</sup> Naa angahy Poale ngo kejea puohny ke nying Wahy Juog kuu alihng gene, e ge apeeध्ये kea, "Naa anaa awoj piih luogwahy wudhu gihn e naa anaa apuohny yihru ne yiiho?"

Maa acahg gene ngo ke beehro kob gene, "Anaa apuohny yih wan kejea maan wane anyoohne giih wan beere piih luogwahy woj wudh wan ne gwiir rog wan ne koar Ngad Boadh nyoge ge ubeehn ni. Wa apuohny kaa puohny Joon. Joon ngaa na woj piih luogwahy wudh nyoge. Ne gihn me daag yi puohny apuohny wan ne?"

<sup>4</sup> Kob Poale yih gen kea, "Gihn me daag tooro ke ne diih! Adiehr muon, Joon piih luogwahy awoje wudh yaa amaan anyoohne giih gen. Abea anaa ateed Joone thiw kejea Ngad Boadh nyoge ngo ubeehn unyoadhe ree ka me cahng. Awaahn ni, teeda teedo yihru kejea Jeacuu ree anyoadhe. Jeacuu e naa Ngad Boadh nyoge. Nahge ke lume e ne tiihy keehde."

<sup>5</sup> Naa alihng gene lum Poal, e ge ayiiho utiihy gene kaa lum Jeacuu. Noono maa awoj Poale piih luogwahy wudh gen ke nying Jeacuu Ruohdh. <sup>6</sup> Naa acub Poale cinge wudh yaa ni, e Wahy Juog abeehn rog gen kedea uthub gene thubo ke rob keehd dhoy me thoohdh me padh, e ge rob lum Juog. <sup>7</sup> Yaa anaa abeehn Wahy Juoge wudh gen, ge anahg nyoge apaar wonge ariow.

<sup>8</sup> Batiene ke kar dwahe adahg, e Poal ne kwaay cidho yi wod amaad ne rob yih nyoge, e lwahr tooro ree. Na urubo yih gen ne cohng ngo yi cwihny gen beere wudh gen log gene loo uyihi gene giih robe ke nying Dhaahr Juog. <sup>9</sup> Abea keehd maano, e nyoge mooge kiin yaa anudo ge apoohdo e ge yug giih tee wihj maa akweer gene ke yiih giih rob Poale yih gen. Noono uthub gene ke rob ke giih me reje nyum nyoge ke nying yoohn anyoadh Juoge. Kaano e Poal ge awiie piny uaaye keehd yaa ayiiho ne ci ne rob yi wod puohny gih Tiiranuj. Ke nying nihn, e Poal nyoge puohny puohny kaano. <sup>10</sup> Ke kar run ariow e Poal puohny yaa ayiiho. Noono e yaa apuohny ge na ucidho ne puohny Judea maa yaa padh Judea ke bang wudh geedhe giih there. E naa kaa abeehn lum Juog unyaaye kedea ulihng amahr nyoge ngo kii ngo.

<sup>11</sup> Juog amahr kwaad giih me thoohdh me gaahy nyoge ge ameehge yugo yih Poal ke nying tee gihn acube. <sup>12</sup> Keehd waay Poal ne ngaabe, nea ge kedh bang yaa rog ge ne atiihb ukeehg, e ge uaay ke ngweej. E nyoge maa atwaany atwaany uaay oogo rog gen.

<sup>13-14</sup> Yihdh nihn nu na thiehdh Poale nyoge thiehdh nu, Judea mooge anudo me na koohbo kejea nyoge thiehdh gene thiehdh thiw. Ngiihny na kaab gene kaabo bang nyoge kejea ge rom riem atiihb ukeehg oogo rog gen. Ge cuohn e ge waahd Ceaba Abiihberiw. Ceaba anahg ngaa duohng yaa lam. Waahd Ceaba waahdh ke bang wudh geedhe e naa acub gene yi cwihny gen. Keehd me bahnge ge padh yaa batien Jeacuu, e ge anaa adaahd ungoor gene ka na riem Poale atiihb ukeehg oogo rog nyoge: ka na rieme ge oogo e rob nying Jeacuu. Cahng man arumo, e ge anaa adaahd uriem gene atiihb ukeehg oogo rih ngaa moogo. Noono maa arub gene yih atiihb ukeehg kob gene, "Yih atiihb ukeehg, ke nying Jeacuu gihn nyinge rob Poale, aay oogo rih ngaa." <sup>15</sup> Abea ke nye wong kaano e ngo abeehr atiihb ukeehge yih gen e cwihny arahnyo kea, "Tee gihn yoad ke nying Jeacuu ngahya kedea ngahya thiw kejea Jeacuu e ne cub teeg nu yih Poal. Abea wun! Wu naa yaa aweehne? Yihru tooro tee me riemu an." <sup>16</sup> Gihn nu arumo e nyin ree anaa atiihb ukeehg ake riir rog waahd Ceaba ubange gen keraahyo. Kuohn me ledhe akedhe rog gen kedea uyieye waay gen oogo rog gen maa agoohd gene ke ngweej ne cohng.

<sup>17</sup> Judea kedea nyoge me padh Judea ge beed Epicoj gihn ayug ree rog waahd Ceaba abeehn gene ne lihng. Gihn nu e gih nying Jeacuu nyoge agaahye noono utoor ngaa me rob nying Jeacuu Ruohdh ke dhieny. <sup>18</sup> Ke nying gihn ayug ree rog waahd Ceaba, e yaa ayiiho me thoohdh giih reje na tiihy gene ge kuu acahg gene ke kano yi koohdh gen. Ge ateed gene oogo cang nyum nyoge. <sup>19</sup> Thiw amahr yaa range maa yaa yen kedea yaa thehdho naa adoohng gene ne nyoge maa ayiih lum Jeacuu, e giih na tiihy gene ke gen ge acong gene ka maa acielo, uwaang gene gen nyum nyoge. Giih awaang nea ge kwaan kaa ngiihny demaro giih paar gen e ge kar demare alihbe jehariow wonge apaar.<sup>h</sup> <sup>20</sup> Ke nying kwaad giih ni teeg atiihy rog gen, e lum Juog abeehn nyoge me thoohdhe ne mago ke cwihny acielo.

### Poal Cwihnye Ne Ci Jerucalem Batiene E Bar Roama

<sup>21</sup> Batiene kaa ayug giih nu rog gen, e ngo agweehg Poale ke cwihnye kejea ree dhiile kaa gwiir ne ci Jerucalem, e maano, e kaahn yihdh muudiihrya giih Macedoanya kedea Akaayo. Thiw ngo anaa agweehge kejea e dhiil wahdh geen Roama. <sup>22</sup> Poal nyoge ariow me konye, Timodhy maa Erajtuj ge aohre wong maalo ne ci Macedoanya. Abea Poal anaa adoohng ne beehdo tudi Aacya.

### Ajuohj Ayug Epicoj

<sup>23</sup> Anahg yihdh nihn nu adoohng Poale Aacya nu, e naa ayug alyaahb me duohnge ree. Yaaj mooge cwihny gen arahnyo naa beehd nyoge me thoohdhe uyihi gene puohny ke nying Jeacuu. <sup>24</sup> Ngaa me nyinge Demetruj anudo. Tiihye anahg thaahdh demaro wa kihd wod amaad gih Artemihj. Ngiihny me thoohdh ge na yoade yoado yi tiihye noono. <sup>25</sup> Naa angeye ngo kejea nyoge me thoohdh lum Jeacuu ayiih gene, e cwihnye arahnyo. Noono maa acuohne kwaad ngaa tiihy kwaad tiihye yaa amaad. Naa abeehn gene e ngo ateede yih gen kea, "Yaage, ngo ngahy kejea lonyo gihro yoado kaa nyinge kwaad tiihy tiihyo. <sup>26</sup> Ngo beehd e ngo alihngu ke yihdhu kedea uniudh ngo e gihn atiihy nyin nyinge Poal. Kob Poale kea giih me tiihy ke cing ge padh Juog! Gihn raaj yi robe noono, beehda gihn abeehn yaa geeno, Epicoj uyihi gene lume. Keehd yaa beed muudiihrya gih Aacya lum ngo ayiih gene thiw. <sup>27</sup> Awaahn ni gihn me nud ke nying tiihyo ngo tooro! Tiihyo beehde e ngo arahnyo! Lum ni, wudho dhiile kaa dhiehdho. Ngaa keehdo en nuu ucahng rob

<sup>h</sup>19:19 Demare 50,000: Ge anahg amahr ngiihny me thoohdh. Ngiihny me tooro yih dhaano now, nea padh ngad thaajir me duohng.

kejea Artemihj beehda Juog me beer. Ngaa e nuu umeehg nyinge wiihj. Nyin cuohn ne Poal beehda ngaa me lyaahb paajo. Awaahn ni ngaa keehdo wiih piny kan en nuu ucahg Artemihj ke wuoro!”

<sup>28</sup> Naa alihng yaa amahdo lum Demetruj, e cwihny gen arahnyo kwaade tooro, uthub gene ke wong kaano ke kwaago e ge rob, “Artemihj e naa juog gihro me duohng.” <sup>29</sup> Noono ukeedh kwaage ke bang yi geew cang. Maa abeehn yaa ake kwaago ukwahg gene nyoge ariow piny maa yaa Macedoanya: Gaaw kedea Arijtarkuj. Ge akwahg gene piny bang gihn ge yaa waahdh Poal. Noono maa apiey gene gen yi deeh roog yug giih yaay. <sup>30</sup> Poal cwihnye anaa bang cidho kaa ngo ne rob yihr nyoge. Abea ngo amahn yaa ayiihoe kejea ngo keá cidho. <sup>31</sup> Keehd ruohdh muudihrya gihr Aacya maa gome dhog aohr gene yihr Poal beere ngo be cidh kaa amahd nyoge yea.

<sup>32</sup> Abea yi roog kaa anahg nyoge yea wiihj anaa alyaaahb. Bang gihn gihn abeehn nyoge ke nyinge ngo akwihy thoohdh yaa acidho cang. Noono e yaa muu ge rub kur gen kedea muu ge kwaag kaa nying gihn moogo. <sup>33</sup> Nyoge mooge naa aniid gene Alekjander e ngo ameehg Judea cuungo nyum nyoge, e ngo anaa apar gene kejea gihn me robe ke nying gihn kwaag nyoge nud. Kaano e Alekjander cinge atihng ke maalo yihr nyoge kejea leng gene ne caaj. Maa athube ke rob ne jaahy ngo kejea padh Judea ge ne wudh gen naa alyaaahb gihn kwaag nyoge ke nyinge. <sup>34</sup> Abea naa angahy nyoge ngo kejea Alekjander ngo Ujudea, e ge amaahr piny ke kwaago e ge rob, “Artemihj e naa juog wan me duohng.” Ke kar caae ariow e ge kuaago ke nying Artemihj.

<sup>35</sup> Batiene e apahno wiihe ne geew yaa anaa ke kwaago ge arome ke cuowo uleng gene kedea urube yihr gen kea, “Wu yaa Epicoj, beehda gihn me ngahj cang kejea geen Epicoj e ne wiihe ne Wod Juog gihr Artemihj. Thiow ngo ngahj kejea e ne wiihe ne leen wuor gene gihn anaa apahdho ke yoohn maalo. <sup>36</sup> Be ngaa me piem giih ni. Nea neehn maano kea cubu wudhu piny beer mee kedea giih me kuu agweehg ne cohg ge keá tiihyu. <sup>37</sup> Yaa ni ariow ge akahlu kan abea gihr yi Wod Juog Artemihj maa apeej gene tooro. Thiow gihn me raaj maa arob gene ke nying juog Artemihj ngo tooro. <sup>38</sup> Nea Demetruj maa yaa thaahdh giihe cwihny gen ne yab lug rih dhaano, e nihn lug ge nud. Kare nud utihng gene lug maalo yihdh nihn nu. <sup>39</sup> Abea nea beehda ka gwiir giih geew e ne daahdu e amaad gihr yaa geew ngo nud. <sup>40</sup> Ngahy ngo kejea ngo udoohng ne gihn me raaj nea beehn ruohdh Roama ke ne lihng kedea ukoohb gene kejea giih alyaaahb ge atiihyo yi geew tih noon ni. Bang gihn be ngaa me koohbo kejea deeh kwaago gihn atiihj, ngo ayug kaa nying gihn maa athiir.” <sup>41</sup> Naa athume ke rob e ngo ateede teedo yihr nyoge kejea keedh gene. Maa a'aay gene.

### Ge Poal Ge Aci Macedoanya Kedea Akaayo Maa Geen Troaj

**20** <sup>1</sup> Batiene kwaago e Poal yaa ayiiho ge acuohne ne rob yihr gen keehd luube me ciihme cwihny gen. Noono uwiihwe gen uaaye e ngo caa Macedoanya. <sup>2</sup> Poal acaahdho e ciihm cwihny yaa ayiiho ke bang wudh geedh akaahne. Naa awahdh Poale Akaayo, <sup>3</sup> e ngo abeehdo yea ke dwahde adahg. Poal ree anaa agwiire ne cidho Ciihrya,<sup>i</sup> abea wiihe awaare naa alihng ngo kejea Judea ge daahd en ke naah. Noono udooge kuu utiene ucea Macedoanya. <sup>4-5</sup> Yaa naa arwaay Poal ne ci Macedoanya anahg ngad Bearya me nyinge Cobeather Piiruj maa nyoge ariow giih Thecaaloanika, Arijtarkuj kedea Cekuuduj, Gaaw ngad Derba kedea Timodhy, nyoge ariow maa yaa muudihrya gihr Aacya, Tiihcijuj kedea Troapihmuj. Yaa ni ge anaa amoon wong maalo ne koar wan geen Troaj. <sup>6</sup> Yi Luuro, e naa a'aay wane Pihlihibi keehd baabuur. Nihn abiihj anahg wane yi yooh uwahdh wane bang gen Troaj. Wa anahg nihn abiihberiw Troaj.

<sup>7</sup> Ke thiehno Cahng Juog, wudh wan anaa amad wane ka maa acielo ne nywaag amono wa kaa anyoadh Jeacuu ngo yihr wan. Poal anaa apiih ne rob yihr yaa ayiiho uwahdh piny yi diehr waahr bang gihn anahg ngaa muu uaay Ruuwow. <sup>8</sup> Amahr lame ge anaa ke liel me meeny yi wod maalo kaa anaa apiih wane yea. <sup>9</sup> Rihj me nyinge Yuticuj wonge anaa ne nog ke niine kaano anaa apiihe dhe alwiihd gihr riown wuud maalo ne lihng rob Poal. Yuticuj abeehn niine ne gooh unea twar ke niine upahdhe piny. Naa acube uthare e ngo ayuud e ngo athow. <sup>10</sup> Poal abeehn piny bang Yuticuj ubaahbe rih ngo kedea ukwage ngo. Noono maa akoohb Poale kea, “Yaage wu keá diero, nyedhoohg wahy aduu ree.” <sup>11</sup> Maa ado Poale maalo maa abanye yey amono ucame ngo. Batiene kaa acam wane amono, e abar maalo ke rob uwahdhe kaa anahg pinye ne waany upahdh wane yooh ke waahdh. <sup>12</sup> Nyoge Yuticuj akedh gene paajo e cwihny gen med bang gihn ngo ameehg Poale cahro.

<sup>13</sup> Arob Poale kejea an maa yaaj mooge aay wane ke baabuur e wa kwany bang thuur ne ci dhe waadh Acoj. <sup>14</sup> Naa awahdh wane Acoj, e Poal ayedh yi baabuur, noono <sup>15</sup> ubeehn wane Mitelen. Batiene e wa acahg aay uwahdhe kaa abeehn wane Mileatuj. <sup>16</sup> Yi Mileatuj e naa akweer Poale kejea wa keá bar Epicoj. Poal cwihnye atooro bang ugaal wane yi muudihrya gihr Aacya. Poal adaahd ngo kejea nea kare nud e wa ne wahdh Jeruucalem maano e cahng Yaan Amono ngo puud.

### Rob Poal Naa Awiihwe Jo Doong Epicoj

<sup>17</sup> Gihn nu arumo e Poal dhog aohre Epicoj bang jo doonge giih yaa ayiiho kejea beehn gene bange dhe waadh Mileatuj. <sup>18</sup> Naa awahn jo doonge, e Poal ake thubo ke rob yihr gen kobe, “Wu jo'a, ngahy kaa abeehda ke wun kii ngo naa athube ke wong cahng anyuohna tiena yi muudihrya gihr Aacya. <sup>19</sup> Tiihy Juog atiihya e giih nhyaaahm tooro riha, a atiihyo ke ngoohng wong e aduuna uyuog. Thiow giih raahm ge ayoada ke nying giih reje na gweehg Judea ke nyinga. <sup>20</sup> Ngahy thiow ka na puohnya wun ke bang yihdh miehyu maa ke bang kuohn amaade. Kwaad gihn me kony wun ubuodhu batiene Jeacuu beer mee, ngo apuohnya yihr. <sup>21</sup> Nyoge cang ge atoohna, Ujudea kedea ngaa me padh Ujudea kejea wii gene tiihy giih anyoohne kedea yiih gene giih ateed Jeacuu Ruohdh.

<sup>22</sup> “Abea awaahn ni wa ka daahd Wahy Juoge ngo, a dhiil ci geen Jeruucalem. Gihn ngahya, Wahy Juog a kwaaye kaa toohn kii wudh geedhu nu akaahna nu. <sup>23</sup> A atoohn Wahy Juoge kejea giih raahm maa karkoohn ge naa giih uyoada nyuma. <sup>24</sup> Abea wahya ge padh ke diihd yihra. A daahd uthuma tiihy gihn acub Jeacuu Ruohdhe yihra. Tiihy rob ke nying Ciig Beer.

<sup>i</sup>20:3 Jeruucalem naa yi muudihrya gihr Ciihrya.

<sup>25</sup> “Awaahn ni gihn me kana yihru tooro. A buu cahgu ke niido keehdo. Wu anhyaara ke cwiinya cang bang gihn a naa apuohny wun udoohngu ne nyethen Juog. <sup>26</sup> Lum cega piny yihru e man, nea ngaa meehg wihe raanyo ukweere ke lum Jeacuu e beehda gihr ngude e keede. Lum mara tooro yi ngo. <sup>27</sup> Giih adaahd Juoge kejea nyoadha gen yihru ge anyoadha yihru. <sup>28</sup> Koaru rogu beer mee kedea maanyu yaa ayiiho giih acub Wahy Juoge yi cingu beer mee thiow. Nahgu yaa kwaag akuud yaa ayiiho. Ngahyu ngo kejea Jeacuu athow beere yaa ayiiho ge boadhe boadho. <sup>29</sup> Padh gihn me kwihya kejea batiena ka uaaya, e rogu uyoadu wa diehg maa atoohng uthuohne yihd gen. <sup>30</sup> Cahng ngo ubeehn. Cahng ubeehn nyoge mooge kiinu urob gene giih toohd adhaahr ubeehn nyoge mooge keewu uyiih gene toohd nu. <sup>31</sup> Beer nea wa gihn nu e kea cubu wudhu piny. Thiow paru wudhu ke kaa abuhja ke puohny wun. Wu apuohnya ke run adahg ke bang decahngo kedea dewaahr. Nea maano e kea puohnyu wa kwaad kaa apuohnya wun.

<sup>32</sup> “Beer, awaahn ni wu uwiia yi cing Juog kedea muuny gihre e beehda Wahy Juog. Adaahd ubahngge wu be dhieg ke yiih lum Juog e nyoadh ngo yihru kejea Juog wu anhyaare. Nea wu bar maalo ke yiih lum nu, e tee yoadu yoado me kaahn wun kedea udhiile wun ke kahl Paar Juog ka ubeehdu yea tiehd ke nyethen Juog. <sup>33</sup> Ngo ngahyu kejea a padh ngad arojo. Ngiihny dhaano keehd waare giih dhaano maa akaaba tooro. <sup>34</sup> Ngahyu ke karu cang kejea beehda tiihy cinga e naa amuodh an maa yaa tiihyo ke an. <sup>35</sup> Be gihn me kaa nyoadho yihru. Anyoadha yihru ke dhog yiehdhe me thoohd kejea nea wu buu utiihyo ne cohg wa kwaad kaa atiihya, e ngaa me cinge apahdh ree be romu ke konyo. Ngahyu ngo kejea Jeacuu akoohbo kea, ‘Gihn wihe ne maalo beehda muuyo abea padh kaab bang nyoge.’ ”

<sup>36</sup> Naa athum Poale ke rob, e en maa yaa ayiiho cong gen arung gene piny ne kway Juog. <sup>37</sup> Batiem kwaj e Poal abaahb rog gen ne wiihw gen. <sup>38</sup> Be ngaa me piih atooro yi wonge. Cwiiny gen kuu amedo bang gihn akoohb Poale kejea e buu ucahg gene ke niido keehdo. Noono urwaay gene ngo kar baabuur.

### Waadhd Poal Ne Ci Jeruucalem

**21** <sup>1</sup> Naa awiihw wane gen, e wa aci yi baabuur ubeehn wane paajo me cuohn ne Koj. Ruuwow e wa awahdh paan cuohn ne Rohdej. Maa adog wane aay Rohdej uci wane paan cuohn ne Patar. <sup>2</sup> Kaano e naa adag wane yi baabuur maa anaa acaa Peaniihcy. <sup>3</sup> Gihn nu maa awii wane Caaypruj ukwiihy wan noono uwahdh wane Taayr yi muudiihrya gihr Ciihrya. Baabuur anaa ake gaalo Taayr ke kar nihn me nud beere teehr maa akahl kaano yiehg piny. Kaano e dhe yooh ayoad wane ne ci yi diehr geew. <sup>4</sup> Naa acej wane yaa ayiiho, e ge ayoad wane kedea ubeehd wane ke gen ke nihn abiihberio. Yi nihn abeehd wane ke yaa ayiiho, e ge arubo yih Poal kejea ngo keá bar Jeruucalem. Kob gene Poal keá bar bang gihn arob Wahy Juoge yih gen kejea gihn me raaj e ne koar Poal kun ca. <sup>5</sup> Abea naa athum nihn wane e wa a’ay ucidh wane dhe waadh. Yaa ayiiho cang ke maahn gen kedea nyethen gen wa arwaay gene dhe waadh kar baabuur. Naa awahdh wane dhe waadh e cung wan arung wane ke piny ne kway Juog. <sup>6</sup> Batiene e rog wan awiihw wane naa aciel acielo umon wane yi baabuur kedea udo gene miehy gen.

<sup>7</sup> Maa abar wane maalo ke waadh wan. Wa a’ay Taayr ubeehn wane Toleamij. Kaano ane wane Toleamij wa aci bang yaa ayiiho uniihn wane bang gen cahng nu. <sup>8</sup> Ruuwow e wa awahdh Cejearya. Wa apiih paar Pihlihb ngad puohny Ciig Beer. Thiow anahg e naa anaa akwany ke yaaj abiihberio geen Jeruucalem ne kony jo oohr. <sup>9</sup> Yihre anaa nyetheamaahn angween me puud kuu anyuom, me nea rob Ciig Beer yih nyoge.

<sup>10</sup> Maa aceng wane kaano ke kar nihn mooge. Noono cahng ni, e agamloohngjuog me nyinge Agabo ake beehno ke yoohn Judea. <sup>11</sup> Naa abeehne bang wan e gaaj gih Poal akaabe utuohye tiene maa cinge maa akoohbe, “Kob Wahy Juoge kea ngad gaaj gihn utuohj Judea wa kaa atuohya riha yi geen Jeruucalem kedea ucub gene ngo yi cing nyoge maa aleye.”

<sup>12</sup> Naa alihng wane gihn ni arob agamloohngjuoge, e wan maa nyoge mooge wong Poal akway wane kejea ngo keá bar Jeruucalem. <sup>13</sup> Abea ngo abeehr Poale kea, “Gihn keree e yuog cwiiny adhaahr ukwaaru nyingu ke lalo? Adhaahr yeya angeeru. A caa Jeruucalem. Gihn me thihra tooro, keehd thoo e a uthoo ke nying Jeacuu.” <sup>14</sup> Naa abahngge Poal lum wan keá lihngo, e ngo arob wane kejea ngaa me peehmo ke Juog tooro. Juog e nuu utiihy gihre ne nhyaaare.

<sup>15</sup> Naa abeehd wane kaano ke kar nihn me nud, e rog wan agwiir wane ne bar Jeruucalem. <sup>16</sup> Yaa ayiiho mooge giih Cejearya ge acaahdho tiehd keehd wan. Noono ukedh gene wan paar Nacon ngad Caaypruj. Nacon anahg ngaa maa ayiih lum Jeacuu ke coon yi nihn umodho.

### Gihn Arob Yaa Ayiihe Naa Alor Gene Poal

<sup>17</sup> Wa alor yaa ayiihe beer mee naa awahdh wane Jeruucalem. <sup>18</sup> Ruuwow e Poal ake cidho keehd wan ne ci ne lieu Jeamij. Akuud jo doong yaa ayiiho ge ayuud wane e ge amahdo bang Jeamij. <sup>19</sup> Batiem maahdh e Poal ake thubo ke kwaan kaa akony Juoge en ke puohny nyoge ke bang wudh geedhe kedea uyiih gene giih apuohnye.

<sup>20</sup> Kaa alihng gene giih arob Poale, e koohr Juog amuohj gene muohjo keraahyo. Caahn e ge arubo yih Poal kob gene, “Poal umiiho, beehda gihn me beer kejea Juog yih akonye yi puohny noono apuohny nyoge ke bang wudh geedhe. Cwiiny wan med thiow naa apuohny yaa padh Judea. Abea gihn daahd wane ke teedo yihri e aman: keehd yi geen Jeruucalem yaa paaro me thoohd lum Juog ayiih gene. Keehd maa anahg gene nyoge maa amag loohng Moaje teeg mee. <sup>21</sup> Arob yih Judea giih ayiiho naa yih akoohbo kejea Judea giih be beed piny Judea ge keá tiihyo ke loohng Moaje. Naa yih akweer kejea nyethen gen keá thoam kedea beehd gene ke beehd yaa padh Judea. <sup>22</sup> Ngo ngahy awaahn ni kejea yih awahh Jeruucalem. Abea nea neehn maano e gihn e nuu utiihyi? <sup>23</sup> Nea mar wan e gihn e ne tiihyi: yug gihn me nyoadh ngo kejea yih ngaa me wuor loohng Moaje. Nyoge angween ge nud ke wan maa akuohng rog gen nyum Juog. Adoohng e giih kweehr ge ne daahd gene ke yugo. <sup>24</sup> Mad rihi bang gen ucidhi ke gen yi wod amaad uliel wudhu kedea nahge yihn e ne cub ngiihny liel wihj piny. Gihn nu nea ngo ayugi e ungahy nyoge kejea yih

20:25 28:23    20:26 18:6    20:28-31 11:23    20:28 1Pii 5:2    20:29 Mat 7:15; Jon 10:12    20:30 Gal 4:17; 1Jon 2:19

20:31 19:10; 1Th 2:11-12; 2Kor 11:28    20:32 26:18; 1Th 5:23-24; 2Th 1:11-12    20:33-34 18:3    20:35 Mat 10:8    20:38 20:25

21:4 10:19; 21:11    21:5 20:36    21:8 6:5; 8:5, 40    21:9 2:17    21:10 11:28    21:11 20:23; 21:33; Rom 15:31    21:13 20:24

21:14 Luk 22:42    21:18 15:13; Gal 1:19    21:19 11:18    21:21 Thoam: 16:3; Gal 3:25, 28; 5:2

ngaa me wuor loohng paaro ke dhe yoohn beehdi kii ngo. Thiow unghy gene kejea giijh arob ke nyingi ge beehda giijh maa toohd. <sup>25</sup> Abea keehd maa ateed wane ngo yihri utiihyi giijh, e ngo be rob wane yihr yaa ayiiho ge padh Judea kejea dhiil gene kwaad giijh arob loohng Moaje ke tiihyo. Warga ngo anaa agweed wane yihr gen ne teed ngo yihr gen kejea kwaad caame giijh akweehr yihr yiehdhe ge keá cam gene. Thiow remo kedea laahy maa athow e remo kuu akuong woj piny umodho ge keá cam gene. Arob wane yihr gen thiow kejea wii gene giijh bal, ge keá cahg gene ke tiihyo keehdo.”

<sup>26</sup> Poal lum jo doonge aliinghe. Yi ruu piny, e ngo acidho ke yaa ni angween ne liel wudh gen. Batien liel wihj, e Poal aci wod amaad ne rob cahng ubeehn yaa angween ni, uyug ngaane gihr kweehr gihre naa akuohnghe ree nyum Juog ke nyinge.

### Judea Mooge Poal Amaahd Gene E Ge Daahd Ngo Ke Naah

<sup>27</sup> Judea mooge giijh muudiihrya gihr Aacya Poal aniid gene yi laaro gihr Wod Juog gihr Jeruucalem. Ngo anaa aniid gene e maano e nihn abiihberiow cahng yug giijh kweehr ge cahng ke thumo. Kaano e Judea giijh ge athubo ke kwaago e ge Iyaahb wudh nyoge abea e Poal akwahg gene piny kob gene, <sup>28</sup> “Jo paar wan wu yaa Yijarael beehnu ne kony wan ke nyin. Nyin puohny nyoge ke bang yihdh geedhe kejea yaa Yijarael maa loohng Moaje kedea Wod Juog gihr nying gen tooro. Maanyu kaa akahle Ugriihge yi laaro gihr wod Juog ne jwaahg wod Juog!” <sup>29</sup> Arob gene wa maano bang gihn Troapihmuj ngad Epicoj anaa aniid gene yi buur geew e ucaahdho tiehd keehd Poal. Mar gen cuohn gene kejea ngo anaa akedh Poale yi laaro gihr wod Juog.

<sup>30</sup> Kaano e yaa yi laaro kar kweehr kwaago aliinghe gene maa abeehn gene ne maany gihn ayug ree. Nyoge mooge kiin gen ge agoohdo ukwahg gene Poal piny kedea upiey gene ngo oogo. Ngo apiey yi laaro mar oogo, buud laaro gihr yi dwaar. Kaano maa aciehg gene dhog wuude giijh keew laaro mar oogo kedea mar yi dwaar. <sup>31</sup> Nye kaano adaahd gene Poal ke naah, e dhog aguo wahdho bang lewa gihr acaakere giijh Roama. Arob yihr lewa kejea alyaaahb ree atihnghe ke bang geew cang. <sup>32</sup> Gihn nu e ngo kuu acahg gaalo. Piow piow e jaabidhe kedea acaakere ge akaabe ucidhe keehd gen kaa ayug alyaaahbe ree yea. Naa aniid nyoge lewa e ngo abeehno keehd yaa e cing gen awii gene ne puohd Poal.

<sup>33</sup> Maa aciidhe bang Poal maa arobe ngo kejea mag Poal kedea tuohye keehd gele ariow. Batien kaa atuohj Poal, e lewa ake peehyo kea, “Beehda ngaa e gihn kedea gihn e naa ayuge?” <sup>34</sup> Adiehr maa ayoad atooro ke nying nyoge ge ake kwaago kedea ge be rob gihr nyepiny acielo. Noono urobe ngo kejea kedh Poal kar acaakere. <sup>35</sup> Poal adhiil acaakere ke tihngo naa awahn gene kar abahre me yedh ne ci kar acaakere maalo. Poal adhiil gene ke tihngo bang gihn yaa ayug alyaaahb cwihny gen anaa aleehdho rih Poal ke ree. <sup>36</sup> Noono ubuodh gene batien Poal e ge ukwaago kejea, “Wiiu ngo yihr wan ne naah!”

### Poal Ree Ateede Yihr Nyoge

<sup>37</sup> Naa awahn Poale wiih gug abahr yedh e ngo ake rubo yihr lewa kea, “Yihra ne gihn me daahda ke robo.”

Maa akoohb lewe yihre, “Yih ka urubo ke dhog Griihge?” <sup>38</sup> Mara ngahda kejea yih beehda Umicihr gihn anaa apaahr dom rih ukuumo ni? Umicihr gihn anaa abeehn ne aay keehd nyoge kar aliihbe angween maa akedh lwahr yi paajo bang gihn ge yaaj me nahg nyoge.”

<sup>39</sup> Maa abeehr Poale ngo kobe, “A beehda Ujudea gihr geen Tarcuj e nii muudiihrya gihr Celiichya. Beehda geew me nyinge awiihjeraahyo. Cedhree, meehga rob yihr yaa ni kwaag ni.”

<sup>40</sup> Ubeehn lewe maa ayiihe kejea rub Poale. Noono e Poal ake cuungo wiih abahr utihnghe cinge maalo yihr nyoge kejea leng gene. Naa aleng gene e Poal athubo ke rob ke dhog Judea kobe,

**22** <sup>1</sup> “Jo paar wan, wu jo doong paajo maa wu yaa rihj, lihngu loohnga e teeda yihru ni bang gihn awuohj maa atiihya tooro. Lihngu ngo bang gihn a daahd ujaahya giijh arobu riha.” <sup>2</sup> Naa aliinghe nyoge Poal e urubo yihr gen ke dhe paar gen, e ge ake lengo ne caaj. Noono ubar Poale maalo ke rob kobe, <sup>3</sup> “A Ujudea neehn wun. A anyuol yi geen Tarcuj, muudiihrya gihr wan beehda Celiichya. A adoongo kii geen Jeruucalem kan. Gamaliel e ngad puohny gihn duohng e naa apuohny an. A apuohny Gamaliel e ne cohg keehd dhe yoohn ka mag loohnghe giijh paaro beer mee, loohnghe giijh awii ge kuowo naa acoone piny yihro. Thiow tiihj yihr Juog e naa anaa acuba yi cwihnya wa kaa acubu ngo yi cwihnyu awaahn ni. <sup>4</sup> Yaa ayiih lum Jeacuu be gihn me raaj maa awiia e ngo kaa anaa ayugo rog gen. Thoo ke ngude ayoad nyoge mooge kiin gen ke nyinga. <sup>5</sup> Ngaa duohng yaa lam kedea yaa akuud Judea ngo rom gene kaa teedo yihru kejea gihn aroba ngo beehda adiehr. Bang gihn anahg gen ge naa anaa agweed warga me maga yaa ayiiho beere ge kahla ke geen Jeruucalem e ge atuohj. Adiehr muon a a'aay e a kaahn warga ne ci Damajko.

<sup>6</sup> “Naa awahdha ka me cahng keehd Damajko, e cahng nii diehr wihj, e gihn me wa maahny kodh piny ameenye meenyudoohng buuda ne weehny. <sup>7</sup> Maa apahdha piny ne riehb kedea ulihnga duon dhaano me cuohn an kea, ‘Coal! Gihn e tiehngi an ater?’

<sup>8</sup> “Maa apeehea kaa, ‘Yih beehda ngaa ruohdh?’

“Maa abeehre ngo kobe, ‘Beehda an a Jeacuu ngaan atiehngi ater.’ <sup>9</sup> Yaa anaa anudo tiehd keehd an beehda gihn ameeny piny e naa aniid gene, abea giijh arob duole lum yihdh gen kuu angahy gene.

<sup>10</sup> “Maa apeehea koba, ‘Ruohdh, yuga gihn?’

“Maa aduoge ngo yihra kea, ‘Aj maalo ubari keehd waahdhi ne ci Damajko. Gihn daahd Juoge kejea tiihyi ngo urob yihri kun caa.’ <sup>11</sup> Bang gihn, gihn ameeny piny wonga ayugi ne cihd cihd, utoor gihn me neehn yihra, e yaa anaa ke caahdho keehd an cinga amag gene upiey gene an geen Damajko.

<sup>12</sup> “Ngaa me nyinge Anaanya anudo Damajko. Anahg ngaa me leebe wuor yaa paaro wuoro keter kedea loohng Moaje ge amage beer me. <sup>13</sup> Anaanya abeehno ucuunge buuda maa akoohbe, ‘Coal umiia yab wongi.’ Kaano cog e wonga ake yabho maa aniida Anaanya.

<sup>14</sup> “Maa arube yihra kea, ‘Coal, Juog ge beehda Juog gihn wuor ge kuowo ni yih akwanye beere gihn daahde ngahyi ngahyo. E naa gihn ayoadi Ngad Boadh nyoge maa uniidi ngo kedea urube yihri beere duone lihngi lihngo. <sup>15</sup> Bang gihn Juog daahd unahge yihn e nuu urob ngo yihr nyoge kejea Jeacuu aniidi kedea duone alihngi. <sup>16</sup> Abea awaahn ni gihn me cahgi ke koaro tooro keehdo. Aj maalo beere wihi ke muojo keehd piih luogwahy, ne nyoadh ngo kejea lum Jeacuu ayihi.’

<sup>17</sup> “Batiene e a ado geen Jeruucalem. Naa acaa yi laaro gihr wod Juog e gihn moogo anaa ne niilm yi wonga kaano akwahya kwahyo. <sup>18</sup> Maa aniida Jeacuu e urubo yihra kea, ‘Laar aay geen ni piow piow bang gihn yaa Jeruucalem kwaad gihi muu urobi yihr gen ke nyinga ge buu uyiih gene.’

<sup>19</sup> “Maa abeehra ngo yihre koba, ‘Ruohdh, beehda gihn me ngahy yaa kane kejea a na caa yihdh wuud amaad ne daahd yaa ayiih lumi beere ge ke puohdo. <sup>20</sup> A anudo cahng anahg Yijtepen ngadi ke nying gihn ayiihe lumi. Thone anaa apahdh yi cwihnya kedea waay yaa anahg Yijtepen ge anaa awii yihra!’

<sup>21</sup> “Maa arub Jeacuu kea, ‘Yih dhiil aay! Bang gihn a daahd ucidhi ke bang wudh geedhe ne puohny yaa padh Judea ge daahd Juoge udoohng gene ne yaae.’ ”

<sup>22</sup> Nyoge lum Poal anaa alihng gene lihngo ke leng leng. Abea naa arube ke nying ci bang yaa padh Judea, e ge ake thubo ke kwaago kob gene, “Nyaa wiiu ke ne gihn! Nahgu ngo! Keá meehgu bodho keehdo!”

<sup>23</sup> Noono upiih gene ne wuu ngo e cwihny gen arahnyo uyiej gene waay gen oogo kedea e ngoom yier gene ke maalo ne nyoadh rahny cwihny gen. <sup>24</sup> Maa arob lewe ngo kea kedh acaakere Poal kar beehd gen. Ateede thiw kejea puohd Poal beere gihn araany cwihny Judea ree ngo dhiile kaa robo. <sup>25</sup> Naa atuohj acaakere Poal beere e ngo ke puohdo, e Poal ake rubo yihr jaabidh gihn anaa buude kea, “Kare nud yihri upuohdi ngad dhaahr Roama me kuu akihm kedea me kuu ayug awuoj ne?”

<sup>26</sup> Naa alihng jaabidhe gihn arob Poale ni, e ngo acaa bang lewa urube yihr ngo kea, “Ruohdh! A beehn bangi ke nying lubo maa alihnga! Ateed nyin amage kea e beehda ngad dhaahr Roama! Bara maalo ke puohde ne?”

<sup>27</sup> Noono ucidh lewe bang Poal maa apeehe ngo kobe, “Teed ngo yihra. Yih beehda ngad Roama ne?” Maa abeehr Poale ngo yihre kobe, “Ayiih, a beehda ngad dhaahr Roama.”

<sup>28</sup> E lewa acahng rob yihr Poal kejea, “A adoohng ne ngad dhaahr Roama kaa nying amahr ngiihny me thoohdh naa acuba yihr ruohdh Roama.”

Kob Poale, “Mara ngo kaa ayoado kaa dhe yoohn cub ngiihny. A anyuol e a ngad Roama.”

<sup>29</sup> E lewa acahng tudo naa angeye ngo kejea Poal ngo ngad Roama kedea ngo atuohye ke gele. Gihn nu maa arobe ngo yihr acaakere, yaa anaa puohd ngo, kejea aay gene.

### Poal Akahl Yi Lug

<sup>30</sup> Lewa adaahd unahge gihn arahny cwihny Judea rih Poal ke nyinge. Ke nyango e acaakere aohre bang ngaa duohng yaa lam kejea cuohne jo doonge gihi Akuud Judea beere gihn araany cwihny gen rih Poal teed gene teedo yihre. Naa amahd yaa akuude kar lug gihr gen, e Poal akahl nyum gen, e gele ge agoony oogo ree.

**23** <sup>1</sup> Noono e Poal amaahny bang yaa lug duug maa arube yihr gen kea, “Yaage, ke kaa abeehda beehdo uwahdhe cahng tihn, e gihn me diera ke nyinge tooro nyum Juog bang gihn yeya athaar.” <sup>2</sup> Kaano e Anaanya, ngad duohng yaa lam ngo arobe yihr yaa cahng ke Poal kejea dhoohng gene dhe Poal. <sup>3</sup> Kob Poale yihr Anaanya kea, “Juog kara ucoale. A ukhmi kaa loohng aweehne abea loohng gihi ngo ge adhahli naa akoohbi kejea dhoohng an. Yih uroomo wa apuomo me yea apahng ke kuuno.”

<sup>4</sup> Gihn nu e yaa anaa anudo buud Poal ge ake rubo yihre kob gene, “Wa ngaa acub Juoge nyum yaa lam ngo ayenyi!”

<sup>5</sup> Maa abeehr Poale ngo kea, “Jo wan, ngo anaa akwihya kejea e naa ngaa duohng yaa lam. Beehde e gihn maa agweed yi kitaab Juog naa,

‘Gihn me raaj keá robi rih ruohdh paajo.’ ”

<sup>6</sup> Naa aniid Poale ngo kejea yaa anaa yi lug, nyoge mooge kiin gen ge yaa Caaducean maa mooge ge yaa Paarijea, e Poal duone atihng maalo kobe, “Jo wan, a ge niidu kan ni, a ngad Paarijea. Wura anahg ngad Paarijea thiw. A akahl yi lug bang gihn gaahna ngo kejea nyoge maa athow ge ucahr cahng moogo.” <sup>7</sup> Kaa arub Poale ke nying cahro, e yi lug ake paah ne dahg uthub Paarijea maa Caaducean ke weehr ke rog gen. <sup>8</sup> (Bang gihn kob Caaducean kejea nyoge ge be cahr kedea gihi me cuohn ne wuohdjuog kedea atihbe ge tooro. Paarijea kob gene gihi nu ge nud.)

<sup>9</sup> Gihn nu e kwaago acaa maalo ne juj keraahyo. Nyoge mooge kiin yaa puohny loohng Juog me ne kur Paarijea ge ayedh maalo e ge upeehmo kob gene, “Gihn me raaj maa atihye maa ayoad wane ree ngo tooro. Ka moogo gihn robe beehda adiehr kejea wuohdjuog wale atihbe ge arubo yihre.” <sup>10</sup> Kwaago maa weehr ge anaa abar maalo yi lug keraahyo. Gihn nu e arob lewe kejea kahl Poal oogo keew yaa kwaag uduoge kar acaakere. Lewa atud ka moogo e Poal bang gene bango uyug gene gihn me raaj rih ngo.

<sup>11</sup> Yi dewaahr nu, e Jeacuu ake acuungo buud Poal maa arube yihr ngo kea, “Poal deed cwihny beer mee. Dhiia ateedi beer mee kan Jeruucalem. Thiw dhiia udhiili ke teedo yi geen Roama.”

### Judea Me cwihny Gen Raaj Rih Poal, Ge Daahd Ngo Ke Naah

<sup>12</sup> Ruuwow ke nyango, e Judea gihi amaan Poal ge kuu agaalo ne daahd dhe yooh me guo gene Poal ke naah. Noono maa amahd gene ne gwiir dhe yooh me nahg gene Poal. Gihn nu e rog gen akuohng gene nyum Juog kejea ge be cahmo maa ge be mahdho nea padh Poal e naa anahg gene. <sup>13</sup> Yaa akuohng rog gen ge anahg jiehariow ubar wonge. <sup>14</sup> Batiene e ge aci bang jo doong yaa lam maa jo doong paajo ukoohb gene, “Rog wan akuohng wane nyum Juog kejea

<sup>22:23</sup> Ne nyoadh ngo kejea cwihny gen raaj e waay gen ayiej gene oogo rog gen kedea e ngoom yier gene ke maalo.

**22:16** 8:35-36; 9:14 **22:17** Gal 1:18 **22:20** 7:58; 8:1 **22:21** 9:15 **22:22** 21:36 **22:25** 16:37 **23:1** 24:16

**23:2-3** Mat 23:27-28; Jon 18:22-23 **23:6** 26:5; 24:21; Pihp 3:5-6 **23:8** 4:1-2 **23:9** 25:25; Luk 23:4

**23:11** 18:9; Rom 19:21; 27:24; 28:16, 23 **23:12** 9:23 **23:14-15** 25:3

wa be cahmo maa gihn me maadh wane tooro nea padh Poal e naa anahg wane. <sup>15</sup> Awaahn kan oohru dhog ke nying Akuud Judea bang lewa ne rob yihre kejea, wu daahd uohre Poal yihru beere dhe peehnyu peehnyo urobe lubo maa adiehr yihru ke nying gihn amage. Abea wa yaa akuohng rog wan ngo uguo wane ke naah e ngo puud kuu awahn bangu. Bang gihn dhe yoohn nahg Poal ngo agwiir wane beer mee.”

<sup>16</sup> Abea waahd nyemiih Poal ka gihn agweehg ngo alihnge. Noono ucea kar acaakere ne rob gihn alihnge yihr nahy.

<sup>17</sup> Gihn nu arumo e Poal jaabidh acielo acuohne cuohno urube yihr ngo kea, “Kedh nyedhoohg gihn bang ngaa duohngu. Ne gihn me daahde ke robo yihr ngo.” <sup>18</sup> Ubeehn jaabidhe uaaye ke nyedhoohg ukedhe ngo bang lewa.

Maa akoohbe kea, “Maabuu gihn nyinge Poal e naa arob ngo kejea kahla nyedhooh ni bangi. Yihre ne gihn me teede yihri.”

<sup>19</sup> E lewa nyedhooh ni amage ucidh gene kar ge keed gen maa apeeध्ये nyedhoohg kea, “Gihn e ne daahdi ke robo yihra?”

<sup>20</sup> Kob nyedhoohg kea, “Jo doonge giih Judea lubo amad gene kejea keroo e ge beehn bangi ne kway yihn beere Poal kedh kar Akuud Judea udoohng wa caa ne peehny dhe beere adiehr amage ke nyinge robe robo yihr yaa akuud.

<sup>21</sup> Lum gen keá yiih. Bang gihn nyoge jiehariow ubar wonge ge apahn yi yooh ne koar Poal. Yaa ni rog gen akuohng gene nyum Juog kejea ge be cahmo maa gihn me maadh gene tooro nea padh Poal e naa anahg gene. Rog gen agwiir gene, adoohng e yihn ne koar gene uohri Poal yihr yaa akuud.”

<sup>22</sup> Noono e lewa ake rubo yihr nyedhoohg kobe, “Gihn arobi yihra keá cahg ke robo yihr ngaa moogo.” Maa ateede ngo yihr nyedhoohg uaaye.

<sup>23</sup> Batiene e lewa jaabidhe ariow ge acuohne maa ateede ngo yihr gen kea, “Kwanyu acaakere jiehabiihje ariow. Gwiiru waahdh ne ci Cejearya. Gwiiru ciehye jiehadahg wonge apaar yihr acaaker kaahn toong. Gwiiru rogu beere wu dhiil aay tihn kar caa abiihjbengween ke waahr. <sup>24</sup> Thiow gwiiru ciehye mooge me kaahn Poal beere ngo kedhu ke bang muudiihr Pelig e gihn me raaj me yoad ngo tooro yi yooh.” <sup>25</sup> Kaano e lewa wargahng ni agweede yihr Pelig wa gihn,

<sup>26</sup> “Beehda an Klaawdio Licyaj e gihn gweehdo yihri, yih ngaan duohng muudiihr Pelig.

“Yih amaahdha keraahyo.

<sup>27</sup> “Judea ge abeehn ne pahdh rih nyin oohra yihri ni. Ngo amag gene e ge daahd unahg gene ngo. Lubo abeehna ne yoado kejea nyin beehda ngad dhaahr Roama. <sup>28</sup> Ngo anaa akedha yi lug bang Akuud Judea beere gihn amaan gene ngo ke nyinge yoada yoado. <sup>29</sup> Ngo abeehna ne yoado kejea gihn me raaj maa atiihye ne cohg ngo tooro me nahge wale me kedhe yi thijin. Ngo acaa ne yoado kejea ngo amaahd kaa nying kwaad giih loohng yi paajo. <sup>30</sup> Abea lubo kuu ajoor kaano! Gihn raaj e abeehna ne yoada beehda gihn agwiir Judea mooge kar nahg Poal e ngo nii cinga! Gihn nu e naa meehga oohr ngo yihri kedea uroba ngo yihr yaa daahd lug keehde kejea cidh gene ne lug nyumi.”

<sup>31</sup> Noono ubeehn acaakere ugwiir gene rog gen wa kwaad kaa arob lewe. Ge a’ay ke Poal yi dewaahr nu ne cidho geen Antipaatrij. <sup>32</sup> Naa aruu pinye e acaaker muu caahdh ke tien gen ge ado Jeruucalem abea acaakere muu wudh ciehye ge naa abar keehd Poal ne ci Antipaatrij. <sup>33</sup> Naa awahdh acaakere Cejearya, e warga acub gene yihr muudiihr kedea uwii gene Poal yi cinge. <sup>34</sup> Naa akwaan muudiihre warga, e Poal apeeध्ये ke muudiihrya gihr gen. Naa arob Poale ngo kejea e ngad muudiihrya gihr Celiichya e robe yihr ngo <sup>35</sup> kea, “Lumi ulihnga nea yaa daahd lug ke yihn ge ubeehn.” Noono uteede ngo kejea kedh acaakere Poal yi deeh wod gihn duohng naa ageer Eroade. Kaano e naa anaa abeehd Poale yea e ngo koar acaakere koaro.

### Poal Akahl Judea Nyum Lug

**24** <sup>1</sup> Batiene nihn abiihje e Anaanya, ngaa duohng yaa lam aci Cejearya keehd jo doonge mooge kedea ngad cwag yi lug me nyinge Teartooluj. Gihn nu e ge abeehn nyum Pelig ne rob giih reje naa atiihy Poale. <sup>2</sup> Naa acuohn Poal, e Teartooluj ake thubo ke teed lug gihn ne keew gen ke Poal kobe, “Yih ngaa duohng nyum nyoge, paajo amagi beer mee ke deeh ka me laaj e keehg tooro kiin nyoge. Thiow paajo atihngi maalo ke nying giih beey e tiihyi kedea ngahy koal nyoge. <sup>3</sup> Gihn nu apahdh yi cwihny paajo ke kare cang kedea koohri amuhj wane keter. <sup>4</sup> A be daahd ugana yihn keehd luube me thoohdh. Abea nea kare nud kea meehg wan rob nye lum wan gen yihri.

<sup>5</sup> “Nyin ayoad wane ne ngad ukeehg me lyaahb paajo. Alyaahbe ge ayuge kiin Judea yi waahdhe noono anaa acaahdhe ke bang wiih pinye kedea en ke ngude e naa ruohdh akuud yaa Naajaread. <sup>6</sup> Bang gihn adaahde ujwaahge Wod Juog thiow e naa gihn amag wane ngo noono. Cwihny wan anaa bange beere lug ke luuo ke dhe yoohn mar loohng paar wan. <sup>7</sup> Abea Licyaj, ngaa duohng jaabidhe ree akaange yea maa atahny acaakere rog wan uwahdhe kaa akahl gene ngo oogo yi cing wan ke bad. <sup>8</sup> Noono maa ateed Licyaje ngo kejea ngaa daahd lug kea beehne nyumi. Keehd yihn, nea ngo peehny peehnyo e dhiile kaa yiiho kejea wa arob giih maa ather ree.”

<sup>9</sup> Giih arob Teartooluj rih Poal ge adog Judea naa anudo ke bero.

### Poal Goony Ngude

<sup>10</sup> Kaano e muudiihr wiie aloge ke bang Poal beere Poal urubo. Noono uthub Poale ke rob kea, “Cwihnya med keraahyo ne jaahy giih arob ke nyinga nyumi. Cwihnya med bang gihn ngo ngahya kejea yih naa amag paan ke kar run me thoohdh mee. <sup>11</sup> Keehd yih ruohdh e adiehr yi loohnga romi kaa yoado. Nihn apaar wonge ariow ge poohd kuu athum awaahn ni naa anaa caa yi laoro gihr Wod Juog Jeruucalem ne yug giih kweehr. <sup>12</sup> A kuu aniid Judea e a upeehmo ke luube ke nyoge. Thiow a kuu ayoad gene e wudh nyoge raanya raanyo ne yug giih alyaaahb. Kihd ngaa me wiie araanya ngo tooro ne yug giih alyaaahb yi laoro gihr Wod Juog wale ke yihdh wud amaad wale keehd ke bang yi geew. <sup>13</sup> Beehn yaa ayab lug rih kah gene nyoge nyum lug kan me teed ngo kejea giih arob gene riha ge ather. <sup>14–15</sup> Dhe yoohn nyaahn e puohnya lum Juog kii ngo kob gene ngo be room keehd dhe yoohn anyoadh loohng Moaje. Gihn nu rob gene nu, beehda toohd. Lum Juog tiihya tiihyo wa ka na tiihy ge kuow wan naa acoone ngo. Juog Aciehg e naa Juog

gihn ngahya, Juog gihn gaahn ge kuowo naa acoone. Thiw luub agweed yihdh kitaabe giih Juog ge ne tiihya keehd gen. A puohny lum Juog maa adiehr e teed ngo kejea nyoge cang ge ucahr. Nyoge me beey ge umeehg Juoge cahro kedea umihn cwihnye rog gen. Thiw nyoge me reje ge umeehge cahro kedea ukhme gen ke gihn me raaj. Giih nu ge naa giih gaahna kedea ge gaahn yaa ni kane gaahno thiw. <sup>16</sup> E naa gihn kaahna riha ke dhe yooh me ne cohg beere a ubeehdo e yeya athaar nyum Juog kedea nyum nyoge beehd.

<sup>17</sup> “Run me thoohdh ge anahga e a tooro yi geen Jeruucalem. A aduo ke ka me cahng mee ne kahl ngiihny yihr jo'a ge beed Jeruucalem kedea ne yug giih kweehr yihr Juog. <sup>18</sup> Anahg yi laaro gihr wod Juog maano e a athum ke yug giih kweehr e naa ayoad Judea an. Nyoge maa anudo ke an atooro kedea giih alyaahb maa anudo atooro. <sup>19</sup> Judea mooge maa abeehno ke yoohn muudiihrya gihr Aacya ge anaa anudo. Gihn ge bahng ge kuu abeehn kan ne rob gihn raaj naa atiihya! Gihn e tud gene ke beehno? <sup>20</sup> Tum yaa ni ke peehnyo ke gihn awuohya nyum yaa Akuud Judea. Ka moogo e ge ukoohbo kejea duona atihnga maalo ke kwaago ne cier giih toohd maa arob riha. Beehda gihn me raaj nea dhaano ukwaago ne jaahy awuohj ne? <sup>21</sup> Akoba nyum Akuud Judea kaa, ‘Cwihnyu ne bange unahgu an bang gihn ayiha lum Juog e koohba kejea yaa athow ge ucagro ukuow gene keehdo?’ ”

<sup>22</sup> Pelig anahg ngaa me ngahy dhe yoohn nyaahn e wuor Juog kii ngo. Noono naa alihng giih arob cang e wiil lug akeedhe kobe, “Nea Licyaj ngaa duohng jaabidhe ngo ubeehn e lug gihru umaanya.” <sup>23</sup> Maa arob Pelige ngo yihr jaabidh gihn acub Poal yi cinge kejea kedhe Poal yi karkoohn ne beehdo. Abea ne meehg gom Poal beehn bange kedea giih kahl gene yihre ge keá mahn.

<sup>24</sup> Batien nihn me noog e Pelig ake beehno keehd cihe Druciihla. Druciihla anahg nyaar Ujudea. Gihn nu e Pelig dhaano aohre ne cuohn Poal bange. Poal acuohne beere giih rob Poale ke nying lum Jeacuu Ngad Boadh nyoge ge lihng lihng. <sup>25</sup> Poal Pelig apuohnye kejea nyoge cang dhiil beehdo ke beehd me beer me ne cohg kedea koar gene rog gen beer mee yihdh giih thaang. Ateed Poale thiw kejea yaa atiihy giih me reje ge kihm Juoge kihmo ke gihn me raaj. Naa alihng Pelige kwaad puohny ni e ngo anahg lwahre maa arube yihr Poal kea, “Aayi, yih ucahga ke cuohn cahng moogo nea wiha laahw.”

<sup>26–27</sup> Pelig Poal keá lonyo keehd maa atoor awuohj maa yoad ree. Keá lonyo bang gihn adaahd umihn cwihny Judea ree kedea kea ka moogo e ukoog Poale ke ngiihny beere ngo lonye lonyo. Batien run ariow e Pelig ake waaro uluuny Poarcoj Pejtuje kare. Pelig Poal awiie yi karkoohn naa a'aaye.

### Kob Poale, “Luuu Kedh Nyum Jaah Roama”

**25** <sup>1</sup> Batien nihn adahg naa awahn Poarcoj Pejtuje yi muudiihrya, e ngo ake aay Cejearya kaa abeede ucea Jeruucalem. <sup>2</sup> Yaa lam kedea jo doong Judea giih reje naa atiihy Poale, ge ayab gene lug rih Poal, ge ateed gene yihr Poarcoj Pejtuj. Noono maa akway gene wong Poarcoj Pejtuj kejea, <sup>3</sup> “Unahg gihn me beer e naa atiihyi yihr wan nea Poal oohri ke bang wan Jeruucalem.” Abea ka ge anaa akuud pahn yi yooh unahg gene Poal. <sup>4</sup> Maa abeehr Poarcoj Pejtuje ngo kobe, “Poal beed yi karkoohn Cejearya e thiw a beehda ngaa muu uaay ka me cahng ne do Cejearya.

<sup>5</sup> Nahe wun, wu jo doonge wu ne cidhi Cejearya keehd an beere lug gihru yabu yabo nea awuohj maa atiihy Poale nud.”

<sup>6</sup> Pejtuj anahg kiin kar nihn abiihbedahg ke nihn apaar yi geen Jeruucalem noono ucea Cejearya. Ruuwow, e Pejtuj acaa kar lug uohre dhaano bang Poal <sup>7</sup> Naa awahn Poale yi lug, e Judea naa abeehno ke yoohn Jeruucalem ge ake cuungo buud Poal e ngo atieg gene piny maa athub gene ke rob giih me thoohdh me reje rih Poal. Abea giih nu arob gene ge adhaahr bang gihn, gihn maa athiir maa arob gene tooro.

<sup>8</sup> Noono ujaahy Poale giih arob ree naa akoohbe kea, “Loohng giih Judea yihdh gen kaa dhahlo maa Wod Juog gihn me raaj maa atiihya ke nyinge ngo tooro kedea gihn me raaj maa aroba ke nying jaah gihr Roama ngo tooro.”

<sup>9</sup> Pejtuj anaa adaahd umihn cwihny Judea ree, noono maa apeeध्ये Poal kea, “Cwihny ne bange beere yih caa Jeruucalem umaanya lug gihri kun caadi nyum Akuud Judea?”

<sup>10</sup> Kob Poale, “Ruohdh, jaah gihro e naa acub yihn ne mag paan ke nyinge. A ke nguda, a beehda ngad dhaahr Roama. Beehda gihn me ngahj kejea wo yaa dhaahr Roama kare tooro ukaahn yaaj mooge won ke cing nyooro. Ngo ngahyi thiw kejea awuohj maa atiihyi rog Judea tooro. <sup>11</sup> Nea loohng maa adhahla nud wale gihn me raaj maa atiihya nud me a dhiil kaa ngaabo ke nyinge, e ka me kweera ke ngaab tooro. Abea naa atoor gihn maa adiehr yihdh giih arob gene riha e lug gihra be kedh nyum Judea ne luuo. Kedh an nyum luu apiil gihr jaah gihr Roama.”

<sup>12</sup> Gihn nu e Pejtuj akuong mad ke yaa doonge giihe, noono maa abeehre lum Poal kea, “Beer lug gihri ukedh nyum jaah.”

### Lug Poal Yea Akwaan Yihr Agrihpa

<sup>13</sup> Batien nihn e Agrihpa Ruohdh maa Bernihj ge abeehn Cejearya ne liew Poarcoj Pejtuj naa adoohng ne muudiihr gihr Judea. <sup>14</sup> Naa abeehd gene keehd kar nihn me noog e Poarcoj Pejtuj apiih ne kwaan thar lug gihr Poal yihr Agrihpa kobe, “Dhaano nud kan maa awii Pelige yi karkoohn ne maabuuj. <sup>15</sup> Naa anaa acaa Jeruucalem e yaa lam kedea jo doong Judea giih me reje arob gene ke nyinge kedea maa akway gene wonga kejea kihma ngo.

<sup>16</sup> “Abea ngo abeehra yihr gen kejea lug yaa Roama be yug wa gihn nu. Nea mar yaa Roama e ngaa akahl yi lug wudh gen ke tuohmo keehd ngaa ayab lug ree beere giih arob ree wudh gen rome kaa duogo. Ngaa ayab lug ree be kaab ucube yi cing ngaa ayab lug. <sup>17</sup> Naa abeehn gene kan, e a kuu acahg gaalo ne maany lug gen. Yi ruu piny e a apiih kar lug ukahl Poal nyuma. <sup>18</sup> Adiehr muon yaa ayab lug ree ge aci ne aj maalo ne rob. Abea giih arob gene ge padh giih reje e anaa para kejea ge urob gene. <sup>19</sup> Gihn ayoad beehde peehm e ne keew gen ke nying ke wuor gene Juog gen kii ngo kedea ge ake peehm ke nying ngaa maa athow me nyinge Jeacuu. Kob Poale kea Jeacuu ngo kuow. <sup>20</sup> Kar maany lug gihr gen wiha adhiehdhe bang gihn thaahdh luube ge kaa yoado cang. Noono e naa apeeध्ये Poal nea ngo uyiho ne

ci Jeruucalem beere lug gihre caa ke ne maanyo kun caadi. <sup>21</sup> Abea Poal akoohbo kejea kedh lug gihre nyum jaah ukihm jaahe ngo. Noono e ngo aroba kejea wiie ubeehde yi karkoohn uwahdhe ka uoohra ngo yihr jaah.”

<sup>22</sup> Maa akoohb Agrihpa yihr Poarcoj Pejtuj kea, “Cwihnya ne bange ulihnga gihn teed nyine.” Maa abeehr Poarcoj Pejtuj ngo kobe, “Ngo ukahl bangi keroo beere lume lihngi lihngo.”

<sup>23</sup> Ke nyango naa abeehn Agrihpa ge keehd Bernihj kar amaad e ge alor beer mee ke wuohro maa wudh ge amoar yaa anudo keraahyo wa lor jaah. Agrihpa maa Bernihj ge abeehn kar amaad e ge caahdh kaa jaabidhe giij jeaj kedea jo doonge paajo. Poarcoj Pejtuj lubo arobe maa akahl Poal. <sup>24</sup> Batiene e Poarcoj Pejtuj ake thubo ke rob kobe, “Ruohdh Agrihpa kedea wu yaa nud kan cang. Nyin niidu kan Judea cang giij ne geen ni kedea muu ne Jeruucalem ge abeehn banga uluom gene ngo kedea uyuog gene riha ke piih nying gen kejea wonge keá dog ke niido wiij piny. <sup>25</sup> Abea an, awuohj maa ayooda ree tooro me kihme ke thoo ke nyinge. Ngo oohra ke bang jaah Roama bang gihn e ne daahd lug gihre uluge ke nyum jaah. <sup>26</sup> Abea gihn me ne cohg me agweeda ke nyinge yihr jaah ngo tooro. E naa gihn akahla ngo nyumi yih Ruohdh Agrihpa maa wu yaa ni nud kan cang beere ngo peehnyu peehnyo ka mooge e gihn muu uroma ke gweedo uyooda. <sup>27</sup> Bang gihn padh kare uohr ngaa maa amag e awuohj gihn amage ke nyinge kuu anyoadh.”

### Poal Rob Gihn Amaan Judea En Ke Nyinge Yihr Agrihpa

**26** <sup>1</sup> Kaano arumo e Agrihpa ake rubo yihr Poal kea, “Rob gihri ne daahdi ke teedo ne jaahy luub arob rihi.” E Poal cinge atihnge ke maalo maa athube ke rob ne jaahy giij reje naa arob ree kea, <sup>2</sup> “Ruohdh Agrihpa, riha ne dwaar tihng bang gihn nahge nyumi e ne beehra wudh giij arob Judea yi kuohma. <sup>3</sup> Riha ne dwaar bang gihn yih beehda ngaa me ngahy cang paar Judea. Thiow ka tiihy gene giij paar gen kii ngo, ge ngahyi. Ke nying giij nu e ne kwaya wongi ne lihng gihn teeda.

<sup>4</sup> “Ngahy Judea cang kaa anaa abeehda kii ngo naa anaa anahga nyedhoohg, kaa abeehda kii ngo paar wan kedea yi Jeruucalem ngo ngahy gene ke coon. <sup>5</sup> Ngo angahy gene thiow, nea padh kweer e ne kweer gene ke rob ngo, kejea a beehda ngad Paarijea me ne cohg. Paarijea ge nyoge me mag lum Juog ke dhe yooh me be rom ree ke ngooro yihr nyoge mooge. <sup>6</sup> Abea a aman awaahn akahl yi lug ne kihmo ke nying gihn gaahna gihn anaa aceg Juoge piny yihr ge kuow wan kejea ngo utiihye. <sup>7</sup> Gihn arob Juoge kea ngo utiihye e naa gihn gaahn yaa tien paar Judea ge apaar wonge ariow kedea e naa gihn acub gene tiihy lum Juog yi cwihny gen ke bang dewaahr kedea ke bang decahngo. Acub gene yi cwihny gen beere gihn ngo yoad gene yoado. Beehde ke nying gaahn gihn ni, yih Ruohdh e naa gihn ayab Judea lug riha. <sup>8</sup> Beehda ke nying gihn ne cohg, e bahnge ngo be yihiu kejea nyoge maa athow ge meehg Juoge ke cahro.

<sup>9</sup> “A ke nguda coon ge apoohde e a kuu adoohng ne ngad Jeacuu ngo anaa acuba yi cwihnya e tiihy giij me reje, giij ajohr rog yaa batien Jeacuu ngad Naajaread. <sup>10</sup> Tiihy giij me reje rog yaa batien Jeacuu e naa anahg tiihya Jeruucalem. Jo doong yaa lam tee acub gene yihra me maga yaa ayiih lum Juog ukedh gen yi karkoohn. Yi lug a anaa kur yaa daahd ukihm gen ke thoo. <sup>11</sup> Tiel me thoohdh e giij ajohr ge yuga yugo rog gen ke bang yihdh wuud amaad kaa moogo e wudh gen uwaar gene urob gene giij me reje rih Jeacuu. Cwihnya anaa arahnyo rog gen ne cohg adhaahr an ne caa wudh geedhe mooge ne tiihy giij ajohr rog gen.

<sup>12</sup> “Anaa anahg ke nying joohr yaa ayiiho e naa acaa geen Damajko keehd warga gihr jo doong yaa lam me meehg an tiihj ke kar wiha rog gen. <sup>13</sup> Yih Ruohdh gihn maa aniida yi yoohn Damajko maano e cahng nii diehr wiij beehda gihn maa akaal wiij cahng ke liel. Noono umeenye piny buuda maa buud yaa acaahdho keehd an cang ne weehny. <sup>14</sup> Gihn nu e wa anaa ariehb piny ke pahdho maa alihnga duon dhaano me rubo yihra ke dhe paaro kobe, ‘Coal! Beehda ater gihn e bangi an wa gihn? Yih uroomo wa ngaa me keehl tan kaahdo kaa athoohl.’

<sup>15</sup> “Maa apeehea koba, ‘Yih beehda ngaa ruohdh?’

“Maa abeehr ruohdhe ngo kea, ‘A naa Jeacuu ge bangi ni. <sup>16</sup> Abea a abeehn bangi, awaahn ni yih akwanya ne ngada me tiihyo yihra. Nahge luma e ne tiihyi keehde me neehn cahng tihng. Yedh maalo ucuungi wudh tieni. Kwaad giij aniidi kedea giij unyoadha yihri yih nuu uteed gen yihr nyoge mooge wong maalo. <sup>17</sup> Yih uoohra bang Judea maa yaa padh Judea kedea yih ukoara ubahnge gihn me raaj be yug gene riha. <sup>18</sup> Yih nuu uyab nying gen uyiih gene luma ubahnge ge be beehdo yi muudho yi cing atiihb ukeehg kedea ukahli gen yihr Juog Wura. Ke nying yiho mar gen nuu uyiih gene an, e anyoohne giij gen uwii piny beere kar piih ke cubo yihr gen neehn mar yaa akwany Juoge.’

<sup>19</sup> “Yih Ruohdh Agrihpa, gihn arob Jeacuu yihra yi yooh naa akwanye an ngo kaa dhahlo. <sup>20</sup> Noono uthuba thubo ke puohny Judea. A athubo ke puohny gen umodho Damajko maa Jeruucalem kedea ke bang kuohn beed gene kejea yiij gene lum Jeacuu. Ge apuohnya kejea log gene ngahdh gen rog anyoohne naa ayug gene rih Juog kedea uduu gene bang Juog. Ateeda yihr gen kedea wii gene anyoohne kejea yug gene giij me beeye. <sup>21</sup> Abea Judea mooge kwaad giij puohnya ge kuu anhyaar gene. Yaa nu ge naa amaahd an e a athum ke yug giij kweehr yi laaro gihr wod Juog. Ge anaa adaahd unahg gene an. <sup>22</sup> Abea a kuu awii Juoge yi cing gen, bang gihn Juog a akonye cahng nu wa kwaad ka na kwaaye an kaa konyo yihdh giij me reje. Beehda ke nying kuny gihr Juog e ne poohd puohnya gihn maa athiir yihr nyoge cang, ngaa me duohng kedea ngaa me thiin, kejea Jeacuu abeehno. A puohny kwaad giij anaa arob yaa agamloohngjuoge kedea Moaje coon ke nying Ngad Boadh nyoge ge akoaro beere ngo ngahyo ngahyo. <sup>23</sup> Anaa ateed gene kejea Jeacuu Ngad Boadh nyoge guohbe urahmo maa ngo uthow kedea unahge e nuu ukuong cahro umodho ne nyoadh dhe yoohn uboadh nyoge wahy gen kii ngo.”

### Poal Daahd Log Wiij Agrihpa Uyihe Jeacuu

<sup>24</sup> Poal apoohde e ngo urubo wa maano e jaahy giij arob ree, e Pejtuj amaahr piny ke kwaago kobe, “Poal, yih amuohl deeh kwaahno duohng gihri noono akwaani.”



<sup>25</sup> Maa abeehr Poale ngo, “Ruohdh a kuu amuohl. Giih roba ge beehda giih maa ather kedea ge roba e wiiha kwel. <sup>26</sup> Agrihpa Ruohdh, a dhiil rob yihri e gihn me kana ngo tooro bang gihn giih roba ni ge ngahyi. Thiow beehda gihn me ngahya kejea yihdh giih ngo ge aboari bang gihn rog gen ayug gene nyum nyoge cang. <sup>27</sup> Agrihpa Ruohdh, luub Juog naa anyoadhe ngahda ge ayihi ne? Ngahya kejea ge ayihi.”

<sup>28</sup> Kob Agrihpa yihr Poal kea, “Ke nye luube giih noog arobi kan nea mari kejea wiiha guoi kaa loo udoohnga ne ngaa maa ayihi lum Jeacuu ne?” <sup>29</sup> Maa abeehr Poale ngo kea, “Padh ke nye luube giih noog, keehd ke luube me thoohdh e yih roma kaa puohnyo. Mara a kway Juog beere wu cang ge alihng giih aroba wu udoohng wa an abea gele ge tooro rogu wa mara.”

<sup>30</sup> Naa athum Poale ke rob lum ni e Agrihpa Ruohdh kedea muudiihr maa Bernihj kedea nyoge cang ge a'aj maalo <sup>31</sup> uay gene e ge urubo ke rog gen kejea nyin gihn me raaj maa atiihye tooro me kihme ke thoo ke nyinge wale me kedhe yi karkoohn.

<sup>32</sup> Gihn nu e Agrihpa dhee aloge bang Pejtuj kea, “Nyin beehda ngaa me ne dhiil ke luny oogo nea padh gihn arube kejea lug gihre kedhe nyum Jaah.”

### Waadhd Poal Ne Ci Roama

**27** <sup>1</sup> Naa alony waadh wan ne aay keehd baabuur ne ci Itaalya, e Poal maa maabuue mooge ge acub yi cing jaabidh me nyinge Juulio. Juulio anahg jaabidh mar akuud deaj gihn cuohn naa ‘Ketiihba gihr Agojtiino.’ <sup>2–6</sup> Wa amon yi baabuur<sup>k</sup> gihr Adramiitya. Arijtarkuj ngad Macedoanya, anaa ake caahdho ke wan ne do Thecaaloinika. Ngo anahg ngaa me na kony Poal. Wa aniihn ne cielo uwadh wane ruuwow Ciihdoan. Juulio anahg jaabidh me beer keehd Poal, noono uwie ngo ne ci ne lieu gome beere ngo ke muojo ke giih daahde. Wa abar maalo ke waadh ke baabuur uwadh wane Miira.<sup>l</sup> Dhe waadh Miira e jaabidh wa adaage yi baabuur me ci Itaalya.<sup>m</sup>

<sup>7</sup> Nihn me thoohdh e baabuur thiehr yaa duoje maadh bang gihn ngo acor yi yamo me teeg kedea udhiile wan ka me cahng keehd geen Niiduj. Kaano e kar bar wong maalo atooro yihr wan ke nying yamo. Noono ulog wiih baabuur beere ngo kaahn kun toor yamo me duohng yea. Cwihny wan anaa tiing buud thuur me cuohn ne Calmone. <sup>8</sup> Baabuur wa adhiile ke kahl ka me cuohn ne Pear Eaben. Kaa ngo cahng ke geen Liihcya maa ngo ageehng goode ke kur nyango kedea ke kur thiehn kuohn beehn yame ke yiehdh gen. Abea keehd maano e ngo kuu anahg dhe waadh me beer me rom ruudo ke naah yea.

### Deeh Giir Yamo Ree Atihng

<sup>9</sup> Wa abeehdo kaano ke kar nihn me nud ne koar. Abea ngo abeehn wane ne yoado kejea baabuur be rom wahdh ka me baahr bang gihn yamo ree ajwage. Kaano e Poal ake rubo keehd yaa duoj baabuur kea, <sup>10</sup> “Yaage, wo yoad gihn me raaje yoado nea wo bar maalo ke waadhho ubahng ruudo be thumo kan. Wo yoad kerahge yoado bang gihn yamo adoohng teeg keraahyo. Wahyo kedea giih kaahn baabuure wo udaar ke gen.” <sup>11</sup> Jaabidh akweer ke lihg lum Poal unahge lum ngad baabuur kedea lum ngaa duohng yaa duoj ge naa alihng. <sup>12</sup> Thiow dhe waadh gihn ni kuu anahg dhe waadh me beer ne cohng me rom ruudo ke naah yea. Gihn nu e nyoge me thoohdh kiin yaa anaa ke caahdho keehd baabuur cwihny gen anaa bange uay baabuure beere dhe waadh Peanig tum kaa doohdo. Dhe waadh Peanig anahg dhe waadh me ne uthuur Kread. Anahg dhe waadh me ree acube ka me beer ubeehn yame kaa dhog yiehdhe ariow cog. Noono e kare nud unahg ruudo kaano.

<sup>13</sup> Deeh yamo gihn duohng anaa acuungo maa apahdhe yi cwihny yaa duoj. Naa awaar yame yea, e waadh agweehg gene ne rom doohd dhe waadh Peanig. Noono uteel gene ngiihny amag baabuur piny ke gen maalo ne lony ngo ne ci yi diehr naam. Baabuur aduoj gene duojo e ngo dhihr gene ke rih agala gihr uthuur Kread. <sup>14</sup> Abea batien ka me thiin, e yamo me teeg ake coohdo e ngo luung piny kaa wiih thuur. <sup>15</sup> Maa abeehn deeh yam ni ukeehde rih baabuur. Gihn nu e kar kaahn baabuur e kwany buud agala ariehnyo, noono uwii wane ngo ke yihr yamo ne koolo. <sup>16–17</sup> Kaano e wa abuhj ke gwiir giih baabuur bang gihn yaa duoj ge atud ka moogo e baabuur ucwahnyo kaa agala gihr Liihbya<sup>n</sup> <sup>18</sup> Yamo kuu acuungo. Gihn nu e teehr akaahn baabuure ngo athoohr yi naam duohng. <sup>19</sup> Ruuwow moogo dahng e giih akaahn baabuure ge acahg gene kaa thoohr naam. <sup>20</sup> Nihn me thoohdh e ciehr maa cahng ge be niid wane abea e yamo ngo adhal ke yug giih me teeg. Maa angey wane wudh wan yi thoo bang gihn, gihn maa agaahn wane me kony wan atooro.

<sup>21</sup> Naa abeehd nyoge ke nihn me thoohdh e kar cam tooro yihr gen, e Poal a'aj maalo ucea ne cuung nyum gen urube kobe, “Yaage, ngo ne nahg gihn me beer nea luma nuu lihg ngo ne cahng ubahng wo be ne aay Kread. Nea wo be ne aay e giiho ge be ne rahnyo wa kwaad gihn. <sup>22</sup> Awaahn ni ateeda yihru kejea wu keá tud bang gihn ngaa me wonge urwaahny keew tooro. Unahg baabuur e ne kar konye utooro. <sup>23</sup> Bang gihn wuohnjuog, Juog gihn beehde e naa Juog wuora ni, arubo yihra kea, <sup>24</sup> ‘Poal, yih keá tud. Yih dhiil cuungo nyum jaah. E Juog, ke nying beey mare gihn me beer ayuge ke nyingi. Ngahy ngo kejea Juog ngo agwiire utoor ngaa me thow kiin yaa nud ke yihni yi baabuur.’ <sup>25</sup> E naa gihn koohba kejea wu keá tud noono. Bang gihn Juog gaahna gaahno kejea lume naa ateede yihra padh toohd. Wo ubodh cang. <sup>26</sup> Abea gihn nud wo udhiil yame ke koolo wiih uthuur.”

<sup>k</sup>27:2-6 Baabuur: Beehda gihn me wa yaahy me duohng maa ageer kaa yen kedea wiihe amag ke yen thiow, uwum waare wiihe

<sup>l</sup>27:2-6 Yi waadh acaahdh baabuure caahdho e yamo me teeg ake coohd. Noono ucaahdh baabuure e ngo kaahn dhe agala bang yam ngo aduohng keter. Gihn nu maa angud baabuure dhe waadh Miira.

<sup>m</sup>27:2-6 Baabuur gihn adaag wane yea ngo abeehno kaa yooon Alekjandrya e ngo kaahn beel.

<sup>n</sup>27:16-17 Nye yaahn thiin ngo agoony wane utihng yi baabuur kedea utuhj baabuur ke ngude ke thoohn thool me doohng beere ngo be toar upaah yea. Thiow waare giih kool baabuur ge agoony oogo. Baabuur beehda yamo e ne kool ngo ke waaro.

<sup>27</sup> Yi diehr waahr man e yaa tiihyo yi baabuur wudh gen apar gene adoohng wa baabuur cahng mee kaa agala. Ngo anahg dewaahr batien nihn apaar wonge angween naa athub yame ke kool wan ke bang yi diih naam.<sup>o</sup> <sup>28</sup> Noono e thool alwaay gene ke piny e gihn me peeg mee atuohy ree ne rom thuudh yi naam. Maa ayoad gene yi naam e ngo cuog ke kar mihtihre jiehariow. Batien ka me thiin keehdo e ngo acahg gene kaa romo maa ayoad gene ngo e cuog ka kar mihtihre dhaano aduuno wonge apaar keede. <sup>29</sup> Ge anaa atud kejea ka mooge e baabuur thare keehle ke wudh leele wale kihd. Gihn nu maa alwaay gene thoohn ngiihny angween me doonge ne mag baabuur piny ke kur ngahye. Noono upiih gene ne kway Juog beere piny laar ruuo. <sup>30</sup> Yaa duoj baabuur ge adaahd ukwal gene rog gen uaay gene. Noono maa alwaay gene yaahy yi naam duohng adoohng wa ge nyoge me lwaay kwaad gihn mag yaahy piny ke kur nyum baabuur. <sup>31</sup> E Poal ake rubo yihr jaabidh maa acaakere kobe, “Nea yaa duoj ge buu ubeehdo yi baabuur e kar bodho yihro ngo tooro.” <sup>32</sup> Maa angol acaakere thool gihn anaa atuohy yaahy keehde uaay piihe ke yaahy.

<sup>33</sup> Ke nyango, e piny poohd ne yihr yihr, e Poal ake rubo keehd nyoge ke nying cam kea, “Yaage, nihn apaar wonge angween awaahn ni e wu be cahmo bang gihn wu akoar uniidu wong cahng. <sup>34</sup> A teeda yihru awaahn ni kejea dhiilu cam bang gihn cam e naa wahy. Gihn me thiin muu uyoahd wun ngo tooro.” <sup>35</sup> Naa athume ke rob keehd gen e amono akaabe maa amuohje koohr Juog nyum gen cang, utoare yaa amono maa athube ke cam. <sup>36</sup> Gihn nu maa abeehn nyoge maa adeed gene cwihtny gen ucahm gene. <sup>37</sup> Wa yaa anudo yi baabuur wa anahg nyoge jiehabiihje ariow ke jiehadahg wonge apaar wonge abiihjbeciel. <sup>38</sup> Naa acahm nyoge urom gene, e baabuur acahg gene kaa yug yoohd bang gihn mog akaahn athoohr gene yi naam duohng.

### Baabuur Atoar Ne Jog Jogi

<sup>39</sup> Naa aruu piny, e yaa duoj agala kuu angey gene. Ge aniid gihn me wa bad naam me cor yi kuohyo. Maa agweehg gene ngo kejea baabuur tum gene kaa kedh ne cuungo wiih kuohyo. <sup>40</sup> Batiene arumo e thoohn ngiihny me doonge giih baabuur ne mage piny keehd gen ge angol gene ngolo udihr gene piny. Thiow alwaae ariow giih kiihwo ge agoony gene uteel gen maalo beere ge be keehd piny thaahdh piih. Batiene maa atihng gene waaro gihn ne nyum baabuur maalo beere yamo baabuur koole koolo ne ci kar kuohyo. <sup>41</sup> Abea e baabuur aguo cwahnyo kaa agan kuohyo me ne yi naam duohng udoohde. Kun doo nyum baabuur ngo adoohd utoor ka me ne nihg, e kun doo ngahye ajog athewe ne jog jogi.

<sup>42</sup> Gihn nu e acaakere lubo agwiir gene gwiir ke piny kejea maabuuye cang ge ke naah utoor me kwaang oogo ugoohde. <sup>43</sup> Jaabidh cwihtnye anaa kony Poal ubahng ngo be nahg acaakere. Gihn nu maa amahne gen ke yug gihn agweehg gene. Noono e ngo arobe kejea kwaad yaa ngahy kwaang, kwaang gene ne ci wiih agala. <sup>44</sup> Yaa kwihj kwaang ge ulahbi ke batien gen e ge maang apange kede a kwaad giih maa atoar oogo rih baabuur. E naa kaa abodh wane ke kar wan cang uwahdh wane oogo wiih agala unahg koohm wane ne war.

### Giih Atiihy Poale Maltha

**28** <sup>1</sup> Naa awahnh wane wiih agala naa abodh wane ke yoohm rog wan, e ngo abeehn wane ne lihngo kejea thuur gihn ne wane wiie nyinge Maltha. <sup>2</sup> Yaa beed piny ni, wa alor gene beer mee. Deeh maaj ajohng gene bang gihn kodh anaa cwii umag koohye wan me kwaade tooro. <sup>3</sup> Poal ariine aconge me kedhe yi maaj. Abea kaano anaa akedhe gen kedho yi maaj nu, e thuohl maa rihng oogo yi maaj ree adole rih cing Poal. <sup>4</sup> Naa aniid yaa paan ni e thuohl cing Poal adole e ge ake rubo kob gene, “Nyin beehde ngaa me nyoge anahge. Keehd maano abodhe yi naam duohng nu e batiene poohd e be wii rem yaa anahge.” <sup>5</sup> Maa abeehn Poale uteenge thuohl yi maaj e gihn maa yoad ngo tooro. <sup>6</sup> Yaa abeed piny ni, kwaad thuohn ni ngo ngahy gene kejea ngo unaah. Noono e ge anaa koar ka ubeehn guohb Poale ukuohde ne bung bung uthowe. Naa abahng gihn maa ayug ree tooro rih Poal, e wudh gen awaar gen ukoohb gene, “Wa nyin ni beehda juog.”

<sup>7</sup> Miehy nyin moogo me nyinge Puubloj ge anaa ka me cahng mee keehd ka anahg wane yea. Puubloj anahg ruohdh Maltha. Puubloj wa acuohne paare ubeehd wane paare ke kar nihn adahg e wa weehle giie. <sup>8</sup> Wur Puubloj anaa piny keehd atwaany. Guohbe aleehdho wa maaj kede a yeye ake caahdho. Poal anaa aci wod bang wur Puubloj. Kaano e Poal apiih ne kway Juog batiene e cinge acube ke wiih wur Puubloj uguo atwaanye ke aay. <sup>9</sup> Naa aniid jo paan ni kaa athiehdh Poale wur Puubloj, e yaa atwaanye ge akahl gene ke bang Poal maa athiehdh Poale gen cang. <sup>10</sup> Dwahde adahg ge naa anahg wane. Yi dwahd nu e yaa paan nu wa akaahn gene beer mee. Wa na muoj gene muojo ke giih nyepinye. Yi cahng a'aay wane e wa acahg gene kaa muojo ke giih me thoohdh me kaahn wane yooh.

<sup>11</sup> Batiene dwahd nu adahg e wa ake aay Maltha ke baabuur maa abeehno ke yoohn Alekjandrya<sup>p</sup> <sup>12</sup> Wa a'aay Maltha unahg wane nihn abiihjbeciel yi yooh, noono uwahdh wane geen Puuteali.<sup>q</sup> <sup>13–15</sup> Yaa ayiiho mooge ge ayoad wane Puuteali. Wa amahn gene kejea beehd wane ke gen ke nihn abiihjbieriow. Yaa ayiiho giih beehd Roama beehn wan alihng gene noono maa abeehn gene ne lor wan. Nyoge mooge wa ayoad gene yi cuug cuohn naa Apioj, e mooge wa ayoad gene ka me cuohn ne ‘Kluube Adahg’. Kaa aniid Poale ge niido, e cwihtnye anaa yum umuohye koohr Juog.

<sup>16</sup> Naa awahnh wane Roama, e Poal ameehg beehdo kare e keede, en maa acaaker gihn acub ne koar ngo bang gihn ngo maabuuj.

<sup>17</sup> Batiene nihn adahg, e Poal Judea giih doonge ge beed Roama ge acuohne bange. Naa abeehn gene, e Poal ake rubo yihr gen kea, “Jo paar wan, a e niidu kan, keehd maa amag an ne maabuuj, kihd awuohj maa atiihya rog jo paaro tooro. Thiow yihdh loohng paaro ge kaa dhahlo. Keehd me bahng gihn me raaj maa atiihya tooro, e yaa paaro mooge a amaahd gene e ge daahd an ke naah. Noono uyug gene giih alyaahb uwahdhe kaa amag ruohdh Roamae an ukedh gene an yi karkoohn. <sup>18</sup> Naa apeehtny ruohdhe dhiia e awuohj kuu ayoad gene riha me rom an ke kihmo ke thoo. Ruohdh

<sup>o</sup>27:27 Naam ngo nyinge Adrya.

<sup>p</sup>28:11 Baabuur abeehn ke yoohn Alekjandrya nyinge ‘Kuog Juog’ wa ka ne teed yaa Roama ngo coon.

<sup>q</sup>28:12 Yi waahdh gen noono e ge atoohng geen Ciirakuj kede a geen Rehgiown batiene Puuteali.

Roama cwihny gen anaa bange uluny gene an oogo, <sup>19</sup> abea jo doong Judea ge beed Jeruucalem ge akweer kejea nahg an. Naa aniida ngo wa gihn nu, e aroba kejea lug gihra dhiil kaa kahlo nyum Jaah gih Roama. An ke buur nguda, gihn me raaj me ne yi aduuna keehd jo paaro ngo tooro ne weey weey. <sup>20</sup> E naa gihn akwaya nyingu kejea beehnu banga beere a urubo keehd wun. Bang gihn cwihnya ne rob athere, e a beehda maabuuj ke nying Ngaan gaahn yaa Yijaraele.”

<sup>21</sup> Kaano e jo doong Judea giih Roama ge ake rubo yih Poal kob gene, “Dhog maa abeehno yih wan tooro ke yoohn Judea ke nyingi kedea kihd dhaano now keew jo paaro maa abeehn bang wan keehd lubo me raaj ke nyingi ngo tooro.

<sup>22</sup> Abee cwihny wan ne bange ulihng wane luubi. Cwihny wan ne lihng gen bang gihn akuud gihn nii yea giih me reje ke robo ke nyinge ke bang yihdh mieh.”

<sup>23</sup> Noono umad gene cahng udog gene duuo bang Poal ne lihng gihn daahde ke robo. Yi cahng nu, e amahr nyoge me thoohdh keree ake waahdo ka beed Poale. Naa athub Poale ke ke nyango uwahdhe ke waahr e ngo urubo yih gen ke nying ka beehn nyoge udoohng gene ne nyoge me naa yi cing Juog kedea ukwaane giih apuohny Jeacuue yih gen beer mee. Poal arubo ke nying loohng Moaje kedea ke nying giih agweed yaa gamloohngjuoge ne cohng ngo yi wudh gen kejea e rob giih maa athere. <sup>24</sup> Adiehr muon, nyoge mooge kiin gen lum Poal ayiih gene, abea mooge lum Poal kuu ayiih gene. <sup>25</sup> E yaa kuu ayiih lum Poal ge ake thubo ke aay e ge upeehmo ke yaa ayiiho. Noono ubeehn Poale utoohne yaa daahd aay kobe, “Beehda ngaa e ne kwihy ngo kiin nu e gihn anaa arob Wahy Juoge naa agweed Yicaaye piny ke nying yaa kweer ke lum Juog. Agweed Yicaaye agamloohngjuoge kea,

<sup>26</sup> ‘Teed ngo yih yaa nu kejea

ge ngahya e ge nyoge me be yiih luube.

Nyoge kang gene kango kejea ge yaa lum Juog

abea ka ge nyoge me cwihny gen tooro.

Gihn teeda yih gen be rom gene ke ngahyo

bang gihn ge akweer ke lum Juog.

<sup>27</sup> Bang gihn wudh gen teeg

maa yihdh gen amej gene kedea nying gen amej.

Nea be ne naa wa gihn nu,

e lum Juog ne yiih gene noono e ge ne boadh.’

<sup>28</sup> Dhiila kaa teedo yihru unghayu ngo. <sup>29</sup> Lum ni arob Juoge ke nying ka boadhe yaa ayiiho apuohny wane yih nyoge mooge. Puohny nu ayiih gene keehd maa akweeru ke ngo.”

<sup>30</sup> Ke kar run ariow e Poal abeed paajo maa ajore. Noono e yaa na liew ngo ge lore loro beer mee. <sup>31</sup> Kedea upuohnye gen puohnyo e rubo kaa nying Jeacuu Ruohdh Ngad Boadh nyoge maa ke nying ka beehn nyoge udoohng gene ne nyoge me nii cing Juog. Gihn nu e Poal na urubo e lwahr tooro ree kedea e ngaa maa acuungo yi yoohn puohnye ngo tooro.